

Eqmaro Ke

Ebeq sáhnsahwe ahtebé ehwehne.

Árúkağa ebeq sóthe arámbéhríena anehe wega Pora kérena séhréh atena púku áwíq Árúkae ue sehiranúwe. Anehenura mah pukú Eqmaro Ke pukúe ue sehiranúwe. Sísaga miraéna irarú ehwehnsábé ebeqte pukúgá teíre. Manikáne Awanka mirau arámbéhrí Eqmaro Ke pukúgá teíre. Sísaga eqmaro kega pokue mó kehiná suwahpeq mó kehiná suwahperue Sísá éhweh korerúwe. Teríútaq Manikáne Awanka se págege aritena séhréh aritowara áhnte kegá sene ehweh irera Sísansabé aiq pútare atówe. Mi ehwéhnká abae agúwara Sísá tagaríah ké áhnte úkuwe. Mah pukúípéqte éhwéhnká minayabeákáq eqmaro kega mirau arámbéhríákáqsábé teíre.

Eqmaro kega miraunsabé éhwéhne.

Sísaga, Manikáne Awa eqmaraníe ú ehwehne.

1 ¹Tíópírásao, néne sehíramé kawerue sáhnsahwe iro. Menah tanáhráq mó pahsí sehíranue áwátáuge. Mi pahsípéq moke Sísaga miraúnsabe sehíranue teawena wega íwáhnorúnsabeakáq teawátáuge. ²Wene arambehri áhwárótaqkákáq íópeq kiu tanáhráqsábéakáq teawátáuge. Wega marakóipeq míotaq wehuke eqmaq suanieéna omaq sitowe. Manikáne Awanka Sísá iwíáh atowana wega íópeq kinaútaq omaq sito ke síwáhnorúwe. ³Téhwe Sísá awankátaq táhpague pukéna anehe oga úkéna mó wehekáh mó wehekáhnue omaq sito keba séyééna wewe sokigi aritowara tagowe. Tagowana 40 wehekáh miraéna Manikánka wahnah wahnahnirabeqte éhwéh teriuwe.

⁴Mi tanáhráq sega momiwíuríótaq Sísaga mahraréna, Sarúsarama suwahpeq apubúue sueq pokiyehboq Nániboga eqmarahna aní tuinayabé wensabé áwénunoro. Menah Nániboga eqmarahna aní éhweh teíyátáuge.^a ⁵Naho Sóniga wání meriuwana Manikáne Awanka áhníbórá tunse iteba mía míainkehe úwe.

^a 1.4 Sísaga eqmarahna anímé Manikáne Awa mire. Árúka 24.49, Sóni 14.16-17, Eqmaro 2.33 tagáhno.

⁶Mó tanáhráq eqmaro kega momiwíuríotaq sega Sísansabé kasenára, Ísara ke iteitene marakóraq amahnága wahnahnoro aitaníbo uwe.^b ⁷Uwana Sísaga sensabé, Nániboga moke mi tanáhráqkákák wéhékáhnkakaq wahnahnire. Minawé íre iteitene arambehri puaq itega mi tanáhráqkákák wéhékáhnkakaq íre tagariáhwe. ⁸Minawé íre tagarawéq mahraue tagariagehe. Manikáne Awanka iteba tuinaraq ite págege aitahnaq itega íné éhweh mah kehiná kéhíná korerigéhe. Sarúsarama suwahpepte kéreq moke mó Súría marákórápéqté kéreq Sámária marákórápéqté kéreq moke mah kehiná kéhíná korerigéhe úwe.

Sísa íópeq kibekú ehwehne.
(*Máhka 16.19-20; Áríka 24.50-53*)

⁹Mah kehiná kéhíná korerigéhe úwana eqmaro kega tagotaq Sísa tumerowana íópeq kire írábúyápipeq kibekúwe. ¹⁰Kibekúwara sega íópeq awahnkanue tagariówara taberábe korósiákák ánítégá iriwe míóye. ¹¹Iriwe méra sensabé, Kehrari marákórápéqté kéó, aneqsabé iriwe méq íópeq ebitiaho? Sísaga ite iuwena íópeq pokiraaq tagahwe. We amahnága pokinserah mókake tuinawire uye.

Súrásane arambehri awaq mio ehwehne.

¹²Uyara eqmaro kega Óríwi sawéhrápéqté tunse Sarúsarama suwahpeq wahtotaq tueaguwe. ¹³Tueagéra sega kaegaeu nah abobórahpeq kíúwe. Sensíwíqmarimé mahraue Píta, Sóni, Sémísi, Ehntaru, Pírípi, Tómáhsi, Pátórómíyu, Mátíyu, Ápíasane ahninkáwá wenáwíq Sémísi, ebeh ehwéh iriaréh ání wenáwíq Sáímóni, mó Sémísine ani wenáwíq Súrása mirauega kíúwe. ¹⁴Sereq Sísane ábákawaréhreq wenanoreq mó inínsónseqka sirupipeq peh morá íwíáhue moraráq púreq aruqaruruwe.

¹⁵Mó wehekáh sega mirautaq 120 ke áhnte Sísa tagariáh kégá momiwíuríowe. Pítaga iriwe ména mahraréna, ¹⁶Nánuwahraho, naho Manikáne Awanka Tébiti iwíáh atowana Súrása éhweh sehiranúwe. Súrásaga Sísane naruo kowerironsabe mi sehirá aiq pútaraguraire. ¹⁷Sísaga Súrása omaq atowaq Súrásareq itereqka moraráq arambehriuraune úwe.

¹⁸Súrásaga Sísane naruo kowerironsabe móne meyowara mi monératé marakó paiqmárowe. Súrásaga sáwéhrapeqté ayahqno maraipérué surahúwana wene ayahba tapoagúwe. Wene ayahba tapoague wene ayamári pehrápeq sahaqúwe. ¹⁹Wega miraúnsabe moke Sarúsarama suwahpepte kégá irera mi marákóyábé áwírume sene ehweh Ákérámae atówe. Mi awíqmé Korahq Marakóe atówe.

^b 1.6 Sísa marakóipeq tutaq Aroma kegá Ísara kené marakó págegeue wahnahnuwara áhnte kegá iwíáhéra, Wega Aroma ke kaqsuena iteitensabé, Wahnahnoro aitankéhe íwíáhuwe.

²⁰Pítaga Súrása éhweh mó mahraréna, Buk Songipeqté éhwéhnká aiq mahraréna,

Wene mátabu susa matábú kanae. Mó kegá mitaq íre miáhro arito
ire. (Buk Song 69.25)

Mi ehwéhnká mó mahraréna,

Mó anínká wene arambehri awaq miankéhe ire. (Buk Song 109.8)

²¹⁻²²Sóniga Sísá wání meawátáitaq táhmaro kegá Sísá kétówe. Segá kékérue Sísaga oga úkuraitaqkákákq íópeq kiraitaqkákákq tagarowe. Mó ke Sísá éhweh terigeheéq mina tahnsa Sísá kékéri aní iwíáhue omaq atanéhe úwe.

²³Pítaga mi ehwéh teriuwara sega téhraníté omaq sitówe. Mó aní wenáwíq Máhtíasae. Mó aní wenáwíq Sósépaé. Sósépawe we mó awíq Pásábae. We mó awíq Sásátae. ²⁴⁻²⁵Sega mahrarue púreréra, Itene Wahnahno, arega ómi kehináné sirupipeqté íwíáhwé aiq tagariahne. Arega eqmatona arámbéhrí Súrásaga aiq suena ahbabárorabeq pokuraire. Wene arambehri mirainkeheé arega omaq atahna aní sokigi aio éra púreruwe. ²⁶Manikánka omaq ato aní taganehéera sega káriq ebáh tuparuqme tagéra Máhtíasawe Súrásane arambehri mirainkehe atówara we Sísá kéro ke, airápété morá kéreq arambehriúno átówe.

Manikáne Awanka tu ehwehne.

2 ¹Asiu kené siahrreraq ko tanahráq áwíq Péntíkósie.^c Ebeqte wehekáh sutaq Sísá tagariáh kegá moke peh morábí sáhuríówe. ²Sáhuríówana íópeqté éhwéhnká anotah soíríqká uu inserahnúwara ómi nahupeq tútuue mío kega apubúue írówana ³anehbí irobina tahnsá náneqmarí ábóraragúwara tagowe. Tagowara irobina abae ague mó anípá mó anípánue abae agúwe. ⁴Manikáne Awanka sirupipeq tuména iwíáh arito púpara sega mó kehináné kambare ehweh iraruwe.

⁵Mi tanáhráq áhnte Asiu ke mó kehiná mó kehiná suwahpeqte Sarúsarama suwahpeq sewíówe. Mi ke Manikánsabe iwíáh íwíáh atáh ké wóe. ⁶Sega mi ehwéh irera sega morábí sáhurawéra írówarawe Sísá tagariáh kegá mó kehiná mó kehináné ehweh iraruwe. ⁷Iraruwara seyene ehweh irarunsabé író kega áhtenéra, Árahue irareo éra iwíáhue tagowe. Segá áhtenéra mahraréra, Iteitene ehweh irare kewé se peh morá Kehrari marákórápéqté ké wóe.

⁸Sega iteitene ehwehmarí irarewaq irone. Segá itene ehweh árahue irareo? ⁹Ite Pátía kewé Míría kewé Érámi kewé Mésópótémia marákórápéqté kewé Súría marákórápéqté kewé Kápárósia marákórápéqté kewé Póntúsa marákórápéqté kewé Esia marákórápéqté kewé itene ehweh irarewaq

^c 2.1 Péntíkósiyabé éhwéhmé púku anehepeqte séhírámé “Manikáne Púkuipéq Kéh Áwahe Éhwéhne” ue kéhrabeq tagáhnno.

irone. ¹⁰Párigía marákórápéqté kéwé Pámbíría marákórápéqté kéwé Ísipi marákórápéqté kéwé Árfíbia marákórápéqté kéwé Sáíríni suwahpeq wahtotaq mi kewé Aroma suwahpeqte náhnsó kéwé itene ehweh irarewaq irone.

¹¹Mi kewé Aroma suwahpeqte náhnsó kéwé táhmaro Asiu keurá míáhwe. Mó mitaqté ké Asiu kené sánsá mero ke míáhwe. Kíríti marákórápéqté kéwé Árébía marákórápéqté kéwé moke mi kegá itene ehweh irarewaq irone. Manikánka págege arámbéhrínsabé sega irarewaq irone. Moke iteruwahraga irarewanserah itene ehwehmarí irarewaq irone uwe.

¹²Sega áhtená sene sirupipeq iwíáh kikiréra, Itene ehwehmarí árahue irarewapómo? Aneq sansápómo uwara ¹³mó kegá siwiréh aritera, Segá peh píah nah puara múguwahgu ehwéh irarewe uwe.

Pítaga pahsuo ehwehne.

¹⁴Uwara Pítareq airápété moráue eqmaro kereqka iriwe míówe. Pítaga mipi sáhurío keyabé anotahtaq teriena, Sarúsarama suwahpeq kaegaeo kereq moke mó Asiu kerero, ehweh teiníboq írátíáhro. ¹⁵Abehq wání nah puara múguwahgu ehwéh irarewe eme írakaumo. Amahnága pópoqnah peh ákáhtaq kéhrana íre píah né tanahráre. ¹⁶Mó kené ehweh irarensabé Manikáne ehweh irarú ani, Sóériga mahraréna,

¹⁷Manikánka iraréna, Anehe tanahráq Néníwa mah kehiná kéhínápá eqmaq auwaníe. Néníwanka néne ehweh iwíáh aritahnara itenahnímáhqsonseq iteriyahumáhqsonseqka ehwéh irarigehe. Itene mahbigauné siwanka tagagehe. Orerónká áónáh tagagehe.

¹⁸Mi tanáhráq néne arambehri mirao weh áhrébá néniwa eqmaq auwaníe. Néníwanka néne ehweh iwíáh aritahnara ehweh irarigehe. ¹⁹Íópeqté íre tagaríáh náneq sokigi ainíe. Marakóipeqté moq págege sansá sokigi ainíe. Korahqkakákq irakákq áúnínaakákq tagagehe. ²⁰Pópoqnah sunkíkíraginae. Íótaq korahq tahnsa tautáúraginae. Miraínagake anotah Wahnáh ánínka págegeue wahnahnína tanáhráq áhníbóránire. ²¹Are néne Wahnah míahno ue níáhrabira kewé kaweraritanauge ire úwe. (Joel 2.28-32)

²²Pítaga mó mahraréna, Ísara keo, mó ehwéh kawerue írátíáhro. Sísá Néhsara suwahpeqte ání éhweh teiúge. Wega Manikáne arambehri mirainkeheéna Manikánka Sísá omaq atowe. Minayabe tagariageheéna Manikánka págege ataráire. Págege ataráirana wega íre tagaríáh náneqkakákq págege arámbéhríákákq sokigi aitaráire. Itene iuranka tagahnsabé aiq ahtebahwe. ²³Naho Manikánka iwíáhue tagarionserah menah itega Sísá táhtoqme ahabábq ke móríátówara sega awankátáq táhpatowana putiaraire.

²⁴Sísá íre airaiq pusa ání míahrahurai puana Manikánka érorahirabeqte iriatena oganúq ataráire. ²⁵Naho naho Tébíti, Sísane aigaqnaga íre wewensabé irarena peh Sísansabé teiena,

Néne Wahnahnka ínéreq mía míaime tagaríoge. We néne niyah púpeq mía míai puana íre áhreúge. ²⁶Minayabe nirupipeq eyoyóire. Néne níwéhrate iwíáh íwíáh atóge. Íné pukonaraq arega oganúq intaniewóne íwíáhuge. ²⁷Íné pukonarabeq arega néniwa íre nuwankéhe. Peh oganúq intankéhe. Arene kaweq aniné ninonka íre karekinawire. ²⁸Arega oga mía mía ahtápéq sokigi aníátóne. Arereq mía míaúya puana nirupipeq eyoyóinawire úwe.
(*Buk Song 16.8-11*)

Mi ehwéhme Tébitiga teiuwe.

²⁹Pítaga mó mahraréna, Nánuwahraho, itene igaqna Tébiti éhweh pahsuqme teiníe. We naho putiowara maisarówana wene kárékú anónká amahnága maisia máiq mahtaq kéhre. Minayabe íre wewensabé iraréna peh Sísansabé irarúwe.

³⁰Tébitiwe Manikáne ehweh irarú ani ména Manikánka mirainauge ú ehweh írátíowe. Manikánka naho Tébiti teawena, Amahnága arega wahnahnónanserah mókake arenanahga wahnahninkehe. Peh aiq pútariahnsanuge únsabe ³¹Manikánka miraináú arámbéhríyábé Tébitiga ahtebówe. Ahtebéna we aiq tagariomé Manikánka ite meirena kaweraitankeheéna omaq ato aní oganúq atanawire. We pukirabeq íre auwanawire. Wene anonka íre karekinawire. Peh oganúq atanawire tagariowe úwe.

³²Pítaga mó mahraréna, Manikánka Sísá iriatena oganúq atowaq ite moke tagarawéq teiune. ³³Manikánka Sísá wene ayah púpeq atowana anotah Wahnáh aní míaraire. Míarairana Manikánka teawátáinserah Wenawa Sísaba eqmatairana Sísaga Manikáne Awa iteba eqmaréhre. Minayabe itega amahnága aiq tagaríáhwe. Itega íráh éhwéhme Manikáne Awanka iwíáh aitéh éhwéhne. ³⁴Tébiti pukútaq wene anonka íopeq íre kiuwe. Minayabe íre wewene anonkansabé peh Sísá íopeq kiunsabe irarúwe. Wega mahraréna,

Itene anotah Wahnáhnká néne Wahnahnsabé, Niyah púpeq kiwíáhno. ³⁵Mókake arene naruoakáq wahnahnarito ataníe irarire úwe.
(*Buk Song 110.1*)

³⁶Pítaga mó mahraréna, Ísara keo, ite ómi kawerue iragéhboq írátíáhro. Itega Sísá awankátaq táhpareq subiq sutowe. Manikánka mi anínsabé, Are ínéga omaq ató aní móné. Anotah Wahnáh aní míáhno atáráuge úwe.

Áhnite wehekéqká Manikánsabe aiq pútare atera wání meyo ehwehne.

³⁷Morábí kiranéhnuríoge kega írówana mi ehwéhmká sirupipeq pówe. Sirupipeq pówara sega Pítareq mó eqmaro kereqsabé kasenára, Iteruwahraho, aneq miraonehnikono ³⁸úwana Pítaga sensabé, Itene ahababáq kaqiuwankéhboq itene ahababáq sansa sueq Sísansabé áhraboro.

Sísansabé áhrabéq wání meyháero. Mirairataq Manikánka itene ahababáq kaweraitena Wenawa iteba eqmarankéhe. ³⁹Itereq itene animárínseq íre wahtopeqte kéreq ómi mirairataq Wenawa iteba eqmarankéhe. Maniká itene Wahnahnka ómi omaq sito kega mirairataq Manikánka Wenawa iteba eqmarankéhe úwe.

⁴⁰Pítaga mi keyábé áhnte mó págege ehwéh pahsuqme teriena, Manikánka kaweraitankéhboq mó kegá ahababárorabeq sueq kaweqtaq míáhro úwe. ⁴¹Áhnte író kega wene ehwehnsabé aiq pútare atówara wání meríúwe. Wání meríúwara mi wehekáh sega Pítarehba kobaritawe míówe. Peh íregáritaq wehekéq 3 táhúséni (3,000) wehekéqká kobaritawe míówe.

Peh morá íwíáhuríó ehwehne.

⁴²Seba méra Pítareq mó eqmaro kereqka síwáhnoru ehwéh irera peh morá íwíáhuwe. Peh morá íwíáhéra sene tópah mewe moráráq néra moráráq púreq aruqaruruwe. ⁴³Manikánka págege aritowara Pítarehga áhnte otáq sánsá mirauwe. Mirauwara moke tago kegá áhtenuwe. ⁴⁴Moke Sísansabé aiq pútare ató kega moráráq méra sene ménsámehnsánsabe peh morá íwíáhuríówe. ⁴⁵Sega sene ménsámehnsátate méyó moné mewera Sísá tagaríáh tábónáh ké náriúwe.

⁴⁶Mó wehekáh mó wehekáhnue sega Manikánsabe iwíáh iwíáh atáh náhtápéq séyéuwe. Séyéera pokue sene nahmarítápéq táhutahuq moráráq naruq naruruwe. Sirupipeq eyoyóúwara táhutahuq moráráq naruq naruruwe. ⁴⁷Sega Manikánsabe iwíáh iwíáhuwara moke tago kegá iwíáhéra, Kaweq kee uwe. Mó wehekáh mó wehekáhnue áhnte mó kegá Sísansabé aiq pútare atówe. Ai q pútare atówana Manikánka se kaweraritowara Sísansabé aiq pútare ató ke áhnte aguwe.

Soriqnah ani kawerato ehwehne.

3 ¹Tunsorerutaq Asiu kegá púreq aruqarurotaq Pítareq Sónireq Manikánsabe iwíáh iwíáh atáh náhtápéq seyeherauye. ²Mi nah méhpeh áwíq Kaweq Mehpéhne. Mitaq soriqnah ani tútuue míówe. Wenanoga maqmarotaq soriqnah ani maqmarowe. Mó wehekáh mó wehekáhnue wene iyahnabo anímárínká meqmera mi mehpéh móata móatauwe. Nahupeq kúra keyábé ineh inehinkeheéra meqmera móátówe. ³Wega Pítareq Sónireq nahupeq kibekoyehera uyataq tagéna, Náníétao úwe.

⁴Náníétao úwana Pítaga we ebitáwéna wensabé, Ite tagáhno úwe.

⁵Úwana wega se tagéna iwíáhéna, Aneqpopoq nánigéhe iwíáhuwe.

⁶Iwíáhúwana Pítaga wensabé, Íné íre móneakák ání múge. Mirainieu naneq teawiníe. Néhsara suwahpeqte ání Sísá Karáhé áwírue teawúge.

⁷Miraréna wene púpeqte áyáhnkárátáq táhtoqme

iriatowe. Iriatowana wene aiaurankakaq aigaránkákákáq apubúue págege agúwe.

⁸Págege agúwana mi anínká suansúá keirigue nogena nahupeq kierirowe. Kierirena wega nogena ahkuagu ahkuaguéna Manikánsabe iwíáh iwíáh atowe. ⁹Manikánsabe iwíáh iwíáh atowara ómi nahupeq mío kega we tagéra, ¹⁰we Kaweq Mehpéhtáq tútuue ineh inehéwéh ání míre uwe. Wene aigará kaweragúnsabe, Éhneh. Aiq kaweragire éra áhtenuwe.

Pítaga mitaq mío ke teriu ehwehne.

¹¹Kaweragú aninká Pítareq Sónireq táhtorowara ómi tago kegá áhtenéra pehbeheráh seba suwe. Anotah wahnáh wenáwíq Sórómóni Asiu kené wahnah míotaq pearó owewéhpéhtápéq suwe. ¹²Suwana Pítaga tagéna sensabé, Ísara keo, we kaweraginsabé aneqsabé áhtenoo? Itewe aneqsabé ebitiaho? Ite págege anité méta kaweratehye iwíáho? Manikánka itensabé, Kaweq anité wóye aitéhnsábé kaweratehye iwíáho? Írakaumo. Íre itegae.

¹³Manikámé we Ébárahmareh Áhísáhkireh Sékópáreh itene igaqnaréhne Maniká ména wewega mah aní kaweratéhre. Áhnte kegá wene arambehri awahbeh ani Sísawe, Anotah aní míéhre atagehéna kaweratéhre. Sísá marakóipeq mívaraitaq sega we subigeheéq itega táhtoqme naruo kebá meqmeq móátárówe. Wahnah aní wenáwíq Páhírátiga, Sísá íre ahababáq ani púana pugeq auwaníe iwíáhurairaq itega ahqáho atárówe. ¹⁴Manikánsabe arutaboiri anímé kaweqtaq mía míaurai anímé itega ahqáho atárówe. Peh mó ke subiq sutai aní pugeqio urowe. ¹⁵Oganúq itahráhi aní subiq sutowe. Itega Sísá subiq sutowana Manikánka iriatáráire. Minayabe Sónireq ínereqka itene iuranka tagéta teiuye.

¹⁶Sísansabé aiq pútare ateta wenáwírue áhrabúya puana wega mi aní kaweratéhre. We awaho ani míéhraq tagahwe. Sísansabé aiq pútare atoyanka mi aní kaweratéhraq tagahwe úwe.

¹⁷Pítaga mó mahraréna, Nánuwahraho, itereq itene wahnahmarínseqka Sísá subiq sutotaq we Manikáne ahninkáwá míéhnsábé itega íre ahtebarowe. Íre ahtebéq pehipi subiq sutowe. Minayabe aiq tagaríoge. ¹⁸Manikánka wene ehweh iraru ke iwíáh aritowara ómiga mahraréra, Manikánka omaq ato anínká pukina ínaraq anotah érinawire uwe.

(Aisaia 50.6, 53.5)

¹⁹Minayabe Manikánka itene ahababáq kaqiuwankéhboq itene ahababáq sansa sueq wensabé áhraboro. ²⁰Mirairataq Manikánka itene irupipeq eyoyó aitankéhe. Sísá Karáhé itene Wahnah míankehéna Manikánka omaq atowe. ²¹Amahnága Sísá íópeq mía míaire. Manikánka wene ehweh iraru ke iwíáh aritowara naho mahraréra, Mókake Manikánka moke kawerinkehe uwe. Amahnága Sísá íópeq ména mi tanáhráqsábé áwénunire.

²²Mósísiga itene igaqnansabe naho mahraréna,
 Maniká itene Wahnahmka wene ehweh irarinkeheéna itereq
 mionarabeqte ání eqmarankéhe. Ínéga mirauraunserah
 eqmarahna anínká mirainkehe. We sínaraq irarína ehwéh moke
 kawerue íráhro. ²³Wega irarína ehwéh íre íréhra kewé pukigehe.
 Manikáne animárí míéhrarabeqte kaqsuahnaq pukigehe úwe.

(Lo 18.15-19)

²⁴Manikáne ehweh irarú ani Sáh múériga Sísa tutai tanáhráqsábé
 irarúwe. Moke we anehe su anímárí, Manikáne ehweh iraru
 anímárinseqka moq amahnága tánáhráq, Sísa tutai tanáhráqsábé
 iraruwe. ²⁵Manikáne ehweh iraru kewé itene igaqnaréh wóe. Íre peh
 morá itene igaqnaréhyabe iraruwe. Moke itensabéákq iraruwe.

Manikánka itene igaqna Ébárahmansabé naho teawena, Arenahninká
 mah marákó márákóipéq mó kahnáh mó kahnáhnue kaweraritankéhe
 teawuwe éna ²⁶Manikánka wenahni wene arambehri awahbeh aní
 iriatena ebeq ite Asiu keba eqmataire. Itene ahbabáq kaqiuwankeheéna
 wenahni eqmataire úwe.

Pítararé karábúsiipéq mórító ehwehne.

4 ¹Pítareq Sónireqka Manikánsabe iwíáh íwíáh atáh náhúpéq mío
 keyabé síwáhnoruye. Síwáhnoruyataq Manikáne ehweh mibeq
 mahbeq arítáh kéreq Manikánsabe iwíáh íwíáh atáh náhtápéqté wáhnáh
 párisíreq Sáyúsi kéreqka suwe. ²Pítararéga síwáhnoréra, Sísa oga
 úkurainsabé mókake pukira ke mó oga úkoneherawoe uyara mina su
 kegá írówe.

Irera sene ehwehnsabé anotah abíahnsánéra ³Pítararébá sure táhtoqme
 meriqmera karábúsiipéq mórítówe. Íó tupekútaq puara ahbiahipeq
 kotiigeheéra mórítówe. ⁴Mi wehékáh áhnte író kega Sísansabé aiq pútare
 atówe. Peh íregáritaq wéh ⁵táhúséni (5,000) wehgá aiq pútare atówe.

Sega Pítararéyábé ehweh arító ehwehne.

⁵Ahbiahipeq Asiu wahnáh kéreq Asiu kené aboawah wehreq
 Mósísine ehweh síwáhnoru kereq Sarúsarama suwahpeq sáhuriówe.
⁶Sáhuriówana Manikáne ehweh mibeq mahbeq arítáh kéné wahnah
 wenáwíq Ánása míowe. Ánása wenawahrah sensíwíq Káiyápásareh
 Sónireh Árékásántareh mó wenáwáhráhrefka moráráq sáhuriówe.
⁷Mitaq sáhurawéra, Meriqme sero uwana Pítareq Sónireq meriqmera
 seba mórítówe. Mórítowara mipi sáhurió kega kasenéra, Insega págege
 aitáráiraq mi soríqnáh ání kaweratároyo? Inse áwírue kaweratároyo uwe.

⁸Uwana Manikáne Awanka Píta págege atena iwíáh atowana Píta
 sensabé, Wahnah kereq aboawah wehrero, Írátíáhro. ⁹Soríqnah ani
 séhréh atáráuyansabé inse áwírue kaweratároyo kasenoo? ¹⁰Itereq moke

Ísara kereq iragéhboq írátíáhro. Itega Sísá Karáhé Néhsara suwahpeqte áni awankátaq táhpatowana putiaraire. Putiarairana Manikánka iriwe oganúq atáráire. Sísá Karáhé págege aní míéh púana wénáwíq áhraburauyansabé soriqnah ani kaweratáráire. Kaweratáráirana ite míáhrabeq we amahnága awaho ani míéhre.

¹¹Nah pearáh kégá wahq awanká tagéra, Iroke awankáne éra sutowana anehe mi wahq anotah kawéq wáhq úkire.^d

(Buk Song 118.22, Aisaia 28.16)

Mina inserah itega Sísansabé ahqáho atárówana we anotah Wahnáh aní úkuraire. ¹²Peh morá Sísaga webataq itene ahbabáq kaweritahráhire. Peh morá Sísá áwírue ahrabo ke wega kaweritankéhe. Mah marákó márakóipéqmé mó morá áninká itene ahbabáq íre kaweritahráhire úwe.

¹³Pítareq Sónireqka míó keyabé íre áhreja ehweh pahsúoyansabé wahnah kereq aboawah wehreqka író kega áhtenuwe. Áhtenéra iwíáhéra, Se íre sigaruuroya anité peh wahba arámbéhríráte ánité wóye íwíáhuwe. Iwíáhéra, Sewe Sísá kétóya anité wóye uwe. ¹⁴Wene aigará kawerato aninká Pítararéba míowara tagéra mó ehwéh mi tanáhráq íre irarerahuwe.

¹⁵Íre irarerahunsabe wahnah kereq aboawah wehreqka Pítararé kaunsíri kégá momiwúrabeqte máhpeq sítera sío síouwe. ¹⁶Síó síóéra, Mi anité aneraruanéhnkono? Segá ótaq sansá aiq pútaq mirauroyara moke Sarúsarama suwahpeqte kégá tagaríáhwe. Segá kaweratóya ehwéh itega íre epéq suahráhuwe.

¹⁷Mi ehwéh abae agínehboq págegeue ehiya míáhtao aritanéhe. Mó ke Sísá áwírue síwáhnoriyeho ue terianéhe uwe. ¹⁸Terianeheéra Pítararé síáhrabéra sensabé, Sísá áwírue mónkakáq síwáhnoréta teríyehboq túbáh agotao ue teríúwe.

¹⁹Teríúwara Pítareq Sónireqka sensabé, Manikáne ehweh sueta itene ehweh íréhyataq Manikánka itensabé kaweróye aitankéhbo? Írakaumo. Minayabe iteitega iwíáhue tagahro. ²⁰Itega tagéta írátáuya ehwéh íre ehiya míahrahúye. Peh teri terinoyehetauye uye.

²¹Soriqnah ani kaweratonsabe ómi kégá Manikánsabe iwíáh íwíáh atówe. Minayabe wahnah kégá iwíáhéra, Mó kégá itensabé sibiahnsa aitehboq Pítararé pehragaritanéhe uwe. Segá Pítararéyábé, Subónehboq Sísane ehweh mónkakáq íre teríétao éra kaqsúowe. ²²Kaweragú aní 40 opéq peh soriqnah ani míowe.

Sísá éhweh terigeheéra págege aito ue púreru ehwéhne.

²³Kaqsúowara Pítararéga sensuwahrahba pokuye. Pokéra Manikáne ehweh mibeq mahbeq arítáh kéné wahnahnseq Asiu kené aboawah

^d 4.11 Mátíyu 21.42 aigarápéqte éhwéh tagáhnno.

wehreqne ehweh teríuye. ²⁴Teríuyara irera Manikánsabe moraráq púreréra mahraréra, Itene anotah Wahnáhno, arega íopeqkákák mah marákó márakóákák sóreq wanínkákák miraróne. Moke mahnana kéh náneqkákák miraróne. ²⁵Arene arambehriú ani, itene igaqna Tébiti Arenawanka iwíáh atowana sehiranue mahraréna,

Nahnso kewé aneqsabé anotah abíáhnsánoo? Aneqsabé ehweh pehipi moraenoo? ²⁶Mah marákó márakóípéqté wáhnáhmárinseq anotah anímárinseq ebhoneheéra sokah sokahowe. Manikánseq wega wehuke merinkeheéna omaq ato anínseqsabé kotioneheéra morábí sáhuriáhwe úwe éra púreruwe. *(Buk Song 2.1-2)*

²⁷Sega mó púreréra, Tébitiga naho sehiranúme amahnága iteruwahpeq Sísa suboneheéra sorupariarowe. Kaweq arénáhní arega eqmarahna aní Sísa suboneheéra sorupariarowe. Érótireq Póntíása Páhirátireq wáhnaupeqté kéreq Ísara kereqka Sísa suboneheéra sorupariarowe.

²⁸Arega naho págege iwíáhue miraóna iwíáh anehe kaqme mirauowe. Arerega mina íwíáhóna puara sega menah mirauowe.

²⁹Anotah aníno, amahnága sega itensabé, Subónehboq túbáh agotao eme aiq irahne. Itene arene arambehriúna anímári múne. Minayabe ite íre áhreia peh arene ehweh págegeue irarenehboq séhréh aito. ³⁰Arene ehweh irarenaraq awahre ke kaweragigehboq arene ayahtate táhtoro. Sísa arene arambehriyabé awahbeh aní áwirue áhrabonaraq ótaq sansámári miraúno éra púreruwe.

³¹Púreruwana momiwí nah mú múuúwana Manikáne Awanka sene sirupipeq tunse séhréh arito puara moke sega íre áhreia Manikáne ehweh págegeue iraruwe.

Ménsámehnsá morábí matawéra tabonah ke náríu ehwehne.

³²Moke Sísansabé aiq pútare atáh kégá peh morá iwíáhéra sene ménsámehnsá morábí matiówé. Mahna peh morá néne wíre íre iraria peh morábí matiówé.

³³Eqmaro kega Sísa oga úkú ehweh anotah pagégéue irare irareuwana Manikánka séhréh aritowe. ³⁴Sísa tagariáh kébáté mó morá tabonah ani íre míowe. Sega iwíáhutaq sene ménsámehnsá paimaq paiqmaréra meyo moné mewera ³⁵eqmaro ke náríúwara eqmaro kega tabonah ke saraqme náríúwe. Minayabe tabonah ke íre míowe.

³⁶Wehukení wenáwíq Sósépa míowara eqmaro kega mó awíq Páhnábásae átówe. Mi awíq Páhnábásawe áwahewé séhréhi aníne awíq míre. We Sáipára marákórápéqté anínéna Áríwái káhnáh aníne. ³⁷Wene marakó peh ákáhtaq éberiopeq paiqmarena meyo moné mewe eqmaro ke siuwe. Sega tabonah ke saraq miageheéna Páhnábásaga siuwe.

Ánáníásireq wene ahrereqka Manikáne Awa áhwárawe tagoya ehwéhne.

5 ¹Mó akéqká iwíáhue mó sansánuye. Wehukení wenáwíq Ánáníási wene ahre áwíq Sapairae. Sene marakó peh ákáhtaq éberiopeq

paiqmarera móne meyoýe. ²Ánáníásiga mi moné saime ebeqtaq kopéqmarowana wene ahrega tagówe. Tagówana wega mó akáhtaq mewe eqmaro keyabé péhenu peh ákáhtaq moné náriuwe. ³Náriuwana Pítaga wensabé, Ánáníásio, owainawanka iwíáh atéhrah aneqsabé mira iwíáhhono? Arene marakó paiqmarahna moné ákáhtaq kopéqsuahnayabé Manikáne Awansabé péhe éhwéh teawene. ⁴Arene marakó íre paiqmarahnaq tahírí peh arerene kagai iripo? Arene marakórate paiqmatona moné peh arerene matiarona wino. Arega, Móne ákáhtaq kopéqsue péhe éhwéh teriníe iwíáhhóna wino. Arene arupipeq aneqsabé ahbabáq iwíáhhono? Íre peh wehukeyabé Manikánsabe moq péhe éhwéh teawene úwe.

⁵Úwana Ánáníásiga mi ehwéh irena aunúnkaq márunsurahue putiowe. Putionsabe író kega anotah ahténéra áhre aguwe. ⁶Mibeqté máhbígáúnká séra pukú aniné anonka ambantataté úbíqme sehgiwera mómaisarówe.

⁷Ánáhkawagá wenawehq putíéhre u ehwéh íre irena apahtáro áhwáh sótaikúwana suwana ⁸Pítaga wensabé, Marakó paiqmarehyame mahraue moné meyeýo úwana kowe miraue meyoýe úwe. ⁹Úwana Pítaga wensabé, Itega iwíáhétawe Manikáne Awa áhwárawe tagayehe iwíáhhewoyo? Arenawehq maisaráh máhbígáúnká amahnága kouwekue méhpehnsah seuríáhwe. Segá arenkakáq sehgiwera pokigehe úwe.

¹⁰Sehgiwera pokigehe útaq mi iní aunúnkaq Pítane aigárátáq márunsurahue putiowe. Putiowara mahbigaunká nahupeq kire putio iní tagéra sehgiwera awehkawa maisarórabeq mómaisarówe. ¹¹Moke Sísá tagaríáh kéreq mó kereqka putíóya ehwéh irera anotah ahténéra áhreuwe.

Ótaq sansámárínunsabe éhwéhne.

¹²Eqmaro kega wehuke míópi áhnte otáq sánsámárí mirauwe. Asiu kené wahnah aní Sórómóni míotaq pearó oewéhpéhpéq Sísá tagaríáh kéga mitaq sáhuria uriauwe. ¹³Sáhuríówara mó kéga iwíáhhéra, Sísá tagaríáh kéwé peh kaweqtaq míáh ké wíre iwíáhhéra áhtenéra mibeq seba íre suwe. ¹⁴Áhnte weh áhrégá mó wehekáh mó wehekáhnue Sísansabé aiq pútare atera mó Sísá tagaríáh kébá sáharuqaruowe.

¹⁵Eqmaro kega áhnte otáq sánsá miraunsabé awahre kéga iwíáhhéra, Pítane mánkánahnka iteba sótaikínaraq itene awahre kaweraginkehe iwíáhuwe. Mira iwíáhhunsabé sene iyahnaboga meriqmera ahtapeq máhriqtaq mórítówe. ¹⁶Sarúsarama suwahpeq wahtote kereqka awahre kereq owainawanka síwíoqno kereq meriqmera mórítówara moke kaweragúwe.

Íopeqté ánínká karábúsiipéq míó ke máhpeq sito ehwehne.

¹⁷Manikáne ehweh mibeq mahbeq arítáh kéné wahnahnseq wereq míó ke, Sáyúsi kereqka iwíáhhéra, Ótaq sansá mirao kéga ite kiotaikiyehboq

aneraritanéhnkono uwe. Aneraritanéhnkono éra eqmaro keyabé anotah abíáhnsánéra ¹⁸se táhtoqme wahba karábúsiípéq mórítówe.

¹⁹Inokáhpeq Maniká míéhrebeqte íópeqté ánínká karábúsiípéqté ónsá siwe eqmaro ke máhpeq sitowe. ²⁰Máhpeq sitena sensabé, Manikánsabe iwíáh íwíáh atáh náhtápéq kowéq moke náneqmarí oga mía mía ehwéh koreriéro úwe. ²¹Úwara sega ahbiahíperura pokue íópeqté ánínká inokáhpeq koreriéro aritonserah Manikánsabe iwíáh íwíáh atáh náhtápéq kosíwáhnoruwe.

Kosíwáhnoruwara Manikáne ehweh mibeq mahbeq arítáh kéné wahnahnseq wereq míó kereqka Asiu kené aboawah wehreq mó kaunsírí kéreqsabé síáhribuwe. Síáhribuwara sure morábí méra párisiwarínsabé, Karábúsiípéq mórítáráu ke koweriráhro uwe. ²²Uwara párisiwarínká pokue karábúsiípéq koragowara eqmaro ke íre míówe. Íre míówara kouwekue sene wahnahnsabé, ²³Itega tagónawe karábúsiípéqté ónsá paisa tagóne. Karábúsiípéqté wáhnáhmárínká onsarapéq máhpeq iriwe wahnahnatíáhwaq tagóne. Sega wahnahnatíáhwaq onsa siunaraq kabarúna ke íre míáhwe uwe.

²⁴Uwara Manikánsabe iwíáh íwíáh atáh náhtápéqté párisiwaríné wahnahnseq Manikáne ehweh mibeq mahbeq arítáh kéné wahnahmarínseqka mi ehwéh irera áhtená, Árahiro? Se eheragowamo íwíáhuwe.

²⁵Se eheragowamo íwíáhuwana sú aninká sensabé, Itega karábúsiípéq sítáro kegá Manikánsabe iwíáh íwíáh atáh náhtápéq amahnága iriwe síwáhnorowe teriwe. ²⁶Teriuwara Manikánsabe iwíáh íwíáh atáh náhtápéqté párisiwarínseq sene wahnahnseqka pokue Pítareh kowerirera áhreéra, Mó kegá ebahtaté subíyeho éra pehwehruwe kowerirówe.

Pítarehga sene ehweh ayahqme teríú ehwehne.

²⁷Koweriqmera kaunsírí kebá mórítówe. Mórítówana Manikáne ehweh mibeq mahbeq arítáh kéné wahnahnka Pítarehyabe ehweh aritowe. ²⁸Ehweh aritena, Sípane ehweh mónkakáq síwáhnoriyeho teiátáu mino. Teiátáume íre ireq síwáhnoronsabé áhnte Sarúsarama suwahpeqte kegá Sípane ehweh íráhwe. Itega Sípa subitáúna ehwéh aneqsabé teri terinoo úwe.

²⁹Aneqsabé teri terinoo úwara Pítarehga mahraréra, Manikáne ehweh anterúéhnehboq wehukene ehwehme árahue iranéhnkono? ³⁰Itega Sípa awankátaq táhpareq subiq sutowe. Subiq sutowana itereq itene igaqnaréhne Manikánka iriatena oganúq atáráire.

³¹Oganúq atena wensabé, Niyah púpeq míahno atena wehuke kawerarito urairana Sípa mitaq ména ite Ísara ke kaweraitéh ání míéhre. Itene ahbabáq súéhrataq wega kaweraitankéhe. ³²Manikánka miraurai naneq tagarionayabé teiune. Íre itebataq teiasa Manikáne Awanka mó teíre. Manikáne sansá mirao kebá Wenawa eqmaréhre uwe.

Pítarehyabe pehragarítáħro ú ehwehne.

³³Uwara anotah Asíú wéħwárínká Pítarehne ehweh irera sensabé anotah abíáħnsánéra, Subiq suanehe íwíáħuwe. ³⁴Iwíáħuwana mibeqté káúnsírí ání wenáwíq Kámáría we Péħrasi aní míowe. We Mósísiga sehǵíóro ú ehweh síwáħnorú ani míowara mó kegá, We ahtebia ání míre íwíáħuwe. Wega iriwe ména, Mi ke wéħuwa máħpeq sito úwara máħpeq sítówe. ³⁵Máħpeq sítówana wega momiwíu keyábé, Ísara keo, mi kegá miraira naneq irareneheqmé kawerue iwíáħ atawéq irarerero.

³⁶Menah wehukení wenáwíq Téúrása ména, Íné anotah aní múge urairara áħnte wehuké 400 wehuké we kétówe. Kétówara mó kegá we subiq sutowara we kété kega wene arambehri auwera abae ague sene nahtapeq sáħ poké agurowe. Poké agurowana wene arambehri parabaguraire. ³⁷We subiq sutowara anehe Kehrari marákórápéqté ání wenáwíq Súrása míaraire. Wahnah kegá wehuke síwíq merotaq mi tanáħráq Súrásareq we kété kereqka kámáħni wahnáħ ké subiq suanehe éra ite kámáħni wahnáħ ké míaneheqmúne urowara kámáħni wahnáħ kéǵá Súrása subiq sutowana pukuraire. Pukurairara we kété kegá moq abae ague sene nahtapeq sáħ poké agurowe.

³⁸Minayabe teiníboq írátíáħro. Pehwehrué míáħro. Máħpeq míáħ ké pehragarítáħro. Mi ehwéħ peħ seyene iwíáħwé pehipi túbáħ agoneherawoe. ³⁹Manikánka sene sirupipeq mi iwíáħ arítéħmé itega íre ahqáħo aritahráħúne. Manikánka itene naruo aní úkínehboq peħwehrué míáħro úwe.

⁴⁰Úwara momiwíu kegá Kámáríane ehweh irera Pítareh síáħrabuwara suwe. Suwara sega subiqmaro atowara wiaħnó karatáté subiqmarowara, Sísane ehweh mónkakáq síwáħnoriyeho teriera kaqsúówe. ⁴¹Kaqsúówara Pítareħga kaúnsírí ke suera máħpeq pokuwe. Sísane arambehri miraunsabé wahnah kegá subiqmáró púara sene sirupipeq eyoyóuwara pokuwe. ⁴²Sega mó wehekáħ mó wehekáħnue Manikánsabe iwíáħ íwíáħ atáħ náhtápéqkákáq wehukene nahtapeqkákáq mahrarue síwáħnoréra, Manikánka eqmaraníé ú aní, ite kaweraitahráħi anímé we Sísá wire ue síwáħno aruqaruruwe.

Sítíbénireh omaq sitó ehwehne.

6 ¹Mi tanáħráq Sísansabé aiq pútare ató ke áħnte úkuwe. Káríki ehwéħ iraru Asiu kegá peħ morá Asiu kené ehweh író keyabé abiaħnsanuwe. Abiaħnsanéra ehmuníq éħmúníréra, Wahnah kegá táħutahuq mó wehekáħ mó wehekáħnue saraqmaráħtáq peħ morá Asiu kené ehweh író kene kéweinínsó áħnte náriera itene kéweinínsó peħǵáriq nári nárinowe uwe.

²Úwara mi airápété téħraníté eqmaro kega mó Sísá tagaríáħ keyábé momiwíoneheqmúne ue síáħrabuwara suwe. Suwara sensabé, Táħutahuq

kawerue sararaneheeq ite Manikáne ehweh síwáhnoré arámbéhrí suewé anotah íre kawerire. ³Minayabe íráhro. Iteruwahraho, mi arámbéhrí miraigehboq itega ite mionarabeqte abapete téhraníté omaq sítáhro. Mó kegá, Kaweqtaq mía míowe e ke omaq sítáhro. Manikáne Awanka sereq mía míai ke méra kaweq iwíáho ke omaq sítáhro. ⁴Ite eqmaq íuwátái kegá peh púrerue Manikáne ehweh íwáhnoroneheqmúne uwe.

⁵Uwara moke író kega, Mi ehwéhmé kaweq ehwéhne íwíáhéra wehukení wenáwíq Sítíbéní omaq atówe. Sítíbéniga Sísansabé kawerue aiq pútare ato aní míowana Manikáne Awanka wene arupipeq mía míaéna séhréh atowe. Mó ke sensíwíq Pírípi, Pókóra, Níkánóri, Tímóni, Páménása, Níkóra miraue omaq sitowe. Níkórawe we Ántióka suwahpeqte áníne. Téhwe we wáhnaupéqté ání ména anehemé we Asiu kené sánsá miraúwe. ⁶Mi ke omaq sitera eqmaro kene siuranabiahtapec mórítówe. Mórítówara táhutahuq saraqme arámbéhrí miraigehéera eqmaro kega siyahnkaratáté táhtoqme púrerarítówe.

⁷Manikáne ehweh áhnte síwáhnoru puara Sarúsarama suwahpeq íregárita q kegá irera Sísansabé aiq pútare atówe. Áhnte Manikáne ehweh mibeq mahbeq arítáh kéreqka mi ehwéh irera Sísansabé aiq pútare atówana Manikáne ehweh nka abae agúwe.

Sítíbéninsabé ehweh ató ehwehne.

⁸Manikánka Sítíbéní séhréh atena págege ato púana wehuke míorabeq anotah otáq sánsámárí miraúwe. ⁹Miraúwara Sáíríni suwahpeqte Asiu kereq Árékásántaría suwahpeqte Asiu kereqka Sarúsarama suwahpeq momiwúwe. Sene momiwí nahtápéqsábé Pugeq Súo Kene Nahne ue áwíratówe. Mi kereq Sírísía marákórápéqté kéreq Esia marákórápéqté kéreqka Sítíbéniba pokue ehwehuwe.

¹⁰Ehwehuwana Manikáne Awanka Sítíbéní págege ato púana wega ahtebia éhwéh irarúnsabe mi kegá íre ehweh atahráhuwe. ¹¹Íre ehweh atahráhunsabé sega mó keyábé epéráhpérera, Sítíbéní péhe éhwéh átéhrataq móne náienéhe. Péhe éhwéh mahrarero. Sítíbéniga Mósísireq Manikánsesqabé síéhruru arítaráiraq írátáune ero uwara sega móne mewera mi pehe éhwéh teriúwe. ¹²Mi pehe éhwéh teriúnsabe író kereq Asiu kené aboawah wehreq Asiu kené sánsá síwáhnoru kereqne sirupipeq págegeue abiahsanuwe. Sega Sítíbéniba pokue táhtoqme kaunsíri kebá móátówe.

¹³Móatera péhe kegá mahraréra, Mi anínká Manikánsabe iwíáh íwíáh atáh náhtápéqkákáq Mósísine sánsánkákáqsábé abehq éhwéhne arítáaire. ¹⁴Sísa Néhsara suwahpeqte anínká Manikánsabe iwíáh íwíáh atáh náh sokoruankéhe uraire. Mósísiga teiu sansamé Sísaga sabi iuanie urairaq írátáune uwe. ¹⁵Uwara moke kaunsíri ke tútuue méra Sítíbéní tagowana wene aru ukiqme míonsabe wene auranabiah íopeqté áníné auranabiah tahnsa ágúwe.

Sítíbéniga teriu ehwéhne.

7 ¹Manikáne ehweh mibeq mahbeq arító kene wahnahnka Sítíbéninsabé kasenána, Segá irare ehwéhme aiq pútaqpo úwe. ²Úwana Sítíbéniga mahraréna, Nánuwahraho, kawerue írátíáhro. Naho naho itene igaqna Ébárahmaga Áráni suwahpeq íre pokútaq Mésópótémía marákórápéq míowana Maniká anotah pagégé ánínká íópeq auwena Ébárahmaba séna ³wensabé ehweh teawena, Arene marakówe arenawahrahe sue teawéna marakórápéq pokúno teawuwe.

⁴Teawuwana Ébárahmaga Káría kené marakórapeq suena pokue Áráni suwahpeq kowíowana mitaq wenabo pukúwe. Pukúwana Manikánka ite amahnága míona marákórápéq Ébárahma eqmarowe. ⁵Eqmarowana súwana Manikánka Ébárahma mahtaqté márakó íre eqatowe. Pehgáriq marakó íre eqatasa peh teawena, Mókake arereq arenanahréhre q iníe úwe. Mi ehwéh teawu tanahráq Ébárahma íre wenahninkákáq áni míowe.

⁶Manikánka we mó teawena, Arenanahréh mókake wáhnaupéqté kéné marakórapeq míagehe. Mi kegá arambehriraq saiqnaritera subiqmarera áhnte opéq 400 opéq síwíoqnagehe. ⁷Síwíoqnehra ke kamah arinauge. Kamah ariénaraq arenanahréhga mitaq suera mahtaqté márakóráq ínénsabe iwíáh iwíáh aintagéhe teawuwe.

⁸Teawu ehwéh ahreraq kankeheéna Manikánka Ébárahmansabé, Áú amurúrué sansa miraúno úwe. Úwana Ébárahmaga animai wenáwíq Áhísáhki maqatowana abapete apahtáro wéhékáh ména wenahniné áú amurú auwowe. Áhísáhki weh úkéna animai wenáwíq Sékópa maqatowe. Maqatowana Sékópaga airápété téhtaré anímái masitowara wene ahninkáwáreh itene igaqnaréh úkuwe úwe.

⁹Sítíbéniga mó mahraréna, Sékópane ahninkáwáreh airápété téhraníte méra se ábárahnahahnka sensíbáq Sósépa abiahnsanéra wáhnaupéqté ké eqsitera móne meyówe. Wáhnaupéqté kégá Sósépa meqmera Ísípi marákórápéq móátówana Manikánka wereq mía míaéna ¹⁰mó kegá we íre kawerató tanahráq séhréh atowe. Ísípi marákórápéqté wáhnáhnká Sósépa áhrabútaq Manikánka kaweq iwíáh atowana Sósépaga ahtebia éhwéh irarúwe. Ahtebia éhwéh irarúwana Ísípi wahnáhnká, Mah anímé kaweq iwíáhíre éna Sósépansabé, Arega moke Ísípi marakóákáq néne nahtapeqté ménsáméhnshnkákáq wahnahnúno atowe.

¹¹Mi tanahráq Ísípi marákórápéqkákáq Kénáni marakórápéqkákáq anotah ehwéhrotaq áhnte kene sirupipeq umeh aguwara moq itene igaqnaréh táhutahuq íre kowe. ¹²Íre kowana Sékópaga Ísípi marákórápéq táhutahuq kéhre u ehwéh irena wenahnímáhq táhutahuq sabatáhq Ísípi marákórápéq téh eqmaq suowe. ¹³Eqmaq suowara Ísípi marákórápéq pokéra táhutahuq mewera sene nahtapeq kouwekuwe. Mi

tahutáhúq parabagúwara se Ísípi marákórápéq mó pokutaq Sósépa wenawahrehyabe, Íné iteríbáq múge ue pahsuqme teriuwe. Pahsuqme teriuwana Ísípi wahnáhnká moq Sósépane awahwáréh ahtebówe.

¹⁴Ahtebówana Sósépa wene awahwáréhyabe, Nánibo Sékópa meqmeq sero éna eqmaq suowe. Eqmaq suowara awahwáréhga sensibo koweqmera áhnte wehekéq 75 wehekéq weba suwe. ¹⁵Sékópaga Ísípi marákórápéq tuména mitaq pukúwara anehe itene igaqnaréh moq mibeq pukuwe. ¹⁶Ébáráhmaga naho maisaró marakó áwíq Sékéma ebah monéráté paiqmarowe. Ámórine ahninkáwáréhga, Maisia marakó meyo atówana paiqmarowe. Itene igaqnaréhga pukuwara sene animárínká sene ayahnsa mewera mina maisaró marakórápéq ónapipéq móarówe úwe.

¹⁷Sítíbéniga mó mahraréna, Itene igaqnaréhga Ísípi marákórápéq mía míaera peh íregáritaq aguwe. Manikánka Ébáráhmansabé marakó iníe teawu ehwéh áhníbórá miraináutaq itene igaqnaréhga íregáritaq aguwe.

(Stat 15.5, Buk Song 105.24)

¹⁸Íregáritaq aguwana Sósépa pukúwana Ísípi marákórápéq we íre tagario anínká wahnah aní úkúwe. ¹⁹Mi anínká wahnahnéna itene igaqnaréhyabe péhe aritena síwíoqnówe. Sene animárínká pukigeheéna wega sensabé, Ani maqmaréhrataq mewe máhpeq súáhro aritowe.

²⁰Mi tanáhráq wenanoga Mósísi maqmarowana Manikánka, Aiq kaweq aníne íwíáh atowe. Apahtáro ío sega wenabone nahtapeq kopípéq kirabo atówe. ²¹Apahtáro ío parabagútaq subíyeho éra máhpeq kopípéq áúwówe. Kopípéq áúwówana Ísípi marákórápéqté wahnáhné ayahunkawagá we tagéna, Kaweq aníne íwíáhéna meqmena wewene ani tahnsa kirabo atowe. ²²Kirabo atowara Ísípi kegá Mósísi áwáhnoruwana we moke Ísípi kené sánsá ahtebówe. Ahtebéna we págege ahtébiá aní úkéna wene ehwehnikakáq wene arambéhriakáq págegeue miraúwe úwe.

²³Sítíbéniga mó mahraréna, Mósísi 40 opéq ména, Nánuwahrah Ísara kebá koraganie íwíáhéna koragówe. ²⁴Peh morá Ísípi anínká Ísara aní subutaq Mósísiga tagéna wenawahrah aní éhnehéna mi Isípí aní subiq suowe. ²⁵Subiq suena iwíáhéna, Manikánka ínénsabe, Arenawahrah séhréh arito éna omaq intowe. Omaq intonsabé nánuwahrahga aiq tagaríáhwe íwíáhúwara wenawahrahga íre tagaríówe.

²⁶Mó wehekáh wenawahrah aníte tobehuyataq Mósísiga tagéna ayositanieéna sensabé, Ite morá káhnáh móye. Aneqsabé tobehoyo úwe. ²⁷Úwana ahbabárate aninká Mósísi pagunsuena wensabé, Insega wahnahnarito teawátáiro? ²⁸Inokáh Ísípi aní subiq sutonanserah iné moq nubiq suaníbo úwe. ²⁹Úwana Mósísiga mitaq suena pehbeheráh pokue wáhnaupeqté kéné marakó áwíq Míríána marákórápéq kowíowe. Nahnsa aní kowéna mibeqté áhré meywana téhtaré anímáírará maqmarowe úwe.

³⁰Sítíbéniga mó mahraréna, Mósísiga mitaq 40 opéq míowe. Sáwéh áwíq Sáínái wega mitaq wahtotaq abataq marákórápéq noguwe.

Mitaq noguwana káriq awánká irarówana íopeqté ánínká mi iráípeqté ábóraragúwe. ³¹Ábóraragúwana Mósísiga tagéna áhtenéna, Wahtotaq koraganie íwíáhéna sítaq Manikánka teawena, ³²Íné arene aigaqnaréhne Maniká múge. Íné Ébáráhmareh Áhísáhkireh Sékóparehne Maniká múge úwe. Úwana Mósísiga iransánéna áhreu púana aura íre pankeqme tagówe.

³³Íre pankeqme tagówana Manikánka wensabé, Íné míó púah arega órira marákórápéq iriwe míahne. Minayabe arene súu ugurúruqme pehipi iriwe míahno. ³⁴Ísípi marákórápéqté kégá Ísara ke néne animári síwíoqnahtaq tagaríóge. Segá uwo uwo aruqarurotaq íróge. Ínéga mibeqté meriqmena móbeq mórítanieéna tumíóge. Mósísio, are Ísípi marákórápéq eqmaróge. Pokúno teawuwe úwe.

³⁵Sítíbéniga mó mahraréna, Mósísi ítaq mahbí míotaq Ísara kegá wensabé ahqáho atera, Insega wahnahnarito teawátáiro uwe. Mína ahqáho ató ánímé Manikánka arenawahrah amahnága Ísípi marakórátq míówah kowahnahne meriqme mérito atena eqmarowe. Mósísi abatapi míowana káriq awánká irarowana íopeqté ánínká mi iráípeqté ábóraragútaq Manikánka Mósísi eqmarowe. ³⁶Eqmarowana Mósísiga Ísípi marákórápéq ótaq sansá miraéna mi marákó suena wání aroipéq áwíq Káhtore Waní ayehráq mórítowe. Mórítene mitaq mó otáq sánsá miraéna abatapi mórítene mitaq mó otáq sánsá miraúwara 40 opéq míówe.

³⁷Mósísiga Ísara keyábé, Manikánka ínénsabe, Néne ehweh korerio éna eqmaq nuwonserah mókake mó wene ehweh terí ání iteruwahrahní eqmarankéhe teniátáire úwe. ³⁸Mirarena mi tanáhráq Ísara ke abatapi míówana Mósísi seba míowana íopeqté ánínká Sáínái sawéhráq Mósísi ehweh teawuwe. Teawuwana Mósísiga itene igaqnaréh mi ogá mé ehweh teriúwe úwe.

³⁹Sítíbéniga mó mahraréna, Itene igaqnaréhga Mósísine ehweh anteruera wensabé íre iuwahbehre éra Ísípi marákórápéqsábé sirutaboiruwe. ⁴⁰Ísara kegá Mósísine awahwá Áróninsábé, Arenábáq Mósísi ite Ísípi marákórápéqté meitái aní aiq taqnobagire. We eheq míehrapómo. Ite ebeq itáh máníkámári míagehboq arene ayahnkaratáté maniká tahnsa náneqmarí miraúno uwe. ⁴¹Miraúno éra itene igaqnaréhga káho áráhq tahnsa náneq mirarówe. Mirarera minayabe titirarera sene siyahtate miraró naneqsabé iwíáh iwíáh atówe. ⁴²Iwíáh iwíáh atówana minayabe Manikánka se suowara sega íopeqté náneqmarínsábé iwíáh iwíáh atówe. Minayabe Manikáne ehweh irarú aninká naho sehiranúwana wene ehwehnka mahraréna,

Ísara keo, itega 40 opéq abatapi méq itega ménkámehnká subiqmareq titiruowe. Íre ínénsabe iwíáhéq subiqme titiraintárowe.

⁴³Péhepehe maniká Móríkine séiraté pearó wehuwéhú nahtapéq móateq mi nahnkákáq sehgieq poku pokuuowe. Itega wehyoq

tahnsá náneq mirareq wenáwíq Árépánie ateq itene manikáne atarówe. Iwíáh iwíáhoneheeq itega mi pehepéhé máníkámáří mirarurowe. Miraruronsabé Pábíróni marákórápéq seberaebéq eqmaq iuwanauge ire úwe. (Amos 5.25-27)

⁴⁴Sítíbéniga mó mahraréna, Itene igaqnaréhga abatapi míótaq Manikánka Mósísinsabé, Ínénsabe iwíáh iwíáh aintéhna séríraté wehuwehu nah mahraue pearo úwe. Manikánka Mósísi sokigiúnserah itene igaqnaréhga mirarówe. ⁴⁵Itene igaqnaréh pukuwara sene animárínká mi séríraté pearó wehuwéhú náh sehgiwera wehukení wenáwíq Sósúa kérowe.

Manikánka itene igaqnaréh séhréh aritena sene naruo kaqsuowe. Kaqsuowara itene igaqnaréhga sene naruone marakó meyówe. Mewera mi séríraté pearó wehuwéhú náh sehgiwera kowíówe. Mi nah áhnte opéq kagaúwana Tébtí Asiú kené wahnah úkéna ⁴⁶kaweqtaq mía míaúnsabe Manikánka wensabé arutaboírúwe. Arutaboírúwana Tébtíga iwíáhéna, Nígaqna Sékópane Maniká kaweq nahupéq míankehboq pearaníe iwíáhéna Manikánsabe, Arene nah pearaníe úwana Manikánka ahqáho atowe. ⁴⁷Ahqáho atowana wenahni Sórómóniga Manikáne nahtapeq pearowe.

⁴⁸Pearowana Manikánka anotah aní mía míai puana wega íre peh morá wehukega pearáh náhtápéq mía míaire. Minayabe wene ehweh irarú aninká mahraréna,

⁴⁹Itene Wahnahnka mahraréna, Íopeqmé néne wahnahnu síáh tahnsane. Mah marákó marákówé néne nigúnúbá tahnsane. Minayabe íné moke íopeqkákákq mah marákó marákóákákq wahnah wahnahnuge. Minayabe aneq nah peintánéhbo? Íné íre ahreno aní múge.

⁵⁰Ínébataq ínéga moke mah marákó marákórápéqté náneq miraráhwa mino ire úwe teriuwe. (Aisaia 66.1-2)

⁵¹Teriena Sítíbéniga mó mahraréna, Ite saiyoue píribahri ke wóe. Itene irupipeq íre irasa, ahre parosa ké wóe. Ite Manikáne Awansabé ahqáho atáh ké wóe. Itene igaqnaréhga miraunserah itega amahnága miraowe.

⁵²Itene igaqnaréhga Manikáne ehweh iraru ke moke síwíoqno mino. Íre áwíoqno aní insebo? Naho Manikáne ehweh iraru kegá mahraréna, Mókakewe kaweqtaq mía míai aní mahtaq tumíanawire uwara itene igaqnaréhga mina iraru ke subiq súówe. Sega miraunserah itega moq miraurowe. Kaweqtaq míéh aní tumíowaq itega táhtoqmeq móateq subiq sutowe. ⁵³Íopeqté kégá Manikánka sehgióro ú ehweh teiéwaq itega íre ireq mi ehwéh anteruq anteruro mino úwana wene ehweh aiq parabagúwe.

Sítíbéni subiq súo ehwehne.

⁵⁴Sítíbénine ehweh parabagúwara íro kega anotah abíáhnsánéra sirupipeq págege aguwe. Sega Sítíbéninsabé anotah abíáhnsá atówana

⁵⁵Manikáne Awanka wene arupipeq ména séhréhue págege atowe. Séhréhue págege atowana Sítíbéniga íópeq ebitáwéna Manikáne téhreh naneqkákáq tagówe. Sísawe Manikáne ayah púpeq iriwe míowana tagéna ⁵⁶mahraréna, Tagahro. Íópeq sawekirana wehukení úkurai anínká Manikáne ayah púpeq iriwe míéhra tagówe úwe.

⁵⁷Úwara sega kareéra ahre parotáwéra moráráq peheráh kure Sítíbéni táhtoqme ⁵⁸panantáwera ahnansahrapeq móatera sene káhq ambántámámi mitaq marówe. Mitaq marówana wehukení wenáwíq Soraga mi ambántámáritáq wahnahnúwara ebahnsa tuparuqme subiq súówe.

⁵⁹Sega ebahnsa tuparuqme subiq súótaq Sítíbéniga púrerue mahraréna, Sísao, are néne Wahnah mone. Néniwa meyo éna ⁶⁰arehunseraráq ména anotah ehwéhne púreréna, Néne Wahnahno, sene ahbabáqsabe íre ayahqmaro ue púreréna putiowe.

8

¹Putiowana Soraga iwíáhéna, We pukime aiq kawerire úwe.

Sorarehga Sísá tagaríáh ké síwíoqnowara pokue abae agu ehwéhne.

Mi wehekáh mó kegá Sarúsarama suwahpeq Sísá tagaríáh ké anotahtaq síwíoqnowe. Síwíoqnowara sega pokue Súría marákórápéqkákáq Sámária marákórápéqkákáq abae aguwe. Ómi Sísá tagaríáh kéga abae aguware peh morá Manikánka eqmaro kega Sarúsarama suwahpeq mitaq míówe. ²Táhmaro kaweq kegá Sítíbéni mómaisarera wensabé sirutaboirera anotahtaq ibisowe. ³Ibisowana Soraga Sísá tagaríáh ké anotahtaq síwíoqnéna mó nahtápéq mó nahtápérue kiena weh ahre táhtoqme panantáwena karábúsiipéq móritowe.

Pírípiga ótaq sansánú ehwehne.

⁴Abae agu kegá poku pokuurabeq Sísane ehweh teri terinuwé. ⁵Pírípiga Sámária ke suwahpeq mó anotah matábúrápéq tunse, Sísawe Manikánka omaq ato aní míre éna Sísá Karáhéne ehweh teriowe. ⁶Áhnte kegá wene ehweh irera ótaq sansámári tagéra wene ehweh kawerue írówe. ⁷Mi otáq sánsámé Pírípiga owainawamarí áhnte wehukéné sirupipeqté kaqsuowara íre kaweq karéaruera poké aguwe. Wega sinonka mareqmareragú kereq soriqnah kereq kaweraritowe. Minayabe ómiga tagéra wene ehweh kawerue írówe. ⁸Minayabe Sámária kené sirupipeq eyoyóúwe.

Ahgora anínká miraú ehwehne.

⁹Peh morá áhgórá aní wenáwíq Sáimóni mitaq míowara ómi Sámária kegá anotahtaq áhtenuwe. Sáimóniga menahmé págege sansánéna, Íné anotah aní múge iwíáhúwara ¹⁰ómi anotah kereq íre síwíqkakaq kéreqka wene ehweh kawerue irera wensabé, Maniká págege anínéna wega mi

aní págege atéhnsábé we anotah pagégé áníne atówe. ¹¹Mi ahgórá ánínká íre wahto tanáhráq ótaq sansá mira aruqaruru púara moke áhtenáre wene ehweh kawerue irera we kérowe.

¹²We kérowana Pírípiga Sísá Karáhé áwíqsabe teriena mó kawéq éhwéh Manikánka wahnah wahnahni éhwéh teriuwara weh ahrega mi éhwéhnsábé aiq pútare atówe. Aiq pútare atówana wání meriuwana ¹³mi ahgórá ání Sáimóniga moq aiq pútare atowana wání meawuwe. Pírípiga ótaq sansámári miraútaq Sáimóniga anotahtaq áhtenáre kérowe.

Manikáne Awanka Sámária kebá tu ehwehne.

¹⁴Sámária suwahpeqte kégá Manikáne ehwehnsabé aiq pútare atáhwe teríuwara Sarúsarama suwahpeq eqmaro kega írówe. Írótaq sega Pítareq Sónireq Sámária marákórápéq eqmaq súówe. ¹⁵Eqmaq súówara mitaq séra Manikáne Awanka mi kené sirupipeq tumíankeheéra siyahnkaratáté táhtoqme púreruye. ¹⁶Pítararéga íre suyataq mó kégá itene Wahnah Sísá áwírue wání meriútaq Manikáne Awanka sene sirupipeq íre tumíowe. ¹⁷Minayabe Pítararéga siyahnkaratáté táhtorera púreruyana Manikáne Awanka Sámária kené sirupipeq tumíowana ¹⁸Sáimóniga mina tagówe. Tagéna móne mewe séna Pítararéyábé, ¹⁹Niyahnkaratáté mó ke táhtoráhnaraqmé Manikáne Awanka sene sirupipeq tumíankehboq págege aintáhtao úwe.

²⁰Úwana Pítaga wensabé, Arene móneakákq arenkakákq toráh aginiewóne. Manikánka pehipi awina naneq íre paiqmarahráhone. Arega mira íwíáhóna puah iraipéq toráh aginiewóne. ²¹Itega miraúya arámbéhrí arereq wehgaqpo? Manikánka arene arupipeq tagaríehre. Arene arupipeq íre kaweq iwíáhóna puah arega itene arambehri íre miraorahóne. ²²Arene ahbabákq iwíáh sue mahraue púreré, Nirupipeqté áhbabákq iwíáh kawerainto úno. ²³Arene arupipeq tagome ahbabákq kírágírá atíehre úwe. ²⁴Úwana Sáimóniga Pítansabé, Arega iraréna éhwéh aiq pútaragínehboq púrerainto úwe.

²⁵Pítareq Sónireqka mi ke suwahpeq méra, Sísaga ite anotahtaq séhréh aitáraire éra Sísane ehweh teriuye. Teriera mitaq suera Sámária marákórápéq mó mapéq mó mapérué kaweq éhwéh teriera Sarúsarama suwahpeq kouwekuye.

Pírípiga Ítíópía marákórápéqté ánínsabé teawu ehwehne.

²⁶Manikáne íopeqté ánínká Pírípínsabé, Sokah sokahue Sarúsarama suwahpeqte Kása suwahpeq kuriéh áh abatapité áhtápéq pokúno úwe. ²⁷Pokúno úwana sokah sokahuena pokúwe. Pokéna mi ahtápéq kútaq Ítíópía aní tagówe. Naho mó kégá sene íre kaweq sansá miraéra mi Itíópía áníne awahnta pirúowe. Mi anímé Ítíópía marákórápéqté wáhnáh íní wenáwíq Kántásine móneraq wahnah wahnahnú aníne.

We Sarúsarama suwahpeq Manikánsabe iwíáh íwíáh atórabeq kéné kouwekúwe. ²⁸Kouwekéna we óseraréga sabirue nogí káhréipéq tútuue ména Manikáne ehweh irarú ani Áísáíaga sehiranaro ehwéh sáhnshuwe.

²⁹Sáhnshuwana Manikáne Awanka Pírípínsabé, Mi aniné káhreraq wahtotaq kowíahno úwe. ³⁰Úwana Pírípiga pehbeheráh weba kútaq Áísáíaga sehiranú ehwéh sáhnshuwana irowe. Irena wega kasenéna, Arega sáhnshahona ehwéh aiq ahtebahno úwe. ³¹Úwana, Mó anínká íre níwáhnorinsabé árahue ahtebaninkono? Arega mah káhréipéq ínéba mahbeq kieague kirítuúno úwe.

³²Ítíópía anínká sáhnshahu ehweh, Manikáne ehwehnka mahraréna, Sipisípiq subonehéera meráhtáq sipisípiqka ehiya míéhre. Mina inserah wega ehiya míéhre. Sipisípiq áyó kiraqsúéhtáq sipisípiqka íre kureq kurerire. Mina inserah wega íre ehwehnire. ³³Sega we ehweh atáhtáq íre aiq pútaq ehwéh irarewe. Subiq súhnsábé we mah marákóipéq íre míéhre. Sega wene oga mé tanahráq parabarúáhwe. Wene animarí íre miáh púara wehukega se éhweh íre terieráhowe ire. *(Aisaia 53.7-8)*

Ítíópía marákórápéqté ání wání meawu ehwehne.

³⁴Ítíópía anínká Pírípínsabé, Iraníboq tenio. Manikáne ehweh irarú anínká insensabe irarúwo? Wewensabé irarúwo? Mó anínsabé irarúwo kasenúwe.

³⁵Kasenúwana Pírípiga mi ehwéhtárue Sísane kaweq ehwéh teawuwe.

³⁶Sega wání aroipéq suyataq mi anínká Pírípínsabé, Tagáhnno. Wání mahtaq kéhre. Arega wání meniníbo kasenúwe. ³⁷Kasenúwana, Arene arupipeq Sísansabé aiq pútare atéhnaraq wání meawiníe úwe. Úwana mi anínká, Sísá Karáhé Manikáne ahninkáwáe. Minayabe aiq pútare atóge úwe. Aiq pútare atóge éna ³⁸óseraréyábé, Túbáh agotao aritowe. Sega wání aroipéq túyana Pírípiga wání meawuwe.

³⁹Wání aroipéq suera kíuyataq Manikáne Awanka Pírípi meawuwana Ítíópía anínká we mónkakáq íre tagéna ahtapeq pokútaq wene arupipeq anotah eyóyóúwe. ⁴⁰Eyóyóúwana Pírípiga Ásáróta suwahpeq ábóraq kéné mó natáq mó natárue wega Sísane ehweh teri terinúwe. Teri terinéna Sésaría suwahpeq kúwe.

Soraga Sísá kéro ehwehne.

(Eqmaro 22.4-16, 26.9-18)

9 ¹Soraga Sísá tagaríáh keyábé anotah ehwéh aritena, Mi ke síwíoqnéna subiq suaníe iwíáhéna Manikáne ehweh mibeq mahbeq aritáh kéné wahnahpa pokúwe. ²Pokéna wensabé, Sísá tagaríáh ké weh ahre tagéna táhtoqme koweriqmena Sarúsarama suwahpeq méritaníboq páhsiwarí nánio. Támákása suwahpeqte Asiu kené momiwí nahmáritápéqté ké sokigi ariniboq páhsiwarí nánio úwe.

³Úwana mi anínká páhsiwarí sehiranue awuwana Soraga mewena Támákása suwahpeq pokue wahtotaq kútaq apubúue íopeqté Manikáne téhrehnka anotahtaq téhrówe. ⁴Téhrówana wega marakóipeq múrunsurahúwana íopeqté éhwéhnká iraréna, Sorao, Sorao, aneqsabé níwioqnahno úwe. ⁵Úwana Soraga iraréna, Anotah aníno, are insebo úwana, Íné Sísá uge. Íné arega níwioqnáhna aní múge. ⁶Irigue mi ke suwahpeq pokúno. Mitaq arega mirainieóna arámbéhrí éhwéh peh morá ánínká teawinkéhe úwe.

⁷Úwara Sorareq nogú kega mi ehwéh irera wehuke íre tago puara peh ehiyansá síwéh panantágúwara míówe. ⁸Soraga irigue aura pankeqme ebiena tagótaq íre tagahrahúwe. Íre tagahrahúnsabe wereq nogú kega wene ayahtaq panantáwera Támákása suwahpeq móátówe. ⁹Móátówana apahtároráq wene aura íre tagahrahéna wánínkakaq táhutahuqkakáq awehriúwe.

¹⁰Awehriúwana Támákása suwahpeqte aní Sísá tagaríéh anínéna wenáwíq Ánáníásie. Ánáníásine awanka tagówana Manikánka áhrabéna, Ánáníásio úwe. Ánáníásio úwana, Mahna míóge úwana ¹¹Manikánka wensabé, Wehukení wenáwíq Súrásae. Irigue wene nahtápéqté áh áwíq Obarisa áhtápéq pokúno. Wene nahtapeq Tahsa suwahpeqte aní wenáwíq Sora ména amahnága púrerire. ¹²Métáq wenawanka tagéwéhtáq wene aura ebieyabe arega weba sure táhtorahnana wene auranka tagehre. Weba koragáhnno úwe.

¹³Úwana Ánáníásiga mahraréna, Áhnte kegá arega iraréna aniné ahabáqsabe teniátówe. Sarúsarama suwahpeqte Sísá tagaríáh ké wega íre kawerarítáaire. ¹⁴Moke arenáwírué áhrabo ke karábúsiipéq mórítanieéna sire. Manikáne ehweh mibeq mahbeq arítáh kéné wahnahmarínká páhsi awera pokue komiraúno átárówe úwe.

¹⁵Úwana Manikánka wensabé, Pokurio. Néne arambehri mirainkeheéna omaq atáráuge. Wega Ísara kereq wáhnaupéqté kéreq sene wahnahmarínseq néne ehweh korerinkéhe. ¹⁶Néne arambehri miráinayabé mó kegá we anotahtaq áwioqnagehe. Minayabe sokigi awinauge úwe.

¹⁷Úwana Ánáníásiga pokue Sora mío nahupéq kibekéna wene ayahtate táhtorena wensabé, Sorao, are náníbáq móne. Arega ahtapeq séwaronaraq itene Wahnah areba séwíarai ani wenáwíq Sísaga eqmaq núwéhre. Arega mó tagehnana Manikáne Awanka arene arupipeq sewíankeheéna eqmaq núwéhre úwe. ¹⁸Úwana Sorane aura ahra tahnsá akariatio naneq apubúue megúwana tagéna irigúwana wání meawuwe. ¹⁹Wání meawuwana táhutahuq nówana wene anonka págege agúwe.

Soraga Sísá éhweh pahsuo ehwehne.

Táhmáro wehekáh Soraga Sísá tagaríáh kébá Támákása suwahpeq ména ²⁰apubúue Asiu kené momiwí nahtápéq kiwéna Sísá éhweh teriena,

Sísawe Manikáne ahninkáwáe úwe. ²¹Úwara wene ehweh író kega moke áhtenára mahraréra, Irari anínká Sarúsarama suwahpeq ména Sísá áhrabo ke síwíoqnéna karábúsiipéq sitárái mino. Mahtaqaqákák mirainiééna surai mino. Wega Sísá áhrabo ke táhtoqme táhruue Manikáne ehweh mibeq mahbeq arítáh kéné wahnahpa mórítanieéna surai mino uwe.

²²Uwana Soraga págege ehwéh irarú ani úkue kaweq tábúsoqme ehweh teriena, Mah marákó marákóipéq sína aní, Manikánka omaq ato anímé Sísá wire ue tábúsoqme síwáhnorúwe. Tábúsoqme síwáhnorú púara Támákása suwahpeqte Asiu kegá mó íre irarerahowe.

Áhnte Asiu kegá Sora subiq suonehera unsabe pokú ehwehne.

²³Áhnte wehekáh sótaikúwara Asiu kegá momiwíue sío síóera, Sora subiq suanéhe íwíáhuwe. ²⁴Subiq suanéhe íwíáhéra moráénuwana mó anínká sene ehweh irena Sora koreawuwe. Koreawuwara sega suboneheéra Támákása suwahpeqte áhnánsáhrápéqté áhtápéq wéhékáhnkakaq inokáhpeqkákák wahnah wahnahnuwe. ²⁵Wahnahnuwara inokáhpeq Soraga anotah pahsíkétíipéq tútuue míowara we kéro kega méatera náhníáqtate pahsíkétiraq iwe panantáwe tunse ebah kuri pera máhpeq márúnátówe.

Soraga Sarúsarama suwahpeq síwáhnorú ehwehne.

²⁶Soraga Sarúsarama suwahpeq pokéna, Sísá tagaríah kébá kowíanauge íwíáhuwara sega wensabé áhreéra, We íre aiq pútaq Sísá tagaríeh aní míre íwíáhuwe. ²⁷Iwíáhuwana Páhnábásaga Sora meqmena eqmaro keba móatowe. Móatena sensabé, Mah anínká ahtapeq itene Wahnah tagarairana wega ehweh teawátáire. Teawátáirana wega Támákása suwahpeq Sísá éhweh págegeue síwáhnoruraire úwe.

²⁸Úwana Soraga Sísá tagaríah kébá mía míaéna Sarúsarama suwahpeq íre áhrea peh mó minatáq mó mahnatárue Sísá éhweh págegeue síwáhnorúwe. ²⁹Síwáhnorúnsabe wereq Káríki ehwéh iraru Asíu kéreqka ehwehuwe. Mi kegá, Sora subiq suaneheqmúne íwíáhuwara ³⁰Sísá tagaríah kégá mina irera Sora meqmera Sésaría suwahpeq márúnatera mibeqté Tahsa suwahpeq eqmarówe.

³¹Eqmarówara mi tanáhráq mó kegá Súría marákóákák Kehrari marákóákák Sámária marákóákák Sísá tagaríah ké íre síwíoqnia peh míówe. Peh míowara sirupipeq Sísane sánsá ahtebéra kawerue mirauwe. Manikáne Awanka págege aritena sirupipeq kaweq iwíah aritowara íregáritaq mó wehekéqká Sísansabé aiq pútare atera kawerue kérowe.

Pítaga Áínía kawerato ehwehne.

³²Pítaga Sísá tagaríah ké míó nahmáritápéq poku pokuúwe. Pokéna Áríra suwahpeqte Sísá tagaríah kéreqpa tuwe. ³³Mi ke suwahpeq mío aní

wenáwíq Áíníae. Wega abapete apahtáro ópéq wene máhriqtaq ména ah íre nogoráhuwe.

³⁴Ah íre nogoráhuwana Pítaga we tagéna wensabé, Áíníao, Sísá Karáhega amahnága kaweratéhre. Irigue arene máhriq sabaráwe sokah sokahúno úwana wega apubúue irigúwe. ³⁵We kaweragúnsabe moke Áríra suwahpeqte kéreq Sáróna suwahpeqte kéreqka tagéra Sísansabé aiq pútare atera, Wene sánsá sehgionéhe íwíáhuwe.

Tókási pukú ehwehne.

³⁶Sópa suwahpeq mío iní wenáwíq Tábítae. We Sísá tagaríéh ání míowara Káríki ehwéh iraru kegá Tókásie ue áwíratowe. We kaweq arámbéhrí iní ména íre arambehrioraho ke séhréh aruqarurúwe. ³⁷Píta Áríra suwahpeq míotaq mi iní anotahtaq awahreue pukúwe. Pukúwara wene anonka pabeq paberue abobóráhpeqte náhtápéq átówe. ³⁸Sópa suwahpeq Áríra suwahpeq wahtotaq kowara Sísá tagaríáh kegá Pítawe Áríra suwahpeq míéhre u írówe. Irera téhraníté Pítaba eqmaq suera, Pehbeheráh súno koreawétáo éra eqmaq súówe.

Tókási oga úkú ehwehne.

³⁹Eqmaq súówara pokue koreawúye. Koreawúyana Pítaga se kérirowe. Eqmaq súó keba suwara sega meqmera abobóráhpeqte nahtapéq móátówara mibeqté kéwéínínsónká Pítaba iriwe méra ibisowe. Ibiséra Tókási oga míotaq miraro korósí Píta sokigiue teawúwe.

⁴⁰Pítaga se moke máhpeq kaqsuena arehunseraráq ména púrérúwe. Púréréna pabeqme putio anínsabé, Tábítao, irigúno úwe. Irigúno úwana wene auranka tagéna Píta tagótaq máhriqtaq kirítuue míowe. ⁴¹Míowana Pítaga wene ayahnkara táhtoqme pankeq auwowe. Pankeq auwena kéweinínsónseq mó Sísá tagaríáh kéreqsabé síáhrabéna sensabé, Seragahro. Oga úki aní tagahro éna sokigi ariuwe.

⁴²Moke Sópa suwahpeqte kegá oga úkú ehweh irera áhnte kegá Sísansabé aiq pútare atówe. ⁴³Pítaga áhnte wehekáh Sópa suwahpeq ména ménkámehnkáne áú kaweraqari aní wenáwíq Sáimónine nahtapeq kaegaeúwe.

Íopeqté ánínká Kóníría teawu ehwehne.

10 ¹Sésaría suwahpeq mío weh wenáwíq Kóníríae. We áhnte Aroma sontiá ké 100 Ítári marákórápéqté sontiá kéné kíápéténí míowe. ²We Maniká awahbeh sansa sehgiu aníne. Mi karíronánínká Manikánsabe iwíáh íwíáhéra wene sánsá sehgiúwe. We íre arambehrioraho ke nári nárinena Manikánsabe púreq aruqarurúwe.

³Ío tunsorerutaq wenawanka tagówana Manikáne íopeqté ánínká weba súwana kawerue togówana wensabé, Kóníríao úwe. ⁴Úwana we ebitáwéna áhreéna wensabé, Árahono úwe.

Árahono úwana íopeqté ánínká wensabé, Arega púreq aruqarurónawe Manikánka irena arega tabonah ke nári nárinónawe wega tagéna arensabé kaweróne atéhre. ⁵Wehukení wenáwíq Sáímóni we mó awíq Pítae. We Sópa suwahpeqte koweragéhboq wehuke eqmaq suo. ⁶Pítağa ménkámehnkáne áú kaweraqari aníné nah sóreq waní áhkórapeq kéh náhpípéq kaegaeire.

⁷We koweragéhboq wehuke amahnága eqmaq suo éna pokúwe. Pokúwana Kóníríaga wene arambehriuya anitéreq peh morá sóntía ánínseq síáhrabúwe. Mi sóntía ání Maniká awahbeh sansa sehgi áni ména Kóníría séhréhu ani míowe. ⁸Síáhrabéna su ke íopeqté áníné ehweh moke teriena Sópa suwahpeq eqmaq suowe.

Pítane awanka tagó ehwehne.

⁹Mó wehekáh se ahtapeq Sópa suwahpeq áhnhíbórá kutaq Pítağa nah abogéhrapeq wehekáhnabubu púrerinieéna kiuwe. ¹⁰Púreréna arupibiúwana, Tópahnsabé níre úwe. Mó kegá táhutaquq tíátótaq wenawanka tagówe. ¹¹Tagówana íopeq sawekúwana mipeqté anotah paráhnkéq tahnsa náneq tuwe. Ébeq ayéhráq ébeq ayéhráruwe pagume we míorabeq mewerúwe. ¹²Mi paráhnkéqpípéq áhnte menkáméhnkánkákákq karahrabahnkakákq kabarankakákq míowe. ¹³Míówana íopeqté éhwéhnká mahraréna, Pítao, irigue mi kamári subiqme tíwe náhno úwe.

¹⁴Subiqme tíwe náhno úwana Pítağa anotah ahqáho éna, Anotah Wahnáh ánino, ite Asiu kegá íre nona naneq kamári púana órirane. Naho íre naraugé. Amahnága moq íre nanaugé úwe. ¹⁵Úwana íopeqté éhwéhnká mó mahraréna, Manikánka kaweraréh náneqsabé órirane atéhneho úwe.

¹⁶Apahtáróráq ménkámehnká parahnkeqpipeq sáhue mewena márumarena tuekéna úwana íopeqté éhwéhnká mó apahtáróráq irarúwana íopipeq tumeyowe.

¹⁷Wenawanka tagónsabe Pítağa áhtenéna, Néniwanka aneq tagehramo íwíáhúwe. Mira íwíáhútaq Kóníríaga eqmaq suo kega Sáímónine nah kabarue ábóraq marera ogesáh ogesáhrapeq iriwe míowe. ¹⁸Iriwe méra anotahtaq kasenéna, Sáímóni mó awíq Píta mahta q kaegaeiro kasenuwe.

¹⁹Wenawanka tagónsabe Pítağa iwíáhútaq Manikáne Awanka wensabé, Sáímónio, írátíahno. Apahránítógá arensabé anebahrowe. ²⁰Iriwe tutagáhno. Ínéga se eqmaró púah iwíáh kikirinehboq pehipi kériro úwe.

²¹Úwana Pítağa seba tutagéna sensabé, Itega kabaro anímé íné úge. Aneqsabé seo úwara ²²sega wensabé, Sóntía kené kíápéténi wenáwíq Kóníríaga eqmaq íuwátáire. We kaweqtaq mía míai aní ména Manikánsabe áhtenuwe. Moke Asiu kegá iwíáhéra, Kóníríawe peh kaweqtaq tabasíwe míéh ánine iwíáhuwe. Maniká míéhrabeqte íopeqté ánínká wensabé, Pítağa ehweh teinkéhboq siqmarehnara arene nahtapeq koweráhro uraire uwe.

²³Uwana Pítaga sensabé, Nahupeq kíoro éna inokáhpeq kirabo aritowe. Ahbiahipeq Pítareq we seweró kereqka pokuwara mó mibeqté Sísá tagaríáh kégá kérowe.

Pítaga Kóníríane nahtapeq kú ehwehne.

²⁴Mó wehekáh Pítarehga Sésaría suwahpeq kuwe. Kóníríaga wenawahrehq wene iyahnabo anímárinseq síáhrabúwara sega wene nahtapeq sure momiwíue Píta áwénunuwe.

²⁵Pítaga nahupeq kinautaq Kóníríaga weba séna wene aigárátáq arehunserarác ména wensabé iwíáh iwíáh atowe. ²⁶Iwíáh iwíáh atowana Pítaga wensabé, Irigúno. Íné moq peh wehukení múge úwe. ²⁷Pítareq wereq ehwehnéra nahupeq kíuyara áhnte wehuké mitaq sáhuríówe.

²⁸Mitq sáhuríówana Pítaga sensabé, Asiu kené sánsámé nahnsó ke momiwíotaqmé Asiu kegá mibeq pokéyabe órira míre éq íre pokorahúne. Minayabe tagaríáhwe. Manikánka sokigiue teniena, Mó ke peh abehq ké wóe iwíáhíneho uraire. ²⁹Minayabe itega níáhraburowana pehipi suraue. Aneqsabé níáhraburoo? Tenífero úwe.

Kóníríaga Píta teawu ehwéhne.

³⁰Kóníríaga Pítansabé, Mó mahsenahrí amahnága tahnsa tanáhrác tunsoreráitaq nahtapeq púreruraue. Púreruraugana patahga inserah téhreh ambántánkákákáq ánínká íné míarautaq ábóraruraire. ³¹Ábóraréna ínénsabe, Kóníríao, Manikánka arega púreróna ehwéh íréhre. Arega nári nárínóna sansá tagaríéhre. ³²Minayabe wehukení wenáwíq Sáímóni we mó awíq Píta kowero. We Sópa suwahpeqte kiweragéhboq wehuke eqmaq suo. Mó aní wenáwíq Sáímóni ménkámehnkáne áú kaweraqari aníne nah sóreq waní áhkórapeq kéh náh Pítaga kaegaeire uraire. ³³Urainsabé are kiweragehéna apubúue wehuke eqmaq súátáuge. Eqmaq súátáugah arega suronawe kaweróne. Ite ómiga Manikáne aurátaq sewíone. Minayabe Manikánka korerio urai ehwéh amahnága moke teio úwe.

Pítaga Sísá éhweh Kóníríareh teriu ehwéhne.

³⁴Kóníríaga, Moke teio úwana Pítaga sensabé mahraréna, Íné amahnága tagaríómé Manikánka aiq pútaq moke mah kehiná kéhínánsabé monseráhnue arutaboire. ³⁵Wensabé áhtenéra kaweqtaq mía míaó keyábé arutaboire. Íre peh morá Asiu keyábé moke mah kehiná kéhínánsabé arutaboire. ³⁶Manikánka ite Ísara ke teiu ehwéhme itega írátíáhwe. Mi ehwéhme Sísá Karáhéwé mah kehiná kéhíná wahnahnarítéhre. Wene kaweq ehwéhnsabé aiq pútare atáh ké peh morá ké tahnsa úkowe.

³⁷Sóniga Kehrari marákórápéq kaweq arámbéhrí áhwáréna ehweh teriena wání meriuwe. Anehe ite moke Ísara kehiná suwahpeq mirauro

sansá aiq tagariáhwe. ³⁸Manikánka Sísá Néhsara suwahpeqte ánípá Wenawa eqmatairana Wenawanka Sísá séhréh atena págege atáráire. Sísaga mó ke suwahpeq mó ke suwahperue pokue kaweq arámbéhrí arítáráire. Manikánka Sísaba mía míai puana owainawanka síwioqneh ke kawerarítáráire. Ínéga teiú éhwéhmé aiq íráhwe úwe.

³⁹Pítaga mó mahraréna, Asiu kené marakórápéqkákáq Sarúsarama suwahpeqkákáq Sísaga moke mirarurai arámbéhrí ínéreq mó we kéro kereqka tagaraune. Ísara kegá Sísá awankátaq táhparera subiq sutowe. ⁴⁰Subiq sutowana pukúwana apahtáro wéhékáhtáq Manikánka Sísá iriwe oganúq atáráirana wega iteba suraire. ⁴¹Íre ómi kehinápá peh iteba surairaq tagaraune. We oganúq kuraitaq tagéq itereq wereq moráraq táhutahururaune.

⁴²Manikánka itensabé, Mah kehiná kéhíná koreriéro. Sísá ínégá omaq ató ánínká mókake moke oga míáh kéreq pusa kéreq ehweh aritankéhe. Mi ehwéh tábúsoqme koreriéro uraire. ⁴³Moke Manikáne ehweh iraru kegá mahraréna,

 Mi aní áwíq áhrabéra wensabé aiq pútare atáh kéwé Manikánka sene ahababáq kaweraritankéhe uwe teriuwe.

(Aisaia 33.24, 53.5,6, Jeremaia 31.34, Maika 7.18, Sekaraia 13.1, Aroma Ke 10.11, Kárétta 3.22)

Manikáne Awanka nahnso kebá tumío ehwéhne.

⁴⁴Pítaga mi ehwéh teriutaq Manikáne Awanka író kene sirupipeq tumíowara ⁴⁵⁻⁴⁶sega kambare ehwéh iraréra Manikánsabe iwíáh iwíáh atówe. Iwíáh iwíáh atówara Sísansabé aiq pútare atáh Ásíú ké Pítareq su Asiu kegá irera áhtenuwe. Áhtenéra irarera, Manikáne Awanka íre peh morá iteba tumíéhre. Nahnso keba moq tumíéhre uwe.

⁴⁷Uwana Pítaga mahraréna, Manikáne Awanka itene irupipeq tumíarainserah mah kené sirupipeq moq tumíéhre. Minayabe wání merieyabe insega ahqáho aitahráhiro úwe. ⁴⁸Insega ahqáho aitahráhiro éna Sísá Karáhé áwíqtaq wání meriéro úwara mi ke wání meriúwe. Wání meriúwara sega Pítansabé, Táhmaro wehekáh mahtaq míahno uwe.

Pítaga Sarúsarama suwahpeqte Asiu ke teriu ehwehne.

11 ¹Nahnso kegá Manikáne ehwehnsabé aiq pútare atárówe uwara Súría marakórápéqte eqmaro kereq mó Sísá tagariáh kéreqka írówe. ²Írówana Pítaga Sarúsarama suwahpeq kiutaq mibeqté síú amurúróú kegá ehweh atówe. ³Ehweh atera, Íre Asiu kené nahtapeq árahinsabé pokue táhutahururono uwe.

⁴Uwana Pítaga Kóníríane nahtapeq pokú ehweh mahraréna, ⁵Íné Sópa suwahpeq púrerurautaq néniwanka tagaraire. Tagarairana íopeqté anotah paráhnkéq tahnsa náneq tutaire. Ébeq ayéhráq ébeq ayéhrárué

íné míaraurabeq mewe tutaire. ⁶Íné ebitáwéna ménkámehnkánkakaq karahrabahnkakáq kabarankakáq mi paráhnkéqpípéq míaraire.

⁷Míairairana íópeqté éhwéhnká iraréna, Pítao, irigue mi kamárí subiqme tiwe náhno uraire. ⁸Urairana ínéga anotah ahqáho éna, Íre nóna nanéq kamárí púana naho íre narauge. Amahnága moq íre nanauge uraige.

⁹Uraugana íópeqté éhwéhnká mó mahraréna, Manikánka kaweraréh náneqme íre no nanéq kane atéhneho uraire. ¹⁰Mi ehwéh apahtárórág irarurairana mi paráhnkéqkákáq íópeq tuekuraire.

¹¹Tuekuraitaq Sésaría suwahpeqte ánínká, Íné koweniro únsabe apahránítógá íné koweniraneheéra kaurau nahtápéq suwe. ¹²Suwana Manikáne Awanka ínénsabe, Iwíáh kikirinehboq pehipi kériro urairaq ínéreq abapete morá mó Sísá tagaríáh kéreqka se kériítaúne. Kérireq itega mi wehné nahtapeq kure kiraune.

¹³Kiraunana wene nahtapeq íópeqté tutai aníné ehweh teiátáire. Teiena, Íópeqté tutai anínká ínénsabe mahraréna, Wehukení wenáwíg Sáímóni we mó awíg Píta Sópa suwahpeq miéhre. We kiweragéhboq wehuke eqmaq suo. ¹⁴We sínaraq arereq arenawahraheqsabé oga úké ehweh teinkéhe ire uraire.

¹⁵Kóníríaga mi ehwéh teniátáirana ínéga Sísá éhweh áwaheue teriátáuge. Sísá éhweh áwaheue teriátáutaq Manikáne Awanka sene sirupipeq tumíaraire. Téhwe itene irupipeq tumíarainserahne tumíaraire. ¹⁶We marakóipeq míaraitaq Sísaga mahraréna, Sóniga wání meri merinínana Manikáne Awanka itene irupipeq tumíankehe uraire. ¹⁷Manikáne Awanka sene sirupipeq tumíairairana mi ehwéh niahreraq káráire. Itega Sísá Karáhénsabe aiq pútare atárówana Manikáne Awanka itene irupipeq tumíaraire. Itene irupipeq tumíarainserah sene sirupipeq moq tumíaraire. Manikánka wewega miraruraire. Íné peh wehukení mío púana Manikánsabe árahue ahqáho atanínkono úwe.

¹⁸Úwara sega Pítane ehweh irera túbáh aguwe. Túbáh agéra Manikánsabe iwíáh íwíáh atera, Nahnsó keakáq sene ahbabáq súáhnsábé Manikánka oganúq sítéhre uwe.

**Sísá Karáhé tagaríáh kéwé Ántióka suwahpeq téhwe
Kárisítini kee ue síwiraritó ehwehne.**

¹⁹Sítíbéni subiq súo tanahráq sega Sísá tagaríáh ké síwíoqnowe. Síwíoqno puara sega Sarúsarama suwahpeq suera abae aguwe. Abae ague mó kegá Pónísía marákórápéq pokuwara mó kegá Sáipára marákórápéq pokuwara mó kegá Ántióka suwahpeq pokuwe. Poké agurabetaq peh morá Asiu ke Sísá éhweh teriúwe. ²⁰Táhmáro Sísá tagaríáh kéwé Sáipára marákórápéqté kéreq Sáírini marákórápéqté kéreqka Ántióka suwahpeq pokue Káríki ke Sísá itene Wahnah éhweh teriúwe. ²¹Wene ehweh teriú

ke Manikánka séhréh arito púara áhnte kegá Sísansabé aiq pútare atera, Wene sánsá sehgiónehe íwíáhuwe.

²²Sarúsarama suwahpeqte Sísá tagariáh kégá irera Páhnábása Ántíóka suwahpeq eqmarówe. ²³Eqmarówana Ántíóka suwahpeq séna Manikánka wehuke séhréh arito tagéna wene arupipeq eyoyóúwe. Eyoyóéna sensabé túbáh agiyehboq Sísane sánsá kawerue sehgióro úwe. ²⁴Páhnábása kaweqtaq mía míau aní ména Sísansabé kawerue aiq pútare atowana Manikáne Awanka séhréh atowe. Séhréh atowara áhnte kegá Sísansabé aiq pútare atera, Sísane sánsá sehgióneheqmúne íwíáhuwe.

²⁵Páhnábásaga Sora anebahrinieéna Tahsa suwahpeq pokúwe. ²⁶Pokéna Sora tagéna koweqmena Ántíóka suwahpeq kouwekúwe. Sega peh morá ópéq mitaq méra Sísá tagariáh kéruerue momiwíue áhnte ke síwáhnoruye. Mitaq mó kegá Sísá tagariáh keyábé Kárisítini kee ue téh síwírarítówe.^e

Morábí soruparó monéyábé éhwéhne.

²⁷Mi tanáhráq Manikáne ehweh iraru kegá Sarúsarama suwahpeq suera Ántíóka suwahpeq túwe. ²⁸Peh morá sú ani wenáwíq Ágábúsaga iriwe míowana Manikáne Awanka iwíáh atowana irarúwe. Iraréna, Anotah ehwéhráhna tanáhráq mah marákó márákó sineae úwe. Wehukeni wenáwíqtare Kárórúsa Sísáhri anotah wahnáh aní míotaq mi ehwéh aiq pútaragúwe. ²⁹Aiq pútaragúwara Ántíóka suwahpeqte Sísá tagariáh kégá iwíáhéra, Súría marákórápéqté Sísá tagariáh ké táhutahuq paiqmarageheéq móne nárienéhe. Nárinie ú aninká wewega iwíáhue náriuwe. ³⁰Mina tahnsa sene móne morábí soruparówara Páhnábásareq Sorareqka mi moné mewera Súría marákórápéq pokuye. Mitaq Sísá tagariáh ábóawáh wéhgá nárigheéra móríúwe.

Píta karábúsiipéq móató ehwehne.

12 ¹Mi tanáhráq Asiu kené anotah wahnáh aní wenáwíq Érótiga Sísá tagariáh ké síwíoqnówe. ²Síwíoqnéna, Sónine awahwá wenáwíq Sémísi subóro aritowara pokatate kiraqme subiq súówe. ³Subiq súónsabe Asiu kegá Érótingsabé kaweróne atówe. Kaweróne atówana Érótiga Píta karábúsiipéq móátáhiro úwara táhtoqme móátówe. Sótaikú siahreraq ko tánáhráq karábúsiipéq móátówe.

⁴Móatówana Érótiga áhnte sontiá keyábé wahnahnatiáhiro aritowe. Mó sontiá ké itaréitaré ké mipi sorupawe mía mó sontiá ké itaréitaré ké mipi sorupawe míau 16 sontiá ké míówe. Érótiga iwíáhéna, Sótaikú siahreraq kéh tánáhráq parabagínaraq wehuke miáhpí kotiinie íwíáhúwe. ⁵Iwíáhúwara Píta karábúsiipéq míotaq Sísá tagariáh kégá Píta pugeq auwagehéera púrerata atauwe.

^e 11.26 Mi awíq áwahewé Karáhéne animárine áwíre.

Íopeqté ánínká Píta séhréh ato ehwehne.

⁶Érótiga Píta Asiu kebá móatanaútaq Pítaga inokáhpeq karábúsiipéq sugowe. Píta taqnobagineho éra téhtaré séníraté táhrarera sóntía anítáregá ébeq ayéhráq ébeq ayéhrárué wahnahnuyara mó sóntía ánítáregá méhpehtapéq wahnahnatióyana sugowe.

⁷Sugowana Maniká miéhrabeqte ánínká ábóraragútaq karábúsiipéq téhragúwe. Téhragúwana íopeqté ánínká Pítane ahwíraq subiq subirue iriatena wensabé, Apubúue irigúno úwe. Úwana wene ayahpíte séníraré megúwe.

⁸Megúwana íopeqté ánínká wensabé, Arene ambanta sábirue úbíqme arene súu sukio úwana Pítaga wene ehweh irena miraúwana, Arene korósi aneranerue íné séniro úwe. ⁹Íné séniro úwana Pítaga we kérena iwíáhéna, Íopeqté ánínká tumeniréhnsábé aiq pútaqpomo peh néniwanka tagehrapómo íwíáhúwe. ¹⁰Sóntía anínká wahnahnúrabéq sótaikéra mó sóntía ánínká wahnahnúrabéq sótaikéra wahba áhtápéq séagoyeheéra anotah kahpáh ónsá korabéq suye. Mi ónsá pehipi sigúwara sega máhpeq séaguye. Séagéra ahnanahq sótaikuyataq íopeqté ánínká Píta auwena taqnobagúwe.

¹¹Taqnobagúwana Pítaga iwíáhéna, Íre néniwanka tagehrana amahnága aiq niahteboge. Érótireq Asiu kereqka nubíyehoéna Manikánka íopeqté áni eqmaréhre. Íné tumenirankeheéna eqmaréhre íwíáhéna ¹²Máhkane anowa Máhríane nahtapeq pokúwe. Máhkawe mó awíq Sónie. Mi nahtápéq áhnte Sísa tagaríáh kégá momiwíue méra púrueruwana

¹³Pítaga máhpeqte ónsaráq pakobakoúwana ahrari wenáwíq Áróraga onsarapéq tuirowe. ¹⁴Tuirena, Ehweh irari aní Pítáe iwíáhéna wene arupipeq eyoyóúwe. Eyoyóúnsabe wega onsa íre siatasa peh nahupeq pehbeheráh kibekue, Píta méhpehtapéq iriwe miéhre teriuwe. ¹⁵Teriuwara sega wensabé, Are uwoyansa ani úkóne uwana mi ahrárigá, We miéhre. Peh aiq pútariahnsanuge úwara sega wensabé, Peh íopeqté áni Píta wahnahnatéh ánípómo uwe.

¹⁶Uwana Pítaga mó pakobakoúwara sega onsa siatera Píta tagéra áhtenuwe. ¹⁷Áhtenuwana se túbáh agigeheéna Pítaga ayahnka saiqnéna Manikánka karábúsiipéqté tumero ehwéh teriuwe. Teriena sensabé, Sémísireq mó Sísa tagaríáh kéreq koreriéro éna mitaq suena móbeq pokúwe.

¹⁸Ahbiahipeq Píta karábúsiipéqté taqnobagúnsabe sóntía kégá, Eheragirowe éra sirupipeq iwíáh kikiruwe. ¹⁹Érótiga sóntía keyábé, Píta koanebahroro úwara koanebahruwe. Anebahruwana Píta íre ábóraq míonsabe Érótiga Píta wahnahnuro sóntía ké ehweh aritena mó sóntía keyábé, Mi ke subiq súáhro aritowe. Subiq súáhro aritena Érótiga Súría marákórápéq suena Sésaría suwahpeq kowíowe.

Éróti pukú ehwehne.

²⁰Érótiga Táíya suwahpeqte kéreq Sáíróna suwahpeqte kéreqsabé abiahnsanúwe. Abiansanúwara Érótiga wahnahnú marákórápéqté táhútáhúq paiqmaq paiqmaru puara sega weba suwe. Érótime arambehri kené wahnahnú ani wenáwíq Párásátae. Moráráq su kegá wensabé, Érótiga itensabé ahqáho aitehnehboq are itene ehweh mibeq mahbeq ani míaño uwe. Insahwé oneheéra Érótiba suwe.

²¹Érótiga iwíáhú wehekáh wene wahnah awáhríq náneqmarí sukiwena wahnah siáhráq tútuue ména ehweh teriuwe. ²²Teriuwara író kega anotah ehwehnabaéra, Teí ání íre wehukení míre. We Maniká míre uwana ²³Érótiga, Ahqáho. Íné íre Maniká múge. Peh wehukení múge íre iraria peh ehiya míowe. Minayabe íopeqté ání Maniká miéhrabeqte ánínká apubúue, Awahreúno atowana wene arupipeq awiria sóagúwana putiowe.

²⁴Putiowara mó ke suwahpeq mó ke suwahperue áhnte kegá Manikáne ehweh irera Sísansabé aiq pútare átówe.

²⁵Páhnábásareq Sorareqka sene mibeqté árámbehri parabaruera Máhka mó awíq Sóni meqmera Sarúsarama suwahpeq suera Ántióka suwahpeq kouwekuye. *(Eqmaro 11.29,30, 12.1)*

Porareq Páhnábásareq eqmaq súo ehwehne.

13 ¹Ántióka suwahpeq Sísa tagaríáh ké míórabeq Manikáne ehweh iraru kereq síwáhnoru kereq míówe. Mi anímárí síwíqmé Páhnábása, Símióni we mó awíq Naisa, Sáíríni marákórápéqté ání Árúsía, Sora, Mánái miraué míówe. Mánáireq anotah wahnáh ání Érótimeq animairare míoyataq motakakiah ánité míóye. ²Sega kawerue púreroneheéra táhutahuq awehriuwe. Mi tanáhráq sega Manikánsabe iwíáh iwíáh atótaq Manikáne Awanka sensabé, Páhnábásareq Sorareqka teriena arámbehri miraigehboq eqmaq súáhro úwe. ³Úwara sega táhutahuq awehriéra púreréra mi aniténé sinonka táhtoqme púreraritera eqmaq súowe.

Ahgora aniné aura pigú ehwehne.

⁴Manikáne Awanka siqmarowara Sorareq Páhnábásareqka pokue Sérúsía suwahpeq túye. Mitaq suera sípi kéwewera kure Sáipára marákórápéq pokuye. ⁵Pokéra Sárámisi suwahpeq sutaq sega Asiu kené momiwí nahmáritápéq Manikáne ehweh teri terinuyana Máhkaga seba ména séhréh aritowe. Máhkawe mó awíq Sónie.

⁶Sega moke Sáipára marákórápéq nogera Pápósa suwahpeq suwe. Mitaqté ání wenáwíq Páhsísae. We Asiu aní ména ahgora aní míowe. Wega, Íné Manikáne ehweh iraru aní múge úmé péhepehenúwe. ⁷Wega

Pápósa suwahpeqte wáhnáh áníbá míowe. Mi wahnáhné áwíqtare Ségia Pórásae. We áhnte ahtébiá ání ména Manikáne ehweh irankeheéna Sorararéyábé mahbeq sewéta Manikáne ehweh teniétao úwe. ⁸Mi ahgóra ání áwíq mó awíqmé Erimae. Erimaga Sorararéné ehwehme abehq éhwéhne aritowe. Mitaqté wáhnáh ánínká Sípane ehwehnsabé aiq pútare inehoéna wega Sorararéné ehwehnsabé abehq éhwéhne aritowe.

⁹Sorawe we mó awíq Porae. Manikáne Awanka we págege atena séhréh atowana wega Erima págegeue ebitáwéna wensabé, ¹⁰Are owainawane ani móne. Are kaweqtaq méyabe awahrieh aní móne. Are péhe ánímé ahbabáqsabe áwí ání móne. Arega Manikáne ehweh íre tábúsoqme teriasa aeqme síwáhnoróne. ¹¹Írátíahno. Manikánka amahnága kamah awinah are aura pira ání míankehe. Áhnte wehekáh téhreh íre tagahrahóne úwana wene aura apubúue pigúwana we íre tagahrahúwe. Íre tagahrahúnsabe mó anínká wene ayahnkaratáq ahmboqme ah sokigi aninkeheéna kabaq kabarúwe. ¹²Wahnah anínká mina tagéna Sípane ehwehnsabé áhtenu puana aiq pútare atowe.

Porareq Páhnábásareqka Ántióka suwahpeq teríuya ehwehne.

¹³Porarehga Pápósa suwahpeq suera sípi kéwewera kure Périga suwahpeq Pámbíría marákórápéq kuwe. Mitaq Máhkaga Porareh suena wenawahpeq Sarúsarama suwahpeq seuwekúwe. ¹⁴Seuwekúwara Porarehga Périga suwahpeq suera Ántióka suwahpeq Písíría marákórápéq kuwe. Mitaq kéra ahrena ahrena wehekáh Asiu kené momiwí nahtápéq kire tútuue míowe. ¹⁵Tútuue míowara mibeqté wáhnáh kéga Mósísiga sehgióro ú sehirankákáq Manikáne ehweh iraru kené sehirankakaq sáhnahera sega Porarehyabe, Itene irupipeq séhréhorahi ehwéh kahnaráqmé teiéro uwe.

¹⁶Uwana Poraga irigéna se túbáh agigeheéna ayahnka saiqnéna mahraréna, Ísara kereq Manikánsabe áhteno kerero, írátíáhro. ¹⁷Maniká Iteribo ite Ísara kené Manikáne. Wega itene igaqnaréh omaq sitena séhréhúnsabe sega Ísipi marákórápéq íregáritaq aguwe. Manikánka págegeue séhréh aritena Ísipi marákórápéqté meriqmena móbeq móritowe.

¹⁸Sega 40 opéq abataq marákórápéq míowe. Míowana mi tanáhráq Manikánka se peh áwéragówe. ¹⁹We abapete téhtaré Kénáni marákóráq míó kehiná kaqsuowe. Kaqsuo kene marakó itene igaqnaréh eqsitowe. ²⁰Mi arámbéhrí miraúmé peh íregáritaq opéq 450 opéq sótaikúwe. Sotaikúwana wega ehweh kaweraritageheéna wahnah ke omaq sitowe. Anehe Sáhmúéri wene ehweh irari aní omaq atowe úwe.

²¹Poraga mó mahraréna, Itene igaqnaréhga Manikánsabe, Íregáritaq wahnáh keyábé iuwahriehre. Peh morá anotah págege wahnáh ánínká ite wahnahnaitankehé omaq ato uwe. Uwana Manikánka Pénsámíni

kahnáh ání Kisine ahninkáwá wenáwíq Sora omaq atena itene igaqnaréh wahnahnarito atowe. Soraga 40 opéq wahnahnúwe. ²²Wahnahnúwana Manikánka Soransabé, Arega wahnahnurona tanáhráq aiq parabagire éna Tébíti sene anotah wahnáh ání míankeheéna omaq atowe. Omaq atena mahraréna, Sésine ahninkáwá tagaríóge. We niruní ání míre. Wega moke nuwahbeh sánsá mirainkehe úwe.

²³Manikánka irarúnserah Tébítine anahwagá ite Ísara ke kaweraitankeheéna Manikánka omaq atowana aiq tutaire. Tutai ani wenáwíq Sísae.

²⁴Sísaga tuina uraitaq Sóniga Ísara keyábé mahraréna, Itene ahbabáq sansa sueq kaweqtaq míéhraqmémé wání meiníe uraire. ²⁵Sóniga wene arambehri parabaruana uraitaq wega mó mahraréna, Íné inse wíre íwíáhoo? Íné ite áwénunúna anímé íre we úge. Írátíáhiro. Íné inehé si aníné súu nahníáq pugereyabe íre awehrari aní múge uraire úwe.^f

²⁶Poraga mó mahraréna, Nánuwahraho, Ébárahma kahnáhné animárínseq Manikánsabe áhteno kerero, írátíáhiro. Itega oga mía míaoayabé mi ehwéh Manikánka aiq teíre. ²⁷Sarúsarama suwahpeqte kéreq sene wahnah anímárínseqka Sísá tunsabe we íre siahtabarowe. Segá ahrena ahrena wehekáh Manikáne ehweh iraru kené sehira sáhnshawe taga tagaéra mi ehwéhnsábé íre kawerue iwíáhurowe. Íre kawerue iwíáhéra Manikáne ehweh iraru kegá sehiranunserah sega Sísá ehweh atera subiq suanéhe atówe.

²⁸Sega, Sísá áhnte ahbabáruraire íre irarerahéra sega pehipi Páhirátinsabé, Subiq suo ato ue teawátówe. ²⁹Manikáne sehiranka irarúnserah sega subiq sutowe. Subiq sutowara awanká soriwe táhparó ani sehgiwera maisé onápípeq mómaisarówe. ³⁰Mómaisarówana Manikánka iriatena oganúq atáráire. ³¹Oganúq atáráirana Kehrari marákórápéqté Sarúsarama suwahpeq we kété keba suraire. Surairara sega áhnte wehekáh we taga tagauronsabé sega amahnága mó ke teri terinowe úwe.

³²Poraga mó mahraréna, Anotah kawéq éhwéh mahrarue teiune. Manikánka itene igaqnaréhyabe, Kaweraitahna aní iteba eqmaraníe aiq irarúwe. ³³Eqmaraníe aiq iraréna Sísá iriatena oganúq atáráinsabé wega irarú ehweh aiq pútaraguraire. Itene igaqnaréhne animárínká aiq tagariaraune. Wegá iriatena oganúq atáráinsabé Buk Songipeqté éhwéhnká mahraréna,

Are nénahni móne.

Íné Arenabo uge ire.

(Buk Song 2.7)

³⁴Manikánka iriatena oganúq ato puana wene anonka mókake marakóipeq íre karekorahire. Minayabe Manikáne ehwehnka mahraréna,

^f 13.25 Máhka 1.7 aigárápéqté éhwéh tagáhno.

Ínéga Tébiti omasa éhwéh teawúnserah mókake ite kawerarena
áhnte kaweq naneq iníe ire. *(Aisaia 55.3)*

³⁵Manikáne ehweh mó mahraréna,

Arega miraónayabé arene arambehri miraéyabe omaq ato aniné
anonka íre karekinawire ire. *(Buk Song 16.10)*

³⁶Tébitiga oga mío tanáhráq Manikáne arambehri kawerue miraéna
wene arambehri parabaruoataq putiowara itene igaqnaréh maisarórabeq
maisarówe. Maisarówana Tébitine anonka kárékúwana ³⁷Manikánka
iriatena oganúq atárái aniné anonka íre kárékuraire. ³⁸Minayabe
teiníboq írátíáhro. Sísaga miraurainsabé itene ahbabáq kaqiuwahráhire.
³⁹Mósisiga sehgióro ú ehwehka itene ahbabáq íre kaqiuwahráhire.
Sísansabé aiq pútare atonayabé itene ahbabáq moke kaqiuwahráhire úwe.

⁴⁰Poraga mó mahraréna, Naho saíyó ké tahnsa míyehboq néne ehweh
kawerue írátíáhro. Mi keyábé Manikáne ehweh irarú aninká naho
sehiranue mahraréna,

⁴¹Íre aiq pútare ainteq peh niwirého keo, tagaríáhro. Ite áhtenég
pukoneheqmóe. Ite míéhra tanáhráq anotah pagégé árámbehri
mirainauge. Wehukega mi arámbehri teiétáq tahirímé itega
sensabé íre aiq pútare arítáh irino úwe teriuwe.

⁴²Porane ehweh parabagútaq wereq Páhnábásareqka Asiu kené
momiwí nahtápéqté tueyokuye. Tueyokuyara mibeqté kégá sensabé, Mó
ahrena ahrena wehekáh arega teiena ehwéh mahtaq mónkakáq sereiyo
uwe. ⁴³Momiwí nahtápéqté kégá abae agutaq áhnte Asiu kereq Asiu
kené sánsá mirau kereqka Porareq Páhnábásareq kérírówe. Kérírówara
Porararéga ehweh teriera, Manikánka ite séhréh aitankeheéq wene sánsá
kawerue sehgióro uye.

Asiu ke suera nahnso ke koreríuya ehwehne.

⁴⁴Mó ahrena ahrena wehekáh mi ke suwahpepte ké peh íregáritaq kégá
Manikáne ehweh iraneheéra momiwíuríówe. ⁴⁵Sísansabé íre aiq pútare
atáh Ásíu kégá áhnte wehekéq momiwíuríówara tagotaq sene sirupipeq
págegeéra abiahnsanuwe. Minayabe sega Poransabé awiréh atera,
Arega iraréna ehwéh íre aiq pútaq ehwéhne atówe. ⁴⁶Atówara Porareq
Páhnábásareqka íre áhreia peh pahsuqme teríuye. Teriera, Itega Asiu ke
míáh púata téh itega teiuye. Itega, Manikáne ehwehnsabé iuwahriehre
éq oga mérapeqsábé íre iuwahbehnsabé ite iuweta mó ke nahnso ke
koreriéyéhe. ⁴⁷Manikáne ehwehka irarinserahnue mahraréna,

Nahnso ke sunkíkírirabeq kawerue nogigéhboq kánég
keráhnserahnue itega kaweq ehwéh koreriéro. Mah kehiná kéhíná
irageheéna eqmaróge ire uye.

⁴⁸Uyara nahnso kégá mi ehwéh írótaq iwíáh iwíáhéra, Manikáne
ehweh aiq kaweq ehwéhne iwíáhuwe. Oga mía míaiageheéna Manikánka

omaq sito kega Sísansabé aiq pútare atówe. ⁴⁹Sísansabé aiq pútare ató kega mitaq teri mahtaq terinuwara áhnte mibeqté kégá írówe.

⁵⁰Mibeqté Asiu kégá Porararéyábé abiahnsanéra kaweq abóáwáh ínínseq mi ke suwahpeqte ábóáwáh wéhreq eqmaq súówe. Eqmaq súówara sega Porareq Páhnábásareq síwíoqnéra sensuwahpeqte káqsúówara ⁵¹Porararéga sene sigárátáté tánáhúq aiyápóranirue poruaruóye. Itega aiq teriuyansabé amahnága mirao sansá seyene ahababáre íwíáhéra sene sigárátáté tánáhúq poruaruera Áíkónía suwahpeq pokuye. ⁵²Pokuyana Manikáne Awanka mitaq Sísa tagariáh kéné sirupipeq ména séhréh aritowara sega iwíáh íwíáhuwe.

Áíkónía suwahpeq ótaq sansámári mirauya ehwéhne.

14 ¹Porareq Páhnábásareqka Áíkónía suwahpeq pokuyataq sene sánsánéra Asiu kené momiwí nahtápéq kibekuye. Kibekéra Sísane ehweh tábúsoqme síwáhnoruyansabé áhnte Asiu kereq Káríki kereqka Sísansabé aiq pútare atówe. ²Íre aiq pútare ató Asíú kégá nahnsó keyábé, Porararéne ehwehme peh abehq éhwéhne uwara mi nahnsó kégá aiq pútare arító keyabé abiahnsanarítówe. ³Porararéga íre wahto tanáhráq mitaq méra íre áhreiá Manikáne ehweh síwáhnoruye. Mi ehwéh págegeue síwáhnoruyataq Manikánka sirupipeq págege aritowara sega ótaq sansámári mirauye. ⁴Mi ke suwahpeqte kégá íre morá íwíáhuwe. Mó kégá Porararéne ehweh aiq pútaq ehwéhne íwíáhuwara mó kégá, Írakaumo. Peh Asiu kené sánsá aiq pútaq sansáne uwe. ⁵Asiu kereq nahnsó kereq sene wahnahnseqka momiwíéra, Porararé síwíoqnéra ebahnsatate tuparuqme subonéhe íwíáhuwe.

⁶Iwíáhuwara Porararéga mi ehwéh íróyataq apubúue mitaq suera Áríkiónía marákórápéq Árisáta suwahpeq Tébi suwahpeq pokuye. Mitaqkákáq mó ayéhrápéqté ké suwahpeqkákáq teriáqme nogúye. ⁷Mi marákórápéqté ké Sísane kaweq ehwéh teriáqme nogúye.

Soriqnah ani kaweragú ehwehne.

⁸Peh morá soriqnah ani Árisáta suwahpeq tútuue míowana wenanoga soriqnah ani maqmaronsabe íre nogoráhuwe. ⁹Poraga síwáhnorútaq mi anínká kawerue irowe. Irena, Sísaga íné kaweraintahráhire íwíáhuwana Poraga we ebitáwéna wene iwíáh tagéna anotahtaq teawena, ¹⁰Irigue nogo úwana wega apubúue iriwe noguwe.

¹¹Noguware mibeqté kégá Poraga mirau tagéra anotah ehwéhnaabéra Áríkiónía marákórápéqté kéné ehweh mahraréra, Manikátarega wehukeníté úkéra iteba tumiéhye uwe. ¹²Tumíéhýe éra Páhnábásansabé sene maniká áwíq Súsie ue áwíratówe. Poransabé sene maniká áwíq Érémsie ue áwíratówe. Poraga áhnte ehwéhnúnsabe, We Érémsi tahnsá ánine éra Érémsie ue áwíratówe. ¹³Sene maniká Súsinsabé iwíáh íwíáh

ató nah sensuwahpeq ahnansahrapeq kowe. Súsine ehweh mibeq mahbeq arítéh áninká káhoakáq awanká aramarínkákákq ogesáh ogesáhrapeq mewena súwe. Segá, Porareq Páhnábásareqsabé manikátare wóye íwíáhéra titironeherauwe.

¹⁴Titironehera uwara íre mirao sansá miraonehera unsabé mi kegá túbáh agigeheéra Porararéga sene ambanta subansúóye. Subansuera wehuke míórabeq pehbeheráh pokue anotahtaq ehwehnéra, ¹⁵Aneqsabé miraoo? Peh ite tahnsá wéhúké míóye. Íre miraoro. Itega kaweq ehwéh teieyeheéta súye. Írátíáhro. Maniká we oga mía míai aní míre. Wega íópeqkákákq mah marákó márakóákákq sóreq wanínkákákq moke kéh náneqmarínkákákq mirarowe. Péhepehe maníkánsabé iwíáh íwíáho sansá sueq Manikánsabe áhraboro. ¹⁶Naho wehukega seyene mirau sansánuwana Manikánka pehagaritowe. ¹⁷Íópeqté ibonsúno atéhrana ibonsirana ménsámehnsá kawerue kíréhre. Kawerue kíréhrena iyahbankirehraq itene irupipeq eyoyóire. Minayabe wega ite kaweraitena aiq pútaq míóge éna aiq sokigi aíre uye.

¹⁸Mi ehwéh iraruyara titironehe íwíáhu ke ebeq sene ehweh íre írówe. Íre írówara Porararéga anotahtaq págegeue ahqáho aritoyara mi kegá, Ai q mire. Itene titironehe íwíáh suanehe éra súówe.

Ebahnsatate Pora subú ehwehne.

¹⁹Ántíóka suwahpeqte Asiu kereq Áíkónía suwahpeqte Asiu kereqka mitaq séra mó ehwéh teríúnsabe mitaqté kégá sene ehweh meyówe. Mewera ebahnsatate tuparuqme Pora subúwana we marakóipeq aunúnkaq surahúwara sega, Ai q putíéhre íwíáhéra abariue ahnansahrapeq márówe.

²⁰Márówara Sísá tagaríáh kégá weba sáhuríótaq Poraga irigéna mi ke suwahpeq kouwekúwe. Ahbiah tahnsá Porareq Páhnábásareqka mitaq suera Tébi suwahpeq pokuye.

Sísá tagaríáh ké págegeue míageheéra síwáhnoréra aboawah weh omaq sitóya ehwéhne.

²¹Sega Sísane kaweq ehwéh Tébi suwahpeqte ké teríúyara áhnte kegá Sísansabé aiq pútare atówe. Ai q pútare atówara Porararéga mitaq suera Árísáta suwahpeqkákákq Áíkónía suwahpeqkákákq Ántíóka suwahpeqkákákq kouwekuye. ²²Kouwekéra Sísá tagaríáh ké págegeue míageheéra síwáhnoruye. Síwáhnoréra, Túbáh agiehboq Sísá kawerue kéráho éra Sísane ah íre mareqmareq ahne. Ebeq mó kegá íwíóqnehraq anehe Manikánka wahnah wahnahnirabeq pokoneheqmúne uye. ²³Sísá tagaríáh kéréq wahnahnigeheéra Porararéga mó mapéq mó mapérué aboawah weh omaq sitóye. Omaq sitera táhutahuq awehriue mahraue púreréra, Maniká Iteriboo, síósirapéq wahnahnira kegá arensabé aiq pútare atáhwe. Arega se págege arite wahnahnarito ue púreruye.

Písíría marákó Ántióka suwahpeq seuwekuya ehwéhne.

²⁴Porararéga mitaq suera Písíría marákórápéq kotaikue Pámbíría marákórápéq pokuye. ²⁵Mitaq Péríga suwahpeq Sísane ehweh teriera suera Átáría suwahpeq pokuye.

²⁶Mitaq suera sípi kéwewera kure Ántióka suwahpeq kouwekuye. Mitaqté Sísá tagaríáh kéga eqmaq suanehe íwíáhéra púreruwe. Manikánka Porararé séhréh aritankeheéra púreréra eqmaq súówe. Eqmaq súówara sega Sísane ehweh kawerue teriera sene arambehri parabarúoyansabé Ántióka suwahpeq seuwekuye. ²⁷Seuwekuyataq sega Sísá tagaríáh ké momiwí arítóye. Momiwí aritera Manikánka séhréh arito ehwehnikákák áhnte nahsónká Sísansabé aiq pútare ató ehwehnikákák teríuye. ²⁸Teriera sega íre wahto tanáhráq mi ke suwahpeq Sísá tagaríáh kébá mía míauye.

Tábúsoq marageheéra eqmaq súo ehwehne.

15 ¹Táhmaro Súría marákórápéqté kéga Ántióka suwahpeq tuera Sísá tagaríáh ké síwáhnoruwe. Síwáhnoréra, Peh morá Mósísine sánsá sehgió ké sene síú amurúruáh kéga oga mérapeq awaq miahráhowe uwe. ²Uwara Porareq Páhnábásareqka mi ehwéhnsábé anotah ahqáho arítóye. Minayabe sereq tú kereqka anotah ehwéhuwe. Anotah ehwéhuwara Ántióka suwahpeqte Sísá tagaríáh kéga Porareq Páhnábásareq táhmaro mó kereq omaq sitera Sarúsarama suwahpeq pokoro arítówe. Sarúsarama suwahpeq Manikánka eqmaro kereq Sísá tagaríáh ábóawáh wéhreqsabé mi ehwéh tábúsoq marageheéra Porareh pokéwáhro arítówe.

³Sísá tagaríáh kéga pokéwáhro arítowara sega Pónísía marákóákák Sámáría marákóákák kótaikuwe. Kótaikutaq mitaqté Sísá tagaríáh ké teriera, Nahnsó ke Sísansabé aiq pútare atówe ue teríuwe. Teríuwara moke sirupipeq iwíáh íwíáhéra eyoyóuwe.

⁴Porarehga Sarúsarama suwahpeq sutaq mibeqté eqmaro kereq Sísá tagaríáh ábóawáh wéhreq moke Sísá tagaríáh kéreqka mehweh arítówe. Mehweh arítowara Porarehga Manikánka séhréh aritena moke miraú naneqkakaq teríuwe.

⁵Teríuwara táhmaro Sísansabé aiq pútare ató ke Péhrasi kené sánsá mirao kegá irigéra mahruwe. Mahraréra, Nahnsó kegá oga mérapeq awaq miagéhboq Mósísine áú amurúruto sánsá miraoro terio. Mósísiga sehgióro ú ehweh anterúéhboq kawerue sehgióro terio uwe.

⁶Eqmaro kereq Sísá tagaríáh ábóawáh wéhreqka mi ehwéhnsábé iwíáhoneheéra momiwíéra sío síouwana ⁷Pítaga irigéna sensabé, Nanuwahraho, ite tagariarome naho nahnsó kegá kaweq ehwéh irera aiq pútare atageheéna Manikánka ite míaraunarabeq omaq intáráire. Omaq

intena, Korerio aintáráire. ⁸Manikánka wehukene sirupipeq tagariéhre. Wenawa iteba eqmaq áúwátáinserah nahnso keba moq eqmaq áúwátáire.

⁹Wega íre peh morá ite Asiu keyábé arutaboire. Wega nahnso keyábé moq arutaboire. Sega Sísansabé aiq pútare atáro puara sene sirupipeq kawerarítáráire. ¹⁰Aneqsabé Maniká áwioqnaho? Mósísiga sehgióro ú ehweh sehgie sansa anotah pagégé sánsáne. Itene igaqnaréhreq itereqka mi sansá íre tábúsoqme sehgióráhúne. Minayabe itega aneqsabé nahnso ke mi pagégé sánsá sehgióro terieo? ¹¹Íre mi sansá sehgiunaga oga mérapeq awaq miahráhúne. Peh morá itereq nahnso kereq Sísansabé aiq pútare atonaga oga mérapeq awaq miahráhúne úwe.

¹²Pítaga mi ehwéh irarue parabaruowara Porareq Páhnábásareqka momiwíuríó ke ehweh teríúyara ehiya míówe. Porararéga nahnso ke míópi Manikánka séhréh aritena ótaq sansámári miraurai ehwéh teríúye.

¹³Teríúyana sene ehweh parabagútaq Sémísiga mahraréna, Nánuwahraho, néne ehweh íráhro. ¹⁴Manikánka nahnso ke we kahnáh míageheéna omaq sitáráire. Wega téh miraurainsabé Sáímóniga aiq teíre.[§] ¹⁵Manikáne ehweh iraru kegá minayabe aiq monseráh éhwéh teiúwana Manikáne ehwehnka aiq mahraréna,

¹⁶Itene anotah Wahnáhnká mahraréna, Nah sokogi inserah Tébiti kahnáhmé ahabárowe. Íné kouwekutaq sokogi nah pankeráhnserah íné Tébiti kahnáh kaweraritaníe. Sokogi nah pankeráhwana o nah tahnsa kéhnserah íné we kahnáh kaweraritaníe. ¹⁷Mó kegá íné sene Wahnahnsabé ninebahrigeheéna kaweraritaníe. Ómi ínéga omaq sitó náhnsó kegá ínénsabe ninebahréra iwíáh íwíáh aintagehé ire.

¹⁸Naho itene anotah Wahnáhnká áwahewé sína naneq aiq teiuwe úwe.

Awehrio naneqsabé éhwéhne.

¹⁹Sémísiga mó mahraréna, Íné iwíáhume Manikánsabe áhrabo nahnso kegá Maniká kéréh sánsá sene sirupipeq umeh agínehboq ahqáho ariteho. ²⁰Peh mahrarue páhsi sehiranue terienéhe. Terieq,

Péhepehe manikánsabe iwíáh íwíáhoneheéra titirirataq náira naneq íre nahro. Mó kené ahrewe ahriariwe wehwe mahbiwe íre abarioro. Wehukénká awio páríkí náneq ka íre nahro. Korahq íre nahro.

Mahraue páhsiipéq sehiranue terienéhe. ²¹Mósísine ehweh ahrena ahrena wehekáh Asiu kené momiwí nahmáritápéq ahriahri sáhnsáhówe. Wene ehweh moke mi kehiná suwahpeq síwáhnorowe. Minayabe wene ehweh író kega abiahnsaniyeho éra peh morá teiú náneqmarínsabé awehrioro ue páhsiipéq sehiranue terienéhe úwe.

§ 15.14 Árukaga Pítane mó awíqmé Sáímónie áwíratowe.

Páhsiipéqté éhwéhnsábé éhwéhne.

²²Eqmaro kereq Sísa tagariáh ábóawáh wéhreq moke mó Sísa tagariáh kéreqka Ántióka suwahpeqte ké korerigeheéra kaweq ke omaq sitanéhe íwiáhuwe. Segá itebaté téhtaré áníté Sáírásareq Súrása we mó awíq Pásábareq omaq sitowe. ²³Omaq sitera mi anitéreq Porareq Páhnábásareq mi pahsi siera eqmaq súówe. Páhsiipéqté éhwéhnká mahraréna,

Síría marákórápéqté kéreq Sírísía marákórápéqté kéreq Ántióka suwahpeqte kérero, ite nahnso ke owanawé Sísa tagariáh púaq iteruwahrah úkowe. Ité eqmaro kereq abowah wehreqka mah pahsi sehiranue teiune. ²⁴Ite írátáúnawe menah táhmaro mahtaqté kégá iteba kure íwáhnoruruwe. Mi ke íre eqmaq súátáunara peh seyega iwíáhue iteba pokue íwáhnoruruwe. Itega sene ehwéh aiq pútaq ehwéhpómo éq iwíáh kikiruruwe.

²⁵Minayabe itega sío síoéq iteba Porararé moráráq iteba eqmaq súáhna anité omaq sitone. Porareq Páhnábásareq itene kaweq iyáhnábó áníté méq sensabé irutaboirúne. ²⁶Sereq itene Wahnah Sísa Karáhé éhweh terieyeheéra wehuke suboráho ke suwahpeq poku pokuóye.

²⁷Mó anité síwíq Súrásareq Sáírásareq míehye. Segá sehiranu ehwéh moq teigéhe.

²⁸Manikáne Awanka iwíáh aitéhraq itega págege sansámárí íre teieq peh mahraue miraoro teiune.

²⁹Péhepehe maníkámárínsábé iwíáh íwíáhoneheéra titiré náriu naneq íre nahro. Korahq íre nahro. Wehukenínká awio páríkí náneq ka íre nahro. Mó kené ahrewe ahrariwe wehwe mahbiwe íre abarioro.

Itega mahna irarúna ehwéh íréhrataqmé kaweqtaq míagehe.

Pehénáe. Mah pahsi aiq parabagire. Iroro uwe.

³⁰Eqmaq suowara sega pokue Ántióka suwahpeq tuera sega Sísa tagariáh ké momiwí aritera pahsi náriúwe. ³¹Náriúwara sáhnsahera mi pahsíipéqté éhwéhnká sirupipeq eyoyó aritowe. ³²Súrásareq Sáírásareq Manikáne ehweh iraruya anité méra Sísa tagariáh ké págegeue míageheéra sega áhnte ehwéhne síwáhnoruye. ³³Síwáhnoréra táhmaro wehekáh mitaq méra seuwekoyehe íwíáhuyara pehwehruwe pokéwáhtao éra eqmaq súówe. [³⁴Sáírásaga mó iwíáhéna íre pokia peh mitaq míowe.] ³⁵Porareq Páhnábásareqka Ántióka suwahpeq kauye. Sereq áhnte mó kereqka Síssane ehweh teriera síwáhnoruye.

Porararéga Máhkansabé ehwehuya ehwéhne.

³⁶Táhmaro wehekáh sótaikútaq Poraga Páhnábásansabé, Síssane ehweh síwáhnorurauya ke suwahpeqtaq seuwekoyehe. Sísa tagariáh ké kaweqtaq míahwapómo moke sensuwahpeq koragayehe úwe.

³⁷Úwana Páhnábásaga, Sóni we mó awíq Máhkaga sénirahnata pokoyehe úwe. ³⁸Úwana Poraga ahqáho atena, Itega Pámbíría marákórápéq pokurayataq Máhkaga mitaq ite iuwena tabanaguraire. Mi tanáhráq wene arambehri íre parabarusa pehipi taqnobagurainsabé wega mó íre séirankéhe úwe.

³⁹Mira íwíáhuyansabé sega ehwehuye. Minayabe Páhnábásaga Pora auwena Máhka meqmena sípi kéwewena Sáipára marákórápéq pokúwe. ⁴⁰Pokúwana Poraga Sáírása omaq atowara Sísa tagariáh kégá monseráh íwíáhéra, Pokéwáhtao éra mahrarue púreruwe. Púreréra, Maniká Iteriboo, arega mah anitéyábé arutaboirona puah kawerue págege arite séhréh arito uwe. ⁴¹Uwara Porareq Sáírásareqka pokue Síria marákóákáq Sírisía marákóákáq Sísa tagariáh ké momiwíurabeq págege aritayeheéra síwáhnoruye.

Tímótiga Porarehreq poku ehwéhne.

16 ¹Porararéqá Tébi suwahpeq kótaikéra Árisáta suwahpeq suyana mibeqté Sísa tagariéh aní wenáwíq Tímóti míowe. Wenano Sísa tagariéh Asiu iní míowana wenabo Káíríki aní míowe. ²Árisáta suwahpeqte Sísa tagariáh kégá Tímóti kaweq aníne uwara Áíkónía suwahpeqte Sísa tagariáh kéreqka moq monseráh íwíáhuwe. ³Poraga iwíáhéna, Tímóti ite séirankéhe íwíáhuwe. Ómi mibeqté Asiu kegá tagariómé Tímótine abowá peh Káíríki aní míowe. Káíríki aní mío púana Poraga iwíáhéna, Tímóti ite séireyabe Asiu kegá abiahnsa aitého éna Tímóti meqmena wene áú amurú auwowe.

⁴Porareq Sáírásareq Tímótireqka mó ke suwahpeq mó ke suwahperue pokue Sísa tagariáh ké síwáhnoruwe. Síwáhnoréra Sarúsarama suwahpeqte eqmaro kereq Sísa tagariáh ábóáwáh wéhreqne páhsi teri terinuwe. Teriera, Mah ehwéh kawerue iwíáhéq sehgióro uwe. ⁵Minayabe Sísa tagariáh kégá Sípane sánsá kawerue ahtebéra sehgiówe. Mó wehekáh mó wehekáhnue mó kegá Sísansabé aiq pútare atera Sípane sánsá sehgiówe.

Porane awanka Másérónía marakórápéqte aní tagó ehwehne.

⁶Porarehga, Itega Esia marákórápéq Sísa éhweh korerienéhe íwíáhuwana Manikáne Awanka ahqáho aritowe. Ahqáho aritowara sega Párigía marákóákáq Kárétía marákóákáq kótaikuwe. ⁷Kótaikéra Mísia marákórápéq wahtotaq kéra, Pítínía marákórápéq Sísa éhweh korerienéhe íwíáhuwe. Iwíáhuwana Sípane Awanka mó ahqáho aritowara ⁸Mísia marákórápéq kótaikuwe. Kótaikéra Tóása suwahpeq sóreq waní ayehrápéq túwe.

⁹Mitaq inokáhpq Porane awanka tagówana Másérónía marákórápéqte ánínká ábóraragúwe. Ábóraragéna iriwe ména Poransabé, Másérónía

marákórápéq séhréh aitagéhboq máhoro éna pahibahirúwe. ¹⁰ Porane awanka tagónsabe itega iwíáhowame^h Manikánka mitaq Sísa éhweh koreriéro aitéhre. Aiq teiátáinsabé ireq ite Másérónía marákórápéq pokoneheqmúne íwíáhéq apubúue sokah sokahowane.

Áríriaga Sísa kéro ehwehne.

¹¹ Itega Tóása suwahpeq sueq sípi kéweweq Sámótési marákórápéq pokowane. Mitaq séq mó wehekáh sueq sípi kéweweq Néápórisi suwahpeq kowane. ¹² Mitaq sípi sueq Pírípái suwahpeq kiowáne. Aroma kegá Pírípái suwahpeq téh nah aborisowe. Mitaq anotah matábú kéna moke Másérónía marákórápéqté matábú kiotaqme matabu kowe. Itega táhmaro wehekáh mitaq kowíahwane.

¹³ Ahrena ahrena wehekáh itega ahnansahrapeq wání aroipéq pokowane. Ite iwíáhowanawe, Mahtaq ibora wehukega púrerowe íwíáhéq tunse áhnopeq tútuue míahwane. Mibeqté momiwúrió ininsó Sísa éhweh teriewáne.

¹⁴ Peh morá íní wenáwíq Áríriaga itene ehweh irena we Táíyátáira suwahpeqté íní ména wene arambehriwe tautáúq ámbántámári paiqmaq paiqmarúwe. We Manikánsabe iwíáh íwíáh ato iníne. Poraga ehweh irarútaq we kawerue irankeheéna Manikánka mi iní séhréh atowe.

¹⁵ Séhréh atowana irowaq itega wereq wene nahtapeq kaegaeu kereq wání meriewáne. Meriewánana mi inínká itensabé, Íné Sísansabé aiq pútare atóge íwíáhirataq néne nahtapeq segaegaeoro úwe. Segaegaeoro únsabe itega wene nahtapeq kogaegaeowane.

Poraga owainawa kaqauwo ehwehne.

¹⁶ Itega wehuke púrerorabeq pokowanaraq mó kené arambehri ahrárireq ahtapeq piehgiowáne. Wene arupipeq mío owáínáwánká mókake aiq pútaragína ehwéh iwíáh atowana mi ahrárigá irarúwe. Irarúnsabe mó kegá móné náwa náwanuwana wene wahnah anímári nári nárínúwe. ¹⁷ Wega Porareq itereq séirena sawai sawaiéna, Mah kewé Manikáne arambehri ke wóe. Manikámé anotah págege aní míre. Segá Manikáne oga mía mía ehwéh teri terinowe úwe.

¹⁸ Áhnte wehekáh mi ahrárigá ite séirena mi ehwéh irare irareúwe. Minayabe Poraga iwíáh kikiréna wega pabeqme owainawansabé, Sísa Karáhé áhrabu puah mi ahrári auwe pokúno atoge úwe. Úwana mi tanáhráq owainawanka mi ahrári apubúue auwena pokúwe.

Pírípái suwahpeq Porararé karábúsiipéq mórító ehwehne.

¹⁹ Mi ahráriné wahnahmarínká iwíáhéra, Owainawa kaqauwéhрана poki puaq ite mókake mó moné íre meyhárhune éra abiahnsanuwe.

^h 16.10 Mó kegá iwíáhéra, Áríka mah pukú sehiranú anínká táhmaro tanáhráq Porareh kérirowe íwíáhowe.

Abiahnsanéra sega Porareq Sáírásareq táhtoqme abariuera mi ke suwahpeqte wáhnáhmáripá máhkétirapéq mórítowe. ²⁰Móritera wahnah keyábé, Mi anité Asiu anité méra iteruwahpeq ahbabáq sansanóye. Seyene sánsá miraoro éyame íre kaweróye. ²¹Ite Aroma ke míona puaq sene sánsá íre miraúna sansáne uwe.

²²Uwara mitaq momiwíu kereqka ehweh arítowara wahnah kegá Porararéné korósi keqsúowe. Keqsuera, Morahri sahtáté subóro arítowara subúwe. ²³Anotahtaqaq subera karábúsiipéq móritera mibeqté wáhnáhnsábé, Kawerue wahnahnúno atówe. ²⁴Kawerue wahnahnúno atówana wega se meriqmena karábúsi nahtápéq ákáhpíte máhrípíépéq mórítowe. Móritera sene sigárátaré awanká abahrabahriapíépéq sukiwe táhparówe.

²⁵Táhpárovara inokáhnabubu Porareq Sáírásareqka púreréra igonkónéra Manikánsabe iwíáh íwíáh atóyara mó karábúsíépéq míó kega tótuqméra írówe. ²⁶Írówana anotah maríúwana karábúsi nah míu míuúwana moke onsawári apubúue pehipi siraragúwe. Siraragúwana ómi karábúsi kené séniwarí wewega pugetara agúwe.

²⁷Karábúsi wahnáhnká sugorabeqte irigéna onsawári siraragú tagówe. Tagéna, Karábúsi ke moke taqnobagowe íwíáhúwe. Mira íwíáhú púana wene poka mewena apubúue pukinieéna néne ninonka sehsabianíe íwíáhúwe. ²⁸Sehsabianaútaq Poraga anotahtaqaq áhrabéna, Arene anonka sehsabíéhnehboq túbáh agúno. Íte moke míone úwe.

²⁹Úwana karábúsi wahnáhnká wene arambehri anínsábé, Kánéq keqme súno éna pehbeheráh karábúsiipéq kibekúwe. Kibekéna áhreu púana Porararéné paqnahipeq pokue iransánéna arehunseraráq míowe. ³⁰Wega Porararé máhpeq márunsitena sensabé, Árahonaga oga mía míaininkono ue kasenúwe.

³¹Kasenúwara sega wensabé, Sísansabé aiq pútare atéhnaraqmé oga mía míainkehe. Arenawahraheq moq oga mía míaiagehe uye.

³²Porararégá wereq wene nahtapeq kaegau kereqsabé itene Wahnah Sísa éhweh teríúye. ³³Teríúyana mi tanáhráq karábúsiipéqté wáhnáh Porararé meriqmena puramburanagú pabeq paberaritowe. Pabeq paberarítowara Porararégá wereq wene káironanínseq wání náriúye.

³⁴Wání náriúyana mi wahnáhnká Porararé wene nahupeq meriqmena táhutahuq náriuwe. Wereq wene káironanínseqqa Sísansabé aiq pútare atónsabe sene sirupipeq eyoyóúwe.

³⁵Ahbiahipeq mi ke suwahpeqte wáhnáhmárinká párisireh síáhrabéra sensabé, Karábúsiipéq mórítáro anité pugeq suo koreawéro uwe.

³⁶Koreawéro uwara karábúsiipéqté wáhnáh koreawúwana Pora mi ehwéh teawuwe. Teawena wensabé, Wahnah kegá siqmaráh párisíwárinká, Ite pageqsuo aiq teniéwe. Minayabe tueyokue pehwehrué pokéwáhtaó úwe.

³⁷Úwana Poraga párisiwarínsábé, Ite íre peh Asiu anité úye. Ite moq Aroma marákórápéqté ánité úye. Segá íre tábúsoqme ehwéh aitasa

pehipi iubiꝓ marera karábúsiipéꝓ móítárówe. Segá amahnága kopípéꝓ kaꝓiwagéhbo? Ahqáho. Seyega séra ite pugeꝓme máhꝓeq iuwagéhe uye.

³⁸Uyara párisiwarínká wahnah keba kouweꝓe mi ehwéh teríúwe. Teríúwara wahnah kegá ite Aroma marákórápéꝓté áníté úya ehwéh írónsabe áhreuwe. ³⁹Áhreéra Porararéba sure sensabé, Ité Aroma marákórápéꝓté áníté míehyame íre írátíaraune. Minayabe íre kaweruraune éra máhꝓeq márunsitera sensabé, Mahtaꝓ sueta pokotao uwe. ⁴⁰Uwara Porararéꝓ karábúsiipéꝓ suera Áríríane nahtaꝓeq pokuye. Pokéra mitaꝓ Sísá tagariáh káyábé kaweq ehwéh iraréra sensabé, Sísane sánsá kawerue sehꝓíro aritera pokuye.

Tésárónáíka keꝓa, Porararé subonéhe u ehwéhne.

17 ¹Porarehꝓa pokue Ámbípóri suwahꝓeq sótaikéra Ápórónía suwahꝓeq sótaikéra Tésárónáíka suwahꝓeq kéra mitaꝓ Asiu kené momiwí nahtápéꝓ kuwe. ²Ahrena ahrena wehekáh Poraga wene sánsánéna mi nahpípéꝓ kibekue síwáhnorúwe. Asiu kené ahrené wehekáh apahtáro áhrená áhrená wéhékáh kibekue Manikáne púkuipéꝓté séhírá síwáhnorúwe. ³Síwáhnoréna, Mó kegá Manikánka omaꝓ ato aní áwíoqnéra subiq sutowana pukéna mó oga úkuraire. Manikáne ehwehꝓka minayabe aiꝓ irarire. Manikánka omaꝓ ato anímé íné teiú aní wenáwíꝓ Sísá wire úwe.

⁴Úwara táhmaro Asiu kegá mi ehwéhnsábé aiꝓ pútare atera Porareꝓ Sáírásareꝓ kobaritawe míówe. Manikánsabe áhteno Káríkí kéreq áhnte aboawah inínsónseqka moꝓ kobaritawe míówe.

⁵Minayabe íre aiꝓ pútare ató Asiu kegá abiahnsanuwe. Abiahnsanéra ahbabáꝓ ke pehipi máhkétirapéꝓ nogó ké meriqmera momiwíue anotahtaꝓ ehwehuwe. Porararé wehuke momiwíurabeꝓ móritankeheéra wehukení wenáwíꝓ Sésónine nahtaꝓeq pehbeheráhnue pokuwe. Pokue wene nahtaꝓéꝓté ónsá subiqme sueruera Porararéyábé sinebahruwara íre míóye. ⁶Íre míóyansabé sega Sésónireꝓ mó Sísá tagariáh kéreq abariuera mi ke suwahꝓeqte wáhnáh kéba móritówe. Móritera ehwehéra, Moke mah nahnsó ke ahbabárarítóya anitéꝓa suroyataꝓ ⁷Sésóniga wene nahtaꝓeq mehweh aritowe. Mi anitéꝓa itene anotah wahnáh aní Sísáhrine sánsá íre mirauroye. Íre miraia peh iraréra, Mó Wahnáh aní Sísae iraruye uwe.

⁸Uwara mi ke suwahꝓeqte kéreq sene wahnah kereꝓka mi ehwéh írótaꝓ kurináhnéra abiahnsanuwe. ⁹Sega Sésónirehyabe, Kotiyabé ite móne paiꝓmáráhro éra sene móne mewera kaꝓsúówe.

Porareꝓ Sáírásareꝓka Péría suwahꝓeq arambehriuya ehwéhne.

¹⁰Íó penkúwara mibeꝓté Sísá tagariáh kéꝓa Porareꝓ Sáírásareꝓ Péría suwahꝓeq eqmaꝓ súówe. Eqmaꝓ súówara Péría suwahꝓeq suyataꝓ Asiu

kené momiwí nahtápéq kibekéra síwáhnoruye. ¹¹Síwáhnoruyara mibeqté Asiu kegá irera Manikáne ehwehnsabé kawerue iwíáhue tagowe. Sene iwíáhga Tésárónáika suwahpeqte kéné iwíáh kiotaikúwe. Segá Porane ehweh írótaq sirupipeq eyoyóue Manikáne sehira mó wehekáh mó wehekáhnue sáhnshawe iwíáhue tagéra, Porane ehweh aiq pútaqpomo éra iwíáhue tagowe. ¹²Minayabe áhnste Asiu kegá aiq pútare atówe. Sereq mó áhnste ke, Káríki anotah weh áhrégá moq aiq pútare atówe.

¹³Poraga Manikáne ehweh Péría suwahpeqkákáq teríre uwara Tésárónáika suwahpeqte Asiu kegá írówe. Irera Péría suwahpeq séra mibeqté keyábé, Porane ehwehnsabé aiq pútare atehboq íre íráhro ue pagu pagunuwe. ¹⁴Pagu pagunuwara mibeqté Sísa tagaríáh kegá Pora apubúue sóreq waní ayehrápéq eqmaq áúwówe. Eqmaq áúwówara Sáírásareq Tímótireqka peh mitaq míóye. ¹⁵Míóyara ah tagaríáh kegá Pora meqmera Áténi suwahpeq márúnátówe. Márúnátówana wega sensabé, Sáírásareq Tímótireqsabé, Peheráh setao teríero úwara pokuwe.

Poraga Áténi suwahpeqte ké teríu ehwehne.

¹⁶Poraga Áténi suwahpeq síwénunútaq mibeqté kegá áhnste péhepehe maníkáne atah naneq kowana tagéna wene arupipeq págege agúwe.

¹⁷Minayabe Poraga Asiu kené momiwí nahtápéqté kéreq Manikánsabe iwíáh iwíáh ató kereqsabé ehwehnuwe. Máhkétirapéq mó wehekáh mó wehekáhnue su kereq moq ehwehnuwe.

¹⁸Táhmáro mibeqté síwáhnoru kegá Porareq piehgiera áhnste ehwéh kíkírue ehwehnuwe. Mibeqté su kegá táhmáro Épíkúriane sánsá ahtebowara mó tahmáro kegá Sítóíkine sánsá ahtebowe. Táhmáro kegá seye náhenéra, Áhnste ehwéhnkákáq ání aneq ehwéhnkákáq ánípo uwe. Poraga Sísa oga úkú ehweh teriunsabe mó kegá, We wáhnauapéqté máníkámári éhweh tei teinire uwe.

¹⁹Segá Pora meqmera Áréópágúsa sawéhráq ahtebia kegá momiwíurabeq móátówe. Móatera wensabé, Arega síwáhnoróna ehwéh peh o ehwéh míre. Mi ehwéh teio. ²⁰Arega iraréna ehwéh áwánáh éhwéh míre. Mi ehwéhmé áwahe ahtebanehboq kawerue teio uwe. ²¹Áténi suwahpeqte kéreq mibeq wáhnauapéqté sewió kereqka ahriahri o ehwéh irera mi ehwehnsabé irare irareuwe. Seyene sánsáne.

²²Poraga Áréópágúsa sawéhráq ahtebia kegá momiwíurabeq iriwe ména mahraréna, Áténi suwahpeqte wého, ínéga iwíáhume itene manikámarinsabé áhnste iwíáh iwíáho ke wóe. ²³Iteruwahpeq nogewótáq itega iwíáh iwíáhorabeq tagéwómé peh morá táhbérápéq kéh sehírámé sáhnshawe tagéwóge. Mi sehíránká mahraréna, Mah tahbé íre tagariona manikáne tahbe wire ire. Itega íre tagarawéq pehipi iwíáh iwíáh atáhnshabé minawé teiúge.

²⁴Teiúge éna mó mahraréna, Manikánka moke mah marákó márakóipéq kéh náneqkákáq mah marákó márakóákáq mirarowe.

We mah marákó marákóákáq íopeqkákáq wahnahnatiéh aní mire. Minayabe wega wehukega pearáh náhúpéq íre kaegaei aní mire. ²⁵We íre akahrákáhri aní mire. Wewega moke wehukene irupipeqté éúqkákáq moke kéh náneqkákáq náí nánire. Minayabe wehukega we íre séhréh atáhráhowe.

²⁶Mah kehiná kéhínané igaqna peh morá áníne. Manikánka mi aní téh mirarena itene ogamé tanahráq iwíáh aitéhre. Mah marákó marákórápéq mó kehiná mó kehinánsábé, Míáhro aitéhre. ²⁷Itega Manikánsabe kabarigeheéna mira íwíáh aitéhre. We tagarianeheéq kabarúne. Ite ómi kehiná mionarabeq we wahtotaq míéhre. ²⁸Maniká ména mira aruqaruri puaq itega oga míahrahúne. Iteba sehira tagariéh ánínká aiq mahraréna, Ite moke wene animárine ire. ²⁹Ite Manikáne animári míona puaq we peh wehukega iwíáhue mirao naneq mire íwíáhiyeho. We íre ebahtaté miraia aníne. We íre móneraté miraia áníne.

³⁰Naho wehukega Maniká íre tagaríowe. We íre tagariarera, We peh wehukega iwíáhue mirao naneq mire íwíáhuwe. Mi tanáhráq Manikánka mi kewé peh áwé tagówe. Amahnága wega mah kehiná kéhínánsábé, Itene ahababáq sansa súáhro ire. ³¹Manikánka peh morá aní omaq atena wega iwíáhhína tanáhráq mi anínká mah kehiná kéhíná tábúsoqme ehweh aritankéhe. Minayabe mah kehiná kéhínánká tagariageheéna Manikánka mi aní iriatena oganúq atáráire úwe.

³²Mió kega oganúq atárai ehwéh írówe. Táhmaro kegá awiréh atówara mó kegá Poransabé, Arene ehweh mókake mónkakáq iranéhe uwe. ³³Uwana Poraga mitaq suena pokúwe. ³⁴Pokúwara táhmaro wehwárinká we kerera wene ehwehnsabé aiq pútare atówe. Peh morá aní aiq pútare ato aní wenáwíq Tíónísíae. Wereq mó ahtebia kéreq Áréópágúsa sawéhráq momiwíue aruqaruruwe. Peh morá íní wenáwíq Támárisae. Wereq mó kereqka Pora kerera wene ehwehnsabé aiq pútare atówe.

Poraga Kórína suwahpeqte ké teriu ehwehne.

18 ¹Poraga Áténi suwahpeq suena Kórína suwahpeq pokúwe. ²Póntúsa marákórápéqté aní wenáwíq Ákúira míowana wene ahre awíq Párisírae. Se Asiu akéq menah Ítári marákórápéq míoyana mibeqté wáhnáh aníne áwíqtare Káróríusa Sísáhríe. Mi wahnáhnká moke Aroma suwahpeq míó Asiu keyábé, Pokoro aritena kaqsuowara Ákúira akéqká Aroma suwahpeq suera Kórína suwahpeq kowíoye.

Poraga mitaq se tagéna sene iyahnabo aní úkúwe. ³Wereq sereq peh morá árámbéhríuwe. Sene arambehriwe wéhuwehu nahmári piageheéra sériwarí kogahnue kawerarówe. Wereq sereqne arambehri peh monseráh púana seba kobaritawe míowe. Wereq sereqka moráráq arambehriuwe. ⁴Moke ahrena ahrena wehekáh Poraga Asiu kené momiwí nahtápéq Asiu kereq Káríki kereqsabé Sísá éhweh terinieéna poku pokuúwe.

⁵Sáírásareq Tímótireqka Máserónía marákórápéq suera Pora miorabeq suye. Segá suyataq Poraga Manikáne ehweh Asiu ke teri terinéna, Manikánka omaq ato anímé Sísae úwe. ⁶Úwara író kega mi ehwéhnsábé ahqáho atera íre kaweq ehwéh atówana wega sensabé, Aiq mire. Ínéga aiq teiúge éna wene ambanta suruparuena teriuwe. Itega iraipéq pokirame iteitene irupipeqté íwíáhgae. Íné aiq pútaq ehwéh aiq teiúge. Itega ahqáho aintáhnásabé nahnso ke korerinauge úwe.

⁷Manikánsabe iwíáh íwíáh ato aní wenáwíqtare Títía Sásatae. Wene nah Asiu kené momiwí nahtápéq wahtotaruwana Poraga momiwí nahtápéq suena mi aniné nahtapeq kowíowe. ⁸Asiu kené momiwí nahtápéqté wáhnáh aní wenáwíq Kárísapae. Wereq mi karirónáninseqka Sísansabé aiq pútare atówe. Áhnte mó Kórína suwahpeqte kégá Porane ehweh irera aiq pútare atera wání meyówe.

Porane awanka tagó ehwehne.

⁹Inokáhpeq Porane awanka tagówana Sísaga wensabé, Íre áhreúno. Túbáh aginehboq néne ehweh pahsuo. ¹⁰Ínéga areba mío púara mó kegá are íre subigéhe. Kórína suwahpeqte kéwé áhnte kegá ínénsabe aiq pútare aintagéhe úwe. ¹¹Minayabe Poraga Kórína suwahpeq peh morá ópéq mó opéq ákáhtaq ména Manikáne ehweh síwáhnorúwe.

¹²Wehukení wenáwíq Káríoe. We Ákáía marákórápéqté wáhnáh míotaq Asiu kegá momiwíera Pora táhtoqme ehwehurabeq móatówe. ¹³Segá Káríonsabe, Mah anínká itega Manikánsabe iwíáh íwíáh atona sansá sueq mó sansánoro tei teinire úwe. Wega o teí sánsámé Mósísiga íre miraoro ú sansáne uwe.

¹⁴Uwana Poraga ehweh irarinaútaq Káríoga Asiu keyábé mahraréna, Asiu keo, mi anínká ahkaragáraéna anotah ahbábáritaq tahirímé ínéga itene ehweh kawerue író irino. ¹⁵Peh iteitene ehwehnikakáq wehukene síwíqkakaqsabé iteitene sánsánkákáqsabé iteitaga iwíáhue miraoro. Íre néne arambehri puana túbáh aginauge éna ¹⁶se moke ehwehurabeqte kaqsúáhro aritowe.

¹⁷Kaqsúáhro aritowara Asiu kené momiwíurabeqte náhtápéqté wáhnáh wenáwíq Sósáténi táhtoqme máhpeq subúwe. Subútaq Káríoga se peh áwé tagowe.

Poraga Ántióka suwahpeq kouwekú ehwehne.

¹⁸Poraga Kórína suwahpeq áhnte mó wehekáh ména Sénkária suwahpeq pokúwana wene ayahra káúqauwowe. Pehipi íre káúqauwowana Asiu kené sánsanéna Poraga Manikánsabe ehweh teawunsabe káúqauwowe. Káúqauwowana Sísá tagaríáh ké mitaq suena Párisírareq wenawehq Ákúírareq meriqmena sípi kéwewena Síría marákórápéq pokúwe. ¹⁹Sega sípi kéwewera Épésá suwahpeq kuwe.

Mitaq Poraga Párisírareq Ákúírareq suena Asiu kené momiwí nahtápéq kibekéna wereq Asiu kereqka ehwehnuwe.

²⁰Mi kegá Poransabé, Mahtaq míahno uwana ahqáho éna ²¹Épésa sensuwahpeq suanieútaq sensabé, Manikánka kouwekúno íwíáh aintahnaraq kouwekinie úwe. Kouwekinie éna Épésa suwahpeq suena sípi kéwewena pokúwe. ²²Sípiga Sésaría suwahpeq sútaq Poraga sípi suena kire Sísa tagaríáh ké mehweh aritanieéna Sarúsarama suwahpeq kiuwe. Mehweh aritena Sarúsarama suena Ántíóka suwahpeq tuwe.

²³Táhmáro ió Ántíóka suwahpeq ména mitaq suena pokúwe. Wega Sísa tagaríáh kéné sirupipeq kaweq iwíáh aritanieéna Kárétía marákóákáq Párigía marákóákáq mó mapéq mó mapérué nogena pokue teríaqme noguwe.

Ápóroga Épésa suwahpeqte ké ehweh teriú ehwehne.

²⁴Peh morá ání, Árékásántaría suwahpeqte ánínká Épésa suwahpeq séna wenáwíq Ápóroo. We Manikáne sehira ahtebia ání ména kawerue teri terinú ani míowe. ²⁵Mó kegá we Manikáne sansá áwáhnoruwana wega mó ke págegeue síwáhnorúwe. Peh morá Sísa éhweh ákáhtaq ahtebéna tábúsoqme teri terinéna Sóniga wání meriu ehweh moke ahtebówe. ²⁶Épésa suwahpeq Asiu kené momiwí nahtápéq págegeue síwáhnorúwe. Wega síwáhnorútaq Párisírareq Ákúírareqka wene ehweh irera móbeq meqmera we íre ahtebó ehweh, Manikáne sansá tábúsoqme áwáhnoruye.

²⁷Ápóroga, Íné Ákáía marákórápéqté ké kosíwáhnorinie íwíáhúwara Épésa suwahpeq Sísa tagaríáh kégá wensabé, Kaweróne. Kosíwáhnorúno éra mibeqté Sísa tagaríáh kégá we mehweh atageheéra páhsi sehiranue áwúwe. Manikánka áhnte Ákáía marákórápéqté ké séhréh aritowara Sísansabé aiq pútare atówe. Anehe Ápóroga mitaq séna mi ke anotahtaq séhréh aritowe. ²⁸Wega Manikáne sehira sáhn sahena, Manikánka omaq ato anímé Sísae teriuwe. Wehuke míópi págegeue teri terinúnsabe wene ehweh Asiu kené ehweh kiotaikúwe. Minayabe wega Sísansabé aiq pútare atáh ké anotahtaq séhréh aritowe.

Poraga Manikáne Awansabé Épésa ke teriu ehwehne.

19 ¹Ápóro Kórína marákórápéq míotaq Poraga sáwéhrapeq kótaikéna Épésa suwahpeq tuwara táhmáro Sísa tagaríáh ké míowe. ²Míówana Poraga sensabé, Itega Sísansabé aiq pútare atárotaq Manikáne Awanka itene irupipeq aiq tutairo ue kasenúwe. Kasenúwara sega wensabé, Ahqáho. Manikáne Awa éhweh íre írátáúne uwana ³Poraga sensabé, Aneq waní meroo ue kasenúwe. Kasenúwara sega wensabé, Sóniga wání meriátáinserah mó kegá mina tahnsa wání meraune uwe.

⁴Uwana Poraga sensabé, Sene ahbabáq sansa sutonsabé Sóniga wání meriátáire. Meriena mahraréna, Inehe sína anínsabé aiq pútare atáhro. Wenáwíq Sísaé uraire úwe. Sóniga irarú ehweh Poraga teriuwe.

⁵Teriuwara írówana itene Wahnah Sísa áwírue wání náriuwe.

⁶Poraga sensinetaba wene ayahnkaratáté táhtorotaq Manikáne Awanka sene sirupipeq tuwara sega kambare ehwéh iraréra Manikáne Awanka iwíáh arito ehweh iraruwe. ⁷Mirau kewé airápété téhranítée.

⁸Poraga Asiu kené momiwí nahtápéq kibekéna Manikánka wahnah wahnahnirabeqte éhwéh págegeue teriuwe. Teriuwara Asiu kegá wene ehwehnsabé áhntetaq kasenéra iwíáhuwe. Iwíáhuwana apahtáro íótáq miraúwara ⁹táhmaro író kega wene ehwehnsabé íre aiq pútare atera saiyouwe.

Saiyoéra momiwíurabeq Sísaé sánsánsabé íre kaweq ehwéh atówana Poraga se suena Sísaé aiq pútare atáh ké meriqmena pokúwe. Sigarurapéqté wáhnáh aní wenáwíq Tíránásae. Poraga Sísaé aiq pútare atáh ké meriqmena Tíránásane sigaru nahpípéq mó wehekáh mó wehekáhnue síwáhnoréna ehwehnuwe. ¹⁰Poraga téhtaré ópéq mi sigárúrúq síwáhnorúwara moke Esia marákórápéqté Asiu kereq Káríki kereqka Manikáne ehweh írówe.

Owainawa íre kaqsuahráhu ehwéhne.

¹¹Manikánka págegeue séhréh atowana Poraga anotah otáq sánsámári miraúwe. ¹²Minayabe mó kegá Poraga táhtoro ambántámári meyówe. Mi ambántámári awahre kebá mórúwara sene suwahre kaweragúwara owainawamarínká se suera pokuwe.

¹³Táhmaro Asiu ahgórú kewé nahnso suwahpeqtaq kégaeyaq tuegaeyaréu anímári méra owainawa kaqsuq kaqsurowe. Mi kegá itene Wahnah Sísa áwírue owainawamarí kaqsuanéhe íwíáhéra Poraga kaqsuonserah itega moq kaqsuanéhe íwíáhuwe. Minayabe sega mahraréra, Owainawano, Poraga teri terini aní, Sísa áwírue wehukení auwe pokúno teawune uwe. ¹⁴Abapete téhtaré Asiu anímárinká owainawamarínsabé mina tahnsa éhwéhnue.

Manikáne ehweh mibeq mahbeq arítéh aní wenáwíq Síkéba sibowá míowe. Wene anahwaréhga mó wehekáh mi ehwéhnuwana ¹⁵owainawanka sensabé, Sísa aiq tagaríóge. Pora moq aiq tagaríóge. Itewe inseréhbo úwe. ¹⁶Úwana owainawa wene arupipeq mío anínká seba ahkuagéna sene korósi moke subansuena subiqmaq subiqmarúwara korahq tabagu tabagúwara se pehrákora méra nahupeq suera máhpeq pehbeheráhnue pokuwe.

¹⁷Asiu kereq Káríki kereq peh moke Épésá suwahpeqte kéreqka mi ehwéh irera áhtenuwe. Minayabe mi kegá itene Wahnah Sísa áwíq pankerera iwíáh íwíáh atowe. ¹⁸Mi tanáhráq áhnte Sísa tagaríáh kegá

sure sene ahbabáq sansa pahsuqme teríuwe. ¹⁹Ahgora tagarió kega sene ahbabáq pukúwári mewera ómi wehukega tagariótaq ira paríówe. Segá mi irá paríó pukúwári árahue kehramo éra sáhnsáhúwe. Sáhnsahera, Peh íregáritaq 50 táhúséni (50,000) moné tahnsa púkúwári ira parione íwíáhuwe. ²⁰Púku ira parearónsabe Manikáne ehwehka áhnte kene sirupipeq pówara sega págege anímári úkéra wene ehweh mitaq teri mahtaq terinuwana mi ehwehka abae agúwe.

Épésa kegá Pora ehweho ehwéhne.

²¹Anehe Poraga iwíáhéna, Másérónía marákórápéqkákáq Ákáia marákórápéqkákáq pokinie. Mibeq Sísa tagariáh ké koragéna sótaikue Sarúsarama suwahpeq pokinie. Mibeq Sísa tagariáh ké koragéna sótaikue Aroma suwahpeq pokinie íwíáhúwe. ²²We kéroya anité Tímótireq Érásátireq míóye. Poraga mi anité Másérónía marákórápéq eqmaq suena we Esia marákórápéq pehgáriq tanáhráq míowe.

²³Mi tanáhráq áhnte kegá Sísansabé aiq pútare atónsabe mó kegá áhnte abíáhnsánéra ehwehuwe. ²⁴Wehukení wenáwíq Témítúsie. Wene arambehriwe káhpah tahnsa náneqtaté pehgáriq píkísah tahnsá náneq mira aruqarurúwe. Mi ke suwahpeqte kéné péhepehe maníká wenáwíq Átémísie. Témítúsireq mó kereqka Átémísine píkísah tahnsá náneq miraera paiqme áhnte moné meyówe.

²⁵Témítúsiga moke mi arámbéhrí mirau ke momiwí aritowe. Wega sensabé, Itega maniká tahnsa náneq miraonsabé áhnte moné meweúne. ²⁶Itega Porane sansá aiq tagarawéq wene ehweh aiq írátíáhwe. Wehukega mirao naneq íre aiq pútaq Manikáne tei teinire. Minayabe áhnte kegá itega mirao naneqsabé anetaníbo íwíáhowe. Íre peh morá Épésa suwahpeqte kegá áhnte Esia marákórápéqté kereqka moq mira íwíáhuwe. ²⁷Minayabe anotah íre kawerire. Itene arambehri íre kaweragíneho. Mó kegá itene maniká Átémísine nahnsabe, Peh abehq náneq nahne íwíáhiyeho. Esia marákórápéqté kereq mah kehiná kéhínánseqka amahnága Átémísinsabé, Ano iní míáhne éra iwíáh íwíáh atáhwe. Poraga wene ehweh síwáhnorinsabé mó kegá Átémísinsabé íre iwíáh íwíáh atera peh anetaníbo íwíáhiyeho úwe.

²⁸Úwara moke arambehriu kega mi ehwéh írótaq anotah abíáhnsánéra ehwehnabauwe. Ehwehnabaéra, Átémísiwe Épésa suwahpeqte kéné maniká anotah iníne uwe. ²⁹Minayabe mi kegá anotahtaq ehwehnéra keyéuwe. Téhranité Másérónía marákórápéqté anité sensíwíq Káiúsireq Árásátákirere. Poraga ahpeq nogutaq sega we kéroye. Keyéu kegá mi anité táhtoqme koti matábúrápéq abariuera mórítowe.

³⁰Poraga, Íné wehuke momiwíorabeq pokinie úwara Sísa tagariáh kegá ahqáho atówe. ³¹Táhmaro Esia marákórápéqté wáhnáh kegá Porane iyahnabo anímári míówe. Segá mó anínsabé, Pora ehweh koreawo.

Mahraue koreawe, Wehuke momiwíorabeq pokínehboq mitaq míahno ato éra eqmarówana koreawuwe.

³²Momiwíurabeqte kégá áhnte ehwéhnera íre peh morá íwíáhuwe. Mó kégá mó ehwéhnuwara mó kégá mó ehwéhnuwe. Áhnte kégá iwíáhéra, Aneqsabé momiwíuno uwe.

³³Wehukení wenáwíq Árékásántae. Asiu kégá we pagunera, Irigue ehweh terio uwana wega ehwéh terinieéna ayahnká saiqnówe.

³⁴Saiqnówara sega we tagéra, We Asiu aní míre éra ehwehnabauwe. Segá íre wahto tanáhráq téhtaré áhwáh moráráq ehwehnie mahraréra, Átémisi ite Épésá suwahpeqte kéné maniká anotah iní míre uwe.

³⁵Mibeqte kúsíkkúsíqká momiwíurabeqte káyábé ehweh saiqnarouwe. Saiqnaritena sensabé, Épésá suwahpeqte wého, áraho? Írátíáhro. Itene anotah maniká Átémisie. Itewe Épésá suwahpeqte kégá wensabé iwíáh íwíáh atona nahtápéq wahnah wahnahnúne. Wene íópeqte ébáh tahnsa píkísáh wahnah wahnahnúne. Minayabe ómi kehinánká aiq tagaríáh mino. ³⁶Mó kégá péhenóne íre irarerahowe. Minayabe ahbabáriyehboq tabasíwe míáhro. ³⁷Itega abariue mórítáh ánitégá Átémisiwe íre ahbabáratehye. Segá wensabé íre abehq éhwéh atehye.

³⁸Témítífúsireq wene arambehrio kereqka ehweh kahnaraq sega koti orabeq koreriuwara mitaq kamahni kégá ehweh aritagéhe. ³⁹Itega mó ehwéh kahnaraq wahba kégá koti orabeq koreriéro. Segá iwíáhue teigéhe. ⁴⁰Anotah wahnáh kégá itensabé, Ibora aneqsabé tobeho kasenirataq itega aneq ehwéh terianéhnkono? Írakaumo. Ite ehweh íre kéhre. ⁴¹Minayabe pehwehrie pokéwáhro éna kúsíkkúsíqka se kaqsuowe.

Poraga Másérónia marákórápéq pokú ehwehne.

20 ¹Momiwíurabeqte éhwéh parabagútaq Poraga Sísa tagaríáh ké síáhrabéna, Ínéba sero úwara suwe. Suwana sirupipeq kaweq iwíáh aritanieéna Poraga ehweh teriuwe. Teriena mehweh aritena mitaq suena Másérónia marákórápéq pokúwe. ²Poraga Másérónia marákórápéq pokue mó mapéq mó mapérue Sísa tagaríáh kégá págegeue kéranéhe íwíáhigeheéna ehweh teriuwe. Teriena Másérónia marákórápéq suena Káríki marákórápéq pokúwe. ³Káríki marákórápéq kiena apahtáro íó mitaq ména sípi kéwewena Síria marákórápéq pokinaútaq Asiu kégá, Pora suboneheqmúne uwe. Uwana Poraga mó iwíáhéna, Másérónia marákórápéq kouwekinie úwe.

⁴Másérónia marákórápéq kouwekinie úwara mó kégá, Are kéranéhe íwíáhuwe. Pírúsine ahninkáwá Péría suwahpeqte ánínéna wenáwíq Sópátae. Tésárónáika suwahpeqte ánité sensíwíq Árisátákireq Sékúntareq míóye. Tébi suwahpeqte áni wenáwíq Káíúsi míehre. Esia marákórápéqté ánité sensíwíq Tíkíkúsireq Tárópímareq míóye. Moke mi kereq Tímótireqka ⁵Tóása suwahpeq pokue mitaq itensabé íwénunuwe. ⁶Íre muoráhi paretí né tanahráq

parabagútaq íné Árúkareq Porareqka Pírípái suwahpeq sueta sípi kéweweta pokowaye. Itaréitaréráq sípiipéq méta moberíáhtáq Tóása suwahpeq íwénunu kebá sewaye. Seba séta abapete téhtaréráq mitaq míahwaye.

Pukú mahbí oga úkú ehwehne.

⁷Mó wikí ebeqte wéhékáh itega táhutaquq keqme moráráq nanehééq momiwíue míahwane. Mi tanáhráq Poraga ehweh teriuwe. Ahbiah pokinie íwíáhéna inokáhnabubu wene ehweh íre parabarusa peh irarúwe. ⁸Abobóráhpeqte náhúpéq momiwíue míahwanana áhnte aráhmúgá mitaq téhrówe. ⁹Peh morá máhbí wenáwíq Íyútíkae. Wega abobóráhpeqte náh áwáhnkúráq tútuue míowe. Poraga íre wahto ehwéh teriu púana mi mahbí sugekúwe. Sugekú púana máhpeq inahnsuwara tueyokue tagowe. Tagéra tuiariatómé putiowe.

¹⁰Putiowana Poraga moq tueyokue tagéna tutaebewe mi mahbí saiqnawe káhkoue míoye. Poraga míó keyabé, Íre ibisahro. We amahnága oga míéhre úwe. ¹¹Poraga tuekue kiutaq itega táhutaquq keqme moráráq nahwane. Poraga áhnte mó ehwéh teriena tuekutaq ahbiahpeq mitaq suena pokúwe. ¹²Oga úkú mahbíné awahrahga we meqmera awaho ani míó púara sirupipeq eyoyóera sene nahtapeq pokuwe.

Poraga Tóása suwahpeq suena Mírétúsi suwahpeq pokú ehwehne.

¹³Poraga pokinaútaq itensabé, Ásósa suwahpeq íwénuninauge éna iuwena ahtapeq pokúwe. Pokúwaq itega sípi kéweweq Ásósa suwahpeq Pora sípiipéq koweraneheéq pokowane. ¹⁴Itega Ásósa suwahpeq Porareq piehgiowánaraq sípi kéweweq Mítíríni suwahpeq pokowane. ¹⁵Itega mitaq sueq sípi kéweweq mó wehekáh Kíósa suwahpeq marakó kowaq kótaikowane. Mó wehekáh Sámósa suwahpeq sewane. Mitaq sueq mó wehekáh Mírétúsi suwahpeq sewane.

¹⁶Asiu kené siahreraq ko tanáhráq áwíq Péntíkósie. Poraga iwíáhéna, Péntíkósi tanáhráq íné Sarúsarama suwahpeq méyabe nuwahbehre. Minayabe amahnága Esia marákórápéq suena sípi kéwewena apubúue Sarúsarama suwahpeq pokinieéna Épésá suwahpeq íre kowíanauge. Peh kótaikinie íwíáhuwe.

Épésá suwahpeqte keyábé iroso arito ehwehne.

¹⁷Poraga Mírétúsi suwahpeq míotaq Épésá suwahpeq Sísa tagaríáh ábóawáh wéh kiwerirankeheéna eqmarowe. ¹⁸Épésá suwahpeqte Sísa tagaríáh ábóawáh wéhwé Poraba sutaq wega sensabé mahraréna, Íné Esia marákórápéq téh surautaqqákákáq amahnágaákákáq itereq mía míaugaq néne sánsá tagaríáhwe.

¹⁹Anotah aní méyabe nuwahriarairana peh Manikáne arambehriéyabe nuwahbarairana mira aruqaruruge. Ite tagaríáhmé Asiu kegá áhntetaq

moraénue níwioqnarutowana áhnte tanáhráq ibisarauge. ²⁰Wehuke momiwúrotaqkákák mó natáq mó natárué ite séhréhorahi ehwéh pahsuqme tei teinurauge. ²¹Asiu kereq Kárikí kereqsabé, Itene ahbabáq sansa sueq Manikánsabe áhraboro. Itene Wahnah Sísa Karáhénsabe aiq pútare atáhro tei teinuraugaq tagaríáhwe úwe.

²²Poraga mó mahraréna, Manikáne Awanka pokúno aintaráinsabé íné amahnága Sarúsarama suwahpeq pokinie. Mitaq sega nubiq suaneherabowamo. Árahoneherabowapómo. Íné íre tagaríóge. ²³Peh morá íné niahtebome Sarúsarama suwahpeqte kégá níwioqnéra karábúsiipéq móintagéhe. Mó mapéq mó mapérué séyéurautaq Manikáne Awanka mó ke iwíáh aritowara mira éhwéh teni teninowe.

²⁴Sega nubiq súéhansabé íre áhreuge. Minayabe anetaníbo. Itene Wahnah Sísa Karáhéga teniátái arámbéhrí parabarueyabe nuwahbehre. Manikánka ite séhréh aitena kaweraitéh éhwéh teri terinéyabe nuwahbehre úwe.

²⁵Poraga mó mahraréna, Manikánka wahnahni ehwéh ite míáhrabeq tei teinurauge. Íné tagaríómé amahnága pokonaraq mókake íné mó íre tagagehe. ²⁶Ibora pahsuqme teiníboq írátíáhro. Iraipéq pokira kégá ínénsabe íre abiahnsa aintahráhowe. ²⁷Íné íre túbáh agia Manikáne sansá moke pahsuqme íwáhnorurau puara íre abiahnsa aintahráhowe.

²⁸Manikáne Awanka ite omaq itena, Wahnahnúno aitaráire. Wahnahnúno aitarái puaq sipisípiq wahnáhnká wene kamarí wahnahninserah itega moke Sísa tagaríáh ké moq kawerue wahnahnarítáhro. Kawerue wahnahnariteq Sísa mi kené ahbabáqsabe wene korahqtaté paiqmataire íwíáho.

²⁹Sísane sánsá íre tábúsoqme miraéra peh mó sansá miraigeheéra íné pokona tanáhráq mó kégá séra péhe éhwéh íwáhnorigehe. Úrinsi iánká sipisípiq subínserah sega ite morábí méra íre kaweraitagéhe. ³⁰Sísa tagaríáh kégá wehukene sánsá miraigeheéra ite míáhrabeqte kégá moq péhe éhwéh íwáhnorigehe. ³¹Minayabe íwéh panatágínaq uqmatíáhro. Apahtáro ópéq wéhékáhnkakaq inokáhpeqkákák itensabé nirutaboirena kawerue íwáhno aruqaruruge. Minayabe iahrerag matíáhro úwe.

³²Poraga mó mahraréna, Manikánka séhréh aitéh éhwéh anotah pagégé éhwéhne. Mi ehwéh íréhrataq itega kaweqtaq míahrahowe. Mi ehwéh íréhrataq itega kaweqtaq méq oga mía míaira kereq moráráq míagehe. Minayabe Manikáne ehweh kawerue ireq wene sánsá miraoro.

³³Iteba míarau tanáhráq mó aniné korósiakák móneakáqsabé íre nirutaboirurauge. ³⁴Ínéreq séhréh aintáh kéreq táhutahuroneheéna ínénéga arambehriurauge. Minayabe tagaríáhwe. ³⁵Itega mareqmarero ke séhréh aritaneheéq kawerue arambehrioro. Ínéga aiq mira aruqarurunserah arambehrioro. Itene Wahnah Sísa mahraréna,

Mó anínká are náwí tánáhráq are iwíáh íwíáhóne. Arega mó aní náwena tanáhráq anotah iwíáh íwíáhóne

uraire. Mi ehwéhnsábé iahreraq matíáhro úwe.

³⁶Poraga mi ehwéh aiq teriutaq wereq aboawah wehreqka sirehunseraráq méra púreruwe. ³⁷Púreq ehwéh parabagútaq sega Pora káhkoue mehwehéra ibisowe. ³⁸Poraga, Mókake íné mó íre tagagehe únsabe sirutaboírera ibiséra we sípiipéq meqmera móauwera kowekuwe.

Porareh Sarúsarama suwahpeq poku ehwéhne.

21 ¹Itega Épésa suwahpeqte áboáwáh wéh sueq sípi kéweweq obariqme kure Kósa marákórápéq pokowane. Mó wehekáh itega Árórésa marákórápéq kéq mitaq sueq Pátára suwahpeq pokowane. ²Mitaq séq Pónísía marákórápéq pokína sípi kabarue tagéq mi sípi kéweweq pokowane.

³Sáipára marákórápéq ábóraq kowanaraq tagéq marakó ayehrápéq kótaikowane. Kótaikéq Síría marákórápéq tagéq Táíya suwahpeq korahowane. Mó kegá sípiipéqte ménsáméhnsá mewe marakóipeq sáharótaq ⁴itega Táíya suwahpeqte Sísá tagaríah kébá kowíahwane. Kowéq abapete téhtaré wéhékáh seba kowíahwane. Seba míahwanaraq Manikáne Awanka se iwíah aritowara sega Pora teawera, Wehukega are subiq súéhboq Sarúsarama suwahpeq pokineho uwe.

⁵Mi tanáhráq parabagútaq itega pokonehe íwíáhéq kaegaeowanarabeq suahwáne. Suahwánaraq moke mibeqté kéreq sene káironanínseqka meiqmera ahnansahrapeq méúwówe. ⁶Itega arahwéraq irehunseraráq méq púreréq iriwe mehwehowane. Mehweh ariteq sípiipéq kiasagowanara tagéra sene nahtapeq seuwekuwe.

Ágábúsaga Sésaría suwahpeq Pora ehweh teawuwe.

⁷Itega Táíya suwahpeq sueq sípi kéweweq pokue Tórémési suwahpeq pokowane. Mibeqté Sísá tagaríah kéreq mehwehéq peh morá wéhékáh seba kowíahwane. ⁸Mó wehekáh itega mitaq sueq Sésaría suwahpeq pokowane. Mitaq Pírípíne nahtapeq kaegaeowane. Eqmaro kega abapete téhtaré wéhúké omaq sitótaq Pírípí omaq atówe.ⁱ Pírípí Sísá éhweh teri terinu aní míowe. ⁹Wene ayahunkawaréh itaréitaré itaq ahrárigáú míowe. Manikáne Awanka iwíah aritowara se wene ehweh iraru ahrárigáú míowe.

¹⁰Itega Sésaría suwahpeq kaegaeowanaraq táhmaro wehekáh parabagútaq wehukení wenáwíq Ágábúsaga Súría marákórápéqte tuwe. Manikáne Awanka iwíah atowana wega wene ehweh irarerahúwe.

¹¹Wega iteba séna Porane áréti pugeqme mewena minarate wewene aigará ayahnkara táhru táhruúwe. Táhru táhruéna mahraréna, Ínéga táhru táhruunserah Sarúsarama suwahpeqte Asiu kegá mah aréti abo

ⁱ 21.8 Pírípínsabé éhwéhmé Eqmaro 6.1-5, 8.5-6,26,40 tagáhno.

moq táhru táhruigehe. Táhru táhruera nahnso kebá móatagéhe. Mah ehwéhme Manikáne Awanka aiq irarire úwe.

¹² Mi ehwéh irahwánaraq itereq mitaq mío kereqka Poransabé, Sarúsarama suwahpeq íre pokúno éq saiqnahwane. ¹³ Saiqnahwanana Poraga itensabé, Nirupipeq umehínehboq aneqsabé saiqnéq ibisaho? Karábúsiyabé íre áhreuge. Itene Wahnah Sísane arambehri miraunsabé Sarúsarama suwahpeq nubiq suaneherabowapómo. Anetaníbo úwe. ¹⁴ Anetaníbo úwaq wega itene ehweh íre ironsabe túbáh agéq, Maniká awabeh sansá mirainkehe ewane.

Poraga Sarúsarama suwahpeq pokú ehwehne.

¹⁵ Mi tanáhráq parabagúwaq ménsámehnsá sokahueq Sarúsarama suwahpeq pokowane. ¹⁶ Sésaría suwahpeqte Sísá tagariáh ké táhmaro kegá ite kie irówe. Wehukení wenáwíq Násónie. We Sáipára marákórápéqté ánínéna íre wahto tanáhráq Sísá tagariowe. Kie iró kega Násónine nahtapeq kaigeheéra móítowe.

¹⁷ Itega Sarúsarama suwahpeq kowanaraq mibeqté Sísá tagariáh kégá sirupipeq eyoyóera mehweh aitówe. ¹⁸ Mó wehekáh Porareq itereqka Sémísiba pokowanara ómi Sísá tagariáh ábóáwáh wéh míówe. ¹⁹ Poraga sereq mehwehéna Sísá éhweh nahnso ke moke teriunsabe Manikánka miráú arámbéhrí sáhnshawe teriuwe.

Aboawah wehwárinká Poransabé, Manikánsabe iwíáh íwíáho nahtápéq pokúno ato ehwehne.

²⁰ Poraga miráú arámbéhrí sáhnshawe teriuwara aboawah wehgá írótaq Manikánsabe iwíáh íwíáh atera we anotah aní míre íwíáhuwe. Sega Poransabé, Iteribáq móné. Áhnte, peh íregáritaq Asiu kegá Sísansabé aiq pútare atáhwe. Sega Mósísiga sehgióro ú ehwehnsábé iwíáh íwíáh atáhwe. ²¹ Wene ehweh iwíáh íwíáh atáhwara arega miraurona sansámé mó kegá se péhepehe ehwéh teriátówara aiq írátówe.

Mi pehe éhwéh mahraréra, Arega nahnso ke míáhrabeqte Asiu keyábé, Mósísiga sehgióro ú ehwehnsábé anetaníbo. Itene aniné áú amurúruáhro ú sansánkákáq mó Asiu kené sánsánkákáq íre miraoro teri terinire ewe. ²² Itega tagarionawe arega aiq sire u ehwéh Asiu kegá iraneherawoe. Minayabe amahnága aneronehknono?

²³ Aneronehknono éra sega mó mahraréra, Asiu kega túbáh agigehboq itega teawéna ehwéh miraúno. Mahbeqté itaréitaré wéhúkégá Manikánsabe, Itene omasa éhwéh miraoneheqmúne teawéwe. ²⁴ Arereq mósosuaqéhboq mi anímári meriqme Manikánsabe iwíáh íwíáh atáh náhtápéq mórito. Titironeherau ka paiqmaro. Anehe sene siyahra káúqsuaqéhe. Mirairataq ómi kegá tagarianeheéra Mósísiga sehgióro ú ehweh anteruahnayabé íre aiq pútare atagéhe. Peh Mósísine ehweh kawerue sehgione íwíáhigehe uwe.

²⁵Sísa tagariáh áboáwáh wéhgá mó mahraréra, Sísansabé aiq pútare atáh náhnsó ké páhsi iwíáhue sehiranue siátóne. Mi pahsigá mahraréna, Péhepehe maníkánsábé iwíáh iwíáhoneheéra titirirataq náira naneq íre nahro. Korahq íre nahro. Wehukéninká awio páríki náneq ka íre nahro. Mó kené ahrewe ahrrariwe wehwe mahbiwe íre abarioro ire.

Peh miraue iwíáhue sehiranue teriátáúne uwe.

²⁶Uwana Poraga kowe éna omasa éhwéh miraoneheqmúne u animári mórítowe. Mó wehekáh wereq sereqka sosúo sansa áhwárera Manikánsabe iwíáh iwíáh atáh náhúpéq kibekuwe. Sosúo sansa parabagína tanáhráq mibeq mahbeq arítáh ké terieneheéra kibekuwe. Teriera, Mi tanáhráq parabagínaraq itega Manikánsabe iwíáh iwíáh ateq titironehe uwe.

Asiu kegá Pora saiqnarúo ehwehne.

²⁷Sosúo sansamé abapete téhtaré wéhékáh parabaginaútaq Esia marákórápéqté Asiu kegá Pora tagowe. We Manikánsabe iwíáh iwíáh atáh náhúpéq míowara tagéra abiahnsanuwe. Segá Pora táhtoqme ²⁸nahtapeq mío kega ehwehnabaéra mahraréra, Ísara keo, séhréh aitáhro. Mah anínká ómi mah kehiná kéhínánsábé ite Asiu ke íre kaweq ke wóe síwáhnoréna Mósísiga sehgióro ú ehweh anterúáhro ue síwáhnorire. Mah nahnsábé anetaníbo ue síwáhnorire. Wega mó ahbabáritéhmé Káríki ke Manikánsabe iwíáh iwíáh atáh náhúpéq móarítéhre. Móarítéh púana wega mah kawéq náhnsábé íre kaweratéhre uwe.

²⁹Épésá suwahpeqte áni wenáwíq Tárópímae. Menah Asiu kegá wereq Porareq Sarúsarama suwahpeqte áhtápéq nogúyataq tagowe. Mítaq tagonsabe sega péhe iwíáhéra, Poraga Manikánsabe iwíáh iwíáh atáh náhúpéq nahnso aní meqme surainsabe órira mire uwe. Meqme móátaráire ume péhe éhwéhne.

³⁰Minayabe ehwehnabaéra ómiga abiahnsanéra pehbeheráh seyeue sorupera Pora Manikánsabe iwíáh iwíáh atáh náhúpéqté táhtoqme abariuera máhpeq márunatera onsawári paiqsúowe.

Aroma sontiá kégá Pora táhtoró ehwehne.

³¹Sega Pora suboneherautaq Aroma sontiá kéné anotah wahnáhnká ómi Sarúsarama suwahpeqte kégá aiq tobehowe u irowe. ³²Irena wega apubúue sóntiá keákáq sene wahnah animárinkákáq meriqmena pehbeheráh túwe. Túwara Pora subu kegá mi ke tagéra túbáh aguwe.

³³Sóntiá kené wahnahnka Poraba tuena táhtoqme téhtaré séniráté táhrrááhro úwe. Táhrrááhro éna, We insebo? Aneq ahbabáriro kasenúwe.

³⁴Kasenúwara áhnte kegá mío púara ehwehnabaéra mó kegá mó

ehwéhnuwara mó kegá mó ehwéhnuwe. Áhnte ehwéhnu puara wega íre kawerue irahráhúnsabe sóntía keyábé, Ite kaegaeo nahupéq móátáhro úwe.

³⁵⁻³⁶ Kaegaeo nahupéq kibekoneherautaq se kéro kega paentáwe kéra ehwehnabaéra, Subiq súáhro. Subiq súáhro uwe. Subiq súáhro unsabe Pora subíyehoéra sóntía kegá we sawiwera nogúwe.

Poraga Asiu ke we éhweh teriu ehwehne.

³⁷ Segá we nahupeq móataneherautaq Poraga Káríki ehwéhtáq sóntía kené wahnahnsabé, Ehweh teawinínkono kasenúwe. Kasenúwana mi anínká éhnehéna, Are Káríki ehwéhmé aiq írátáhne éna, ³⁸ Menah peh morá Ísípi marákórápéqté ánínká kámáhni ke ebekinkeheéna áhnte ke 400 subiq suahráho ke meriqmena uworapeq pokuraire. Íné iwíáhume, Arewe we wone íwíáhume úwe.

³⁹ Úwana Poraga, Íné Asiu aní múge. Íné Sírísía marákórápéq Tahsa suwahpeqte aní múge. Tahsa suwahpeq áhnte nahnsó ké míáhwe. Íné mahtaq míáh ké ehweh terinie úwe. ⁴⁰ Úwana, Terio únsabe Poraga awahsahniataq méwotate irigéna míó kega ehiansá agigeheéna ayahnkaratáté saiqnówe. Saiqnówara túbáh aguwana Poraga Asiu kené ehwehtaq mahraréna,

22 ¹ Náníbáqmari móe. Nániboreh wóe. Nánuwahraho, néne ehweh íráhro. Íné íre ahabábq anine ue iahtebagehboq néne ehweh íráhro úwe. ² Wega Asiu kené ehweh irarúwara irera ehiansá aguwe.

Ehiansá aguwana Poraga mahraréna, ³ Íné Asiu aní múge. Náinoga Sírísía marákórápéq Tahsa suwahpeq maqinténa Sarúsarama suwahpeq méintowana mahtaq anonúkowae. Anotah síwáhnori aní Kámáriaga iteriborehne sansá irankeheéna kawerue níwáhnoruraire. Iborá itega Manikáne arambehri mira onserah ínéga moq mira aruqarururaige.

⁴ Menah ínéga Sísansabé aiq pútare atáh ké pukigeheéna síwíoqnaraige. Weh ahre táhtoqme táhru táhruena karábúsiipéq mórítaráuge. ⁵ Manikáne ehweh mibeq mahbeq arítáh kéné wahnahnseq aboawah wehreqka minayabe tagéra teieráhowe. Segá Támákása suwahpeqte Asiu ke páhsi sinkeheéra sehiranue níátówe. Íné Támákása suwahpeq pokuraige. Mibeqté Sísá tagaríáh ké táhru táhruue Sarúsarama suwahpeq mórítanieéna pokuraige. Se kamah ariníe íwíáhuraige úwe.

Poraga íopeqté téhreh naneq tagónsabe teriu ehwehne.

(Eqmaro 9.3-19, 26.12-18)

⁶ Poraga mó mahraréna, Íné ahtapeq pokue Támákása suwahpeq kinauraige. Kinauraigana wéhékáhnabubu íné kuraurabeq apubúwe íopeqté anotahtaq téhraguraire. ⁷ Téhragurairana marakóipeq

márunsurahéna ehweh írátáuge. Mi ehwéhniká mahraréna, Sorao, Sorao, aneqsabé níwioqnahno uraire.

⁸Urairana ínéga, Anotah aníno, are insebo urauge. Uraugana wega ínénsabe, Íné Sísá Néhsara suwahpeqte ání arega níwioqnáhna aní múge uraire. ⁹Íné sénító kegá téhragurai tagéra peh teniátái ehwéh íre írátówe.

¹⁰Ínéga, Néne Wahnahno, anerininkono kasenurauge. Kasenuraugana wega ínénsabe, Irigue Támákása suwahpeq pokúno. Mitaq arega moke miraina arámbéhrí teawinié uraire. ¹¹Anotah téhrarainsabé íné íre tagahrahurauge. Íre tagahrahurau puara íné sénító kegá niyahtaq ahmboqmera Támákása suwahpeq móintárówe úwe.

¹²Poraga mó mahraréna, Mibeqté ání wenáwíq Ánáníásie. We Mósísiga sehgióro ú ehweh kawerue írátái aníne. Moke wenawahrah Asiu kegá, We aiq kaweq aníne íwíáhuwe. ¹³Ánáníásiga ínéba séna iriwe ména ínénsabe, Sorao, nánibáq móne. Arega tagahrahóne urairana niura apubúue kaweragurairana we tagarauge.

¹⁴We tagaraugana wega ínénsabe, Itene igaqnaréhne Manikánka wene sánsá ahtebankeheéna are omaq atéhre. Wene kaweq ahnínkáwá tagé wene ehweh irankeheéna are omaq atéhre. ¹⁵Arega wene ehweh ómi kehinánsábé terinkéhe. Arega tagé írátóna ehwéh terinkéhe. ¹⁶Amahnága túbáh aginehboq iriwe mé wání meyo. Arene ahbabáq kaqauwankéhboq Sísansabé áhrabúno uraire úwe.

Manikánka Poransabé, Nahnsó ke néne ehweh korerio ú ehwehne.

¹⁷Poraga mó mahraréna, Íné Sarúsarama suwahpeq seuwekurauge. Mibeqté Manikánsabe iwíáh íwíáh atáh náhúpéq púrerurautaq néniwanka ¹⁸Sísá tagarauge. Tagaraugana wega ínénsabe, Mahtaqté kegá arene ehweh íre aiq pútare atéhra puah Sarúsarama suwahpeq apubúue sue móbeq pokúno uraire.

¹⁹Urairana ínéga wensabé, Néne Wahnahno, Asiu kené momiwí nahmáritápéq arensabé aiq pútare atáro ke subiqme karábúsiipéq sitáráuge. Minayabe mahtaqté kegá tagariáhwe. ²⁰Sítíbéni arene ehweh teriátái anímé Asiu kegá ebahnsatate subitótaq ínéga wahtotaq iriwe ména we pukime aiq kawerire éna subitó kené káhq ambántámáritáq wahnahnurauge teawátáuge. ²¹Teawátáugana wega ínénsabe, Nahnsó suwahpeq íre wahto marákórápéq eqmaraníe. Arega nahnsó ke néne ehweh korerinkéhboq pokúno teniátáire úwe.

Aroma wahnáh ánínká Poransabé kasení ehwehne.

²²Poraga teriu ehwéh sega kawerue írówe. Írówana Poraga nahnsó keyábé irarútaq sega ehwehnabaéra mahraréra, We oga miéhmé anotah íre kawerire. Subiq súáhro uwe. ²³Porane ehweh íre suwahbó púara sega ehwehnabaéra sene ambantamarí ugurue tuperúpeéra tanahuqkakaq mewe tuperúpeuwe.

²⁴Sega mirauwana sóntía kené wahnahnka, Mi aní nahupeq móátáhiro úwe. Móátáhiro éna, Asiu kegá aneqsábé abiahnsanéra áhnte ehwéhnoo íwíáhúwe. Iwíáhéna, Teninkéhboq mah aní áréti sahtáté subóro aritowe.

²⁵Sega we subiqmaraneheéra wene aiayah táhru táhruuwana Poraga weba wahtotaq iriwe mío wahnáh ánínsábé, Íné Aroma aní múge. Aneqsabé ehweh íre aintasa pehipi nuboneheo? Mi sansá aiq mirao sansánoo úwe.

²⁶Úwana kíápéténiga irotaq anotah wahnáh ánípá pokue wensabé, Itega suboneheú aní Aroma aní míéhnsábé anerinibo úwe. ²⁷Úwana wega Poraba séna wensabé, Are Aroma anípo? Tenio úwana, Kowe úwe. ²⁸Kowe úwana anotah wahnáh ánínká wensabé, Íné áhnte moné paiqmataunsabé Aroma aní úkuraúge úwe. Úwana Poraga wensabé, Náínoga maqintotaq Aroma aní maqintowe úwe.

²⁹Úwara Pora suboneherau kegá irera apubúue auwera peh tagowe. Anotah wahnáh ánínká iwíáhéna, Mah aní Aroma aní míéhhrana táhru táhruéwómé íre kaweruge. Íre kaweruge éna wega moq áhreuúwe.

Poraga momiwíuríó ke teriu ehwehne.

³⁰Áhreéna arupipeq iwíáhéna, Asiu kegá aneqsábéboq we ehweh atáhwe. Iraníe iwíáhéna mó wehekáh wega, Pora táhrraró nahgáq pugeq áúwáhiro aritena, Manikáne ehweh mibeq mahbeq arítáh kéreq mó kaunsírí kéreqsábé, Momiwíoro aritowe. Momiwíoro aritena, Pora meqme momiwíurabeq móátáhiro aritowe.

23 ¹Poraga kaunsírí ke ebitáwéna mahraréna, Nánuwahraho, Manikánka nirupipeq tagaríéhre. Menahnkákákq amahnágaákákq kaweqtaq mía míauge úwe. ²Peh morá wáhnáh aní Ánáníásiga Manikáne ehweh mibeq mahbeq arítáh ké wahnahnúwe. Wega Poraba iriwe mío keyabé, Wene áwéh suranóro aritowe. ³Aritowana Poraga wensabé, Awisúitagi wirá áwánká taberábe pentí abaq máráhwara awisúitagi awánká íre tagahrahowe. Mina inserah are kaweq ambántá úbíg miahnawe arene arupipeq peh awisúitagi wirá áwánká tahnsane. Arega íné áwéh suranóro aritahnaga Manikánka are mina tahnsaninkehe. Arega mitaq tútuue Mósísiga sehgióro ú ehweh iwíáhé ehweh aintahne. Minayabe aneqsábé níwéh suranóro aritahno? Miraónaga Mósísine ehweh aiq anteruahne úwe.

⁴Úwara Poraba iriwe mío kega wensabé, Manikáne ehweh mibeq mahbeq aítáh kéné wahnahnsabé aneqsábé ehweh atahno uwe. ⁵Uwana Poraga sensabé, Manikáne ehwehnka mahraréna,

Itene wahnahnsabé abehq éhwéh atéhneho ire. *(Kisim Bek 22.28)*
 We Manikáne ehweh mibeq mahbeq aítáh kéné wahnah tagaríótáq tahirímé mi ehwéh íre iraru irino úwe.

⁶Kaunsírí kewé mó akáhtáq Sáyúsi ke míowara mó akáhtáq Péhrasi ke míówe. Minayabe Poraga se tagéna iwíáhue momiwíuríórabeqte keyábé

anotahtaq mahraréna, Nánuwahraho, íné Péhrasi aní múge. Nániboreh Péhrasi kené sánsá mirau ke míówe. Manikáne omasa éhwéhnsábé aiq pútare atena wega mókake pusa ké oganúq sitankéhe iraruraunsabé ehweh aintáhwe úwe.

⁷Péhrasi kegá mó iwíáhuwara Sáyúsi kegá mó iwíáhuwe. Íre morá iwíáhunsabé seye ehwehuwe. ⁸Péhrasi kegá iwíáhéra, Mókake Manikánka pusa ké oganúq sitankéhe. Segá íópeqté kéreq Maniká míéhrabeqte kéreqsabé aiq pútaq míáhwe íwíáhuwe. Sáyúsi kegá minayabe íre aiq pútare arítówe. Segá iwíáhéra, Manikánka pusa ké íre oganúq sitanawire íwíáhuwe. Minayabe se mó iwíáh mó iwíáhu puara seye ehwehuwe.

⁹Anotah ehwéhutaq táhmaro Péhrasi sansá síwáhnoro kegá iriwe méra mahraréra, Itega iwíáhúnawe mah anímé íre ahbabáq anine. Íópeqté ké, Maniká míéhrabeqte kégá ehweh teawátówapómo. Itewe íre tagariahrahúne uwe. ¹⁰Unsabe seye áhnte ehwéhnaunsabe sóntía kené wahnahnka, Asiu kegá Pora abariwe subíyeho íwíáhéna, Sóntía keyábé, Mi aní tutáhtoque sabiwe meqmeq itega kaegaeorabeq móátáho aritowe.

¹¹Mó penórábéq Sísaga Poraba sebatawe ména wensabé, Íre áhreúno. Íné éhweh arega Sarúsarama suwahpeq teriátónanserah mókake Aroma suwahpeq moq terinkéhe úwe.

Asiu kegá, Pora subiq suaneheqmúne u ehwéhne.

¹²Mó wehekáh Asiu kegá sío síóera moráénéra, Manikánka tagaríéhre. Wánínkakaq táhuthuqkákáq pehipi íre naneheqmúne. Ebeq Pora subiq sueq anehe táhuthuq nanehe uwe. ¹³Áhnte weh 40 wehgá miraue sío síóera moráénue iwíáhuwe.

¹⁴Segá Manikáne ehweh mibeq mahbeq arítáh kéreq Asiu kené abowah wehreqpa pokue sensabé teriera, Manikánka tagaríéhre. Itega wánínkakaq táhuthuqkákáq pehipi íre naneheqmúne. Ebeq Pora subiq sueq anehe táhuthuq nanehe. ¹⁵Minayabe itereq mó kaunsíri kéreqka sóntía kené wahnahnsabé péhe éhwéh mahrarero. Mahraréq, Itega Pora éhweh tábúsoqme iranéhboq iteba meqme súno ero. Itega ahtapeq wahnahnurawéq wega sinaraq suboneheqmúne uwe.

¹⁶Uwana Porane anahnowáné ahninkáwágá mina mehwaró ehweh irowe. Irena sóntía kegá kaegaeurabeq kibekue Pora teawuwe. ¹⁷Teawuwana Poraga kíápéténinsabé áhrabéna mahraréna, Mah mahbígá arene wahnah aní ehweh teawinkéhboq meqme móato úwe. ¹⁸Úwana wega meqména anotah wahnáhpá móatena wensabé mahraréna, Mah mahbígá ehweh teawinkeheéna meqména suge. Karábúsiipéqté aní wenáwíq Poraga níáhrabue we meqme areba móato teníre úwe.

¹⁹Úwana anotah wahnáh ánínká mahbine ayahtaq panantáwe meqména kopípéq mógasenúwe. Kasenéna, Aneq ehwéh teniníbo úwana ²⁰mahbiga

wensabé, Asiu kegá moráénéwáhwe. Segá arensabé, Ahbiah Porawe kaunsíri kebá meqme súno teawigéhe. Pora éhweh tábúsoqme iranéhboq iteba meqme súno teawigéhe. ²¹Minayabe aiq pútare arítéhnehboq 40 kegá mehwatíáhwe. Segá aiq mahraréra, Manikánka tagariéhre. Itega wáninkakaq táhutahuqkakaq pehipi íre naneheqmúne. Ebeq Pora subiq sueq anehe táhutahuq nanehe ewe. Segá amahnága sokah sokahue míáhwe. Peh arene ehwehnsabé áwénunowe úwe.

²²Úwana anotah wahnáhnká mi mahbíyábé, Arega tenienawe mó ke teríneho. Pehwehrue pokéwahno éna eqmaq auwowe.

Pora kámáhni wahnáh ání wenáwíq Péríkiba móato u ehwehne.

²³Eqmaq auwena téhtaré kíápéteni síáhrabúwe. Síáhrabéna sensabé, Inokáhpeq wehuke sugé tanahráq Pora Sésaría suwahpeq meqmeta móátáhtao. Áhnte sontiá ké 200 sontiá kéreq 70 oségá káhkokóawíáh sontiá kéreq mó áhnte 200 sehsabekara matíáh sontiá kéreq sokah sokah arítáhtao. ²⁴Pora moq óseraq tútuue míahnarag anotah wahnáh ání Péríkiba kawerue meqmeta móátáhtao úwe.

²⁵Móátáhtao éna Péríkine páhsi sehiranue mahraréna,

²⁶Péríkio, are anotah kawéq wahnáh ání móne. Íné Kárórúsa uge. Mó niwíqme Árisiása uge. Néne páhsi sáhnshawe tagáhno. ²⁷Asiu kegá mah aní táhtoqme subitótaq we Aroma aníne urairana írátáuge. Írátáútaq ínéreq sontiá kereqka pehbeheráh tueq tumetáune.^j ²⁸Wega aneq ahbábárirapómo éna iraníeéna sene kaunsíri kebá móátáráuge. ²⁹Segá seyene sánsánsabé ehweh atówana wega íre anotah ahbábárire. Mi ahbábáqmé íre suboráhi ahbábáq míre. Íre karábúsiipéq móatahráhi ahbábáq míre. ³⁰Asiu kegá mah aní suboneheqmúne uro irena apubúúe areba eqmaq áúwóge. Wensabé ehweh atáh keyábé areba pokue mi ehwéh koreawéro atóge úwe.

Páhsiipéqté éhwéhnká aiq irarúwe.

³¹Sene wahnahnka teriunserah sontiá kegá Pora meqmera inokáhpeq Ántipáti suwahpeq móátówe. ³²Mó wehekáh óseakák kegá Pora meqmera Sésaría suwahpeq pokuwe. Pokuwara mó sontiá kegá sene nahtapeq tuekuwe. ³³Tuekuwara óseakák sontiá kegá pokue Sésaría suwahpeq kéra anotah wahnáh ání Péríkiba Pora móatera páhsiakák móátówe.

³⁴Móátówana wega páhsi sáhnshahena Poransabé, Are eheqte ánípo kasenúwana, Íné Sírísia marákórápéqté ání múge úwe. ³⁵Úwana, Arensabé ehweh atéhra ke túírataq arene ehweh iraníe úwe. Wega sontiá keyábé, Érótime anotah nahtápéq ateq mitaq wahnahnoro aritowe.

Asiu kegá Pora ehweh ató ehwehne.

24 ¹Manikáne ehweh mibeq mahbeq arítáh kéné wahnah wenáwíq Ánáníásie. Moberiáh wéhékáh parabagútaq wereq táhmaro

^j 23.27 Eqmaro 21.30-33, 22.25-27, 24.7 tagáhno.

Asiu kené aboawah wehreqka peh morá págegeue ehweh aritahráhi aní wenáwíq Tétúra meqmera túwe. Segá Aroma kené anotah kamáhní ání Péríki Pora éhweh teawanehe úwe.

²Péríkiga, Pora meqmeq sero úwara meqmera móátówe. Móátówana Tétúraga mahraréna, Péríkio, are anotah kawéq wáhnáh ání móne. Arega wahnahnónayabé ite Asiu ke pehwehrue mía míaorahúne. Arega kawerue iwíáhónawe séhréh aitaníe é itene marakó kaweraitahne. ³Minayabe itega iwíáh iwíáh ateq kaweróne atone úwe.

⁴Tétúraga mó mahraréna, Áhnte ehwéh íre irarinie. Pehgáriq ehwéh teawiníboq iro. ⁵Ite iwíáhúnawe mah anímé ahababáq aruqaruri aníne. Wega mah marakó marakóipéq mó ke suwahpeq mó ke suwahperue Asiu keyábé pagu pagunurairara áhnte kegá tobehéra ebehowe. Wega itene sánsá suena Néhsara suwahpeqte áníné sánsá meyháh ké wahnahnire. ⁶Wahnahnéna wega Manikánsabe iwíáh iwíáh atáh náhtápéq íre kawerina uraitaq itega táhtotiarauone. Itene sánsá anterutainsabé ehweh ateq parabaruanene iwíáhuraune.

⁷Iwíáhuraunaraq itega Pora ehweh atanéhe uraunaraq sóntía kené wahnah wenáwíq Árisíásarehga tuera ite págegeue iubera Pora meqmera móbeq móátárówe. Árisíásaga itensabé, Pora ehweh atagéhboq anotah aní míéhrabeq pokue mitaq ehweh atáhro uraire. ⁸Moke ehweh atéhra ehwéhnsabé wewega teawinkéhboq kaseninanao úwe. ⁹Úwara moke wereq su Asíú kégá wega irarú ehwéhnsabé kowe atera mi ehwéh aiq pútaq ehwéhne atówe.

Poraga Péríkínsabé we éhweh teawu ehwehne.

¹⁰Poraga ehwehninkeheéna anotah kamáhní ánínká ayahnkaratáté saiqnówe. Saiqnówana Poraga wensabé, Itene marakórapeq arega áhnte opéq wahnahnurone. Mina tagaríónsábé pahsuqme teawiníe. ¹¹Ínéga Sarúsarama suwahpeq Manikánsabe iwíáh iwíáh atanieéna kowíaraugana peh airápété téhtaré wéhékáh parabaguraire. Mó kegá mi ehwéh aiq pútaq ehwéhne teawigéhboq kaseninanao. ¹²Mi ke suwahpeq íné íre ehwehéna mó ke íre pagu pagunuraue. Manikánsabe iwíáh iwíáh atáh náhúpéqkákákáq Asiu kené momiwí nahtápéqkákákáq máhpeqkákákáq peh túbáh aguraue. ¹³Sega ehweh aintáhnsabé íre sokigi aintahráhowe.

¹⁴Pahsuqme teawiníboq írátíahno. Segá Sísane sánsámé íre suwahbeh puara áwáhnáh sánsáne ewe. Mi sansámé ínéga sehgiúge. Miraunsabé itereq itene igaqnaréhreqne Manikánsabe iwíáh iwíáh atóge. Mósísine ehwehnikakákáq Manikáne ehweh iraru kené ehwehnikakáqsabé aiq pútare arítóge. ¹⁵Mókake Manikánka moke pusa kéwé kaweq kereq ahababáq kereq iriritankéhe. Ehweh aintáh kéreq ínéreqka minayabe iwíáhue áwénunúne. ¹⁶Íné kaweqtaq méyabe nuwahbehre. Manikánseq ómi wehukéreqsabé íné íre ahabárarítónsábé nirupipeq eyoyóire úwe.

¹⁷Poraga mó mahraréna, Táhmaro opéq nahnso kené marakórapeq ména nánuwahrahba seuwekurauge. Tabonah Asiu ke móne nárinieéna seuwekéna Manikánsabe iwíáh iwíáhue nawinieéna seuwekurauge. ¹⁸Itega sosueq mirauraunaraq sega Manikánsabe iwíáh iwíáh atáh náhtápéq ite tagarowe. Íre áhnte ke ínéba míarowana pehwehribeq míaraugara ¹⁹Esia marákórápéqté Asiu kegá tagarowe. Tagarowana ínéga ahabábáruurataq tahirí sega aneqsábé areba íre séra ehweh aintáh iripo?

²⁰Ínéga kaunsíri ke ehwéh teríátáugara areba suro kegá írátárowe. Ahabábáruurataq tahirí sega teawé irino. ²¹Se momiwíurorabeq peh morá éhwéh iraruraunsabé sega, Íné ahabábáruaire iwíáhurowamo. Mi tanáhráq ínéga anotah ehwéhnuwe mahraréna, Manikánka pusa ké iriritankéhe. Ínéga mira iwíáhunsabé ibora itega ehweh aintáhwe uraугe úwe.

²²Úwana Péríkiga irena Sísansabé aiq pútare atáh kéné sánsá ahtebonsabé, Pehitare aritowe. Pehitare aritena sensabé, Anotah sontiá kéné wahnah aní Árisíásaga mahtaq tuinaraq itene koti ehwéhnsábé iwíáhue teiníe úwe. ²³Teiníe éna wene kíápéténinsabé, Pora kawerue wahnahnato. Pehwehruwe wahnahnúno. Wene iyahnabo anímárinká séhréh ataneheéra ménsámehnsánkakaq túírataq íre ahqáho arito úwe.

Pora téhtaré ópéq karábúsiipéq mío ehwéhne.

²⁴Táhmaro mó wehekáh parabagúwana Péríkiga wene ahre wenáwíq Tárúsíra meqmena súwe. Wene ahre Asiu iní míowe. Wega, Pora meqme súno atowana móatowana Poraga Sísansabé aiq pútare ate ehwéh teriuwe. ²⁵Poraga kaweqtaq méyabewé tabasíwe méyabewé Manikánka mókake ómi kehinánsábé ehweh aritahnayabewé irarúwe. Irarútaq Péríkiga áhre agéna mahraréna, Pehitare. Amahnága pokúno. Mókake ahwimi íre kahnaaraq mó áhrabinie úwe.

²⁶Péríkiga iwíáhéna, Pugeq auwahnana Poraga móne náninabomo iwíáhúwe. Mira iwíáhúnsabé wega mó wehekáh mó wehekáhnue Pora meqme súno atowana Pora weba súwe. Wereq Porareqka ehwehnuaruruyé.

²⁷Asiu kegá wensabé kaweróne atageheéna Péríkiga Pora íre pugeq auwowana peh téhtaré ópéq karábúsiipéq míowe. Mi tanáhráq parabagúwana mó anínká Péríkine wahnah árámbehrí meyowe. Mi aní wenáwíqtare Pósiúsa Pésátae.

Poraga, Anotah wahnáh aní Sísáhriba pokinie ú ehwehne.

25 ¹Pésátaga Sésaría suwahpeq wahnahné arámbehrí awaq mianieéna mitaq súwe. Apahtárórác mitaq ména suena Sarúsarama suwahpeq pokúwe. ²Mibeqté Manikáne ehweh mibeq mahbeq arítáh kéné wahnahnseq mó anotah Asiu kereqka Pésáta Poraga

ahbabarurai ehwéh teawúwe. ³Sega moráénéwéra, Pora subonéhboq ahtapeq mehwaranéhe íwíáhuwe. Mira íwíáhunsabé sega Pésátansabé, Pora mahtaq Sarúsarama suwahpeq ehweh atanéhboq meqmeq sero arito uwe.

⁴Úwana Pésátaga sensabé, Pora Sésaría suwahpeq karábúsiipéq míéhre. Mibeq áhníbórá pokinie. ⁵Minayabe ite míonarabeqte anotah kegá séniragéhe. We ahbabáq kahnaq mitaq ehweh atagéhe úwe.

⁶Wega sensuwahpeq abapete apahtáro wéhékáhpópoq nayáhnkú wéhékáhpópoq mitaq ména suena Sésaría suwahpeq pokúwe. Pokéra mó wehekáh wega wahnahnúrabeqte náhúpéq tútuue ména, Pora koweqme sero aritowe. ⁷Poraga sútaq Sarúsarama suwahpeqte su Asíu kegá seabugéqnáhnue iriwe míówe. Iriwe méra, Wega mira ahbabárire éra áhnte ehwéh atówe. Sene ehwehme aiq pútaq ehwéh íre sokigi aweráhuwe.

⁸Ehweh atówana Poraga mahraréna, Mósísiga sehgióro ú ehwehnikákáq Manikánsabe iwíáh íwíáh atáh náhtápéqkákáq íre ahbabárarítárauge. Itene anotah wahnáh Sísáhri moq íre ahbabáratárauge úwe.

⁹Úwana Pésátaga Poransabé, Asiu kegá ehweh aintagéhboq Sarúsarama suwahpeq ínéreq arereq pokéyabe awahbehro úwe. Pésátaga Asiu kené sirupipeq eyoyó aritanieéna mi ehwéh irarúwe.

¹⁰Úwana Poraga wensabé, Ahqáho. Íné Asiu keyábé íre ahbabárarítáraume tagariahne. Minayabe ite Aroma kené anotah wahnáhné koti arítáh náhtápéq míóge. Mahtaq ehweh parabaruo. ¹¹Íné pukorahu sansá íre miraurauge. Miraurautaq tahirímé íné nubiq suo teawú irino. Segá ehweh aintáhmé íre aiq pútarowe. Minayabe arega íné Asiu kebá íre móintahráhone. Aroma wahnáh ání Sísáhri íné éhweh teawenana wewega iwíáhue tagankehe úwe.

¹²Úwara Pésátareq weba mía míau ahtébíá kéreqka sío síoéra iwíáhuwe. Pésátaga Poransabé, Sísáhri íné éhweh teawenana iwíáhue tagankehe ényabé weba pokinkehe úwe.

Ágáripaga Pora éhweh iro ehwéhne.

¹³Táhmáro mó wehekáh parabagútaq mó marákórápéqte wahnáh ánínseq wenanahnoreqka Sésaría suwahpeq suye. Wahnah aní wenáwíq Ágáripae. Anahnowá áwíq Pénáisie. Segá Pésáta mehweh atayeheéra suye. ¹⁴Segá táhmáro wehekáh weba míóyana Pésátaga Pora éhweh Ágáripa teawuwe. Teawena Ágáripansabe mahraréna, Péríkine arambhri merautaq wehukení karábúsiipéq míaraire. ¹⁵Íné Sarúsarama suwahpeq míarautaq Manikáne ehweh mibeq mahbeq arítáh kéné wahnahmarínseq Asiu abóáwáh wéhreqka we éhweh teniátówe. Teniera mahraréra, Itega we naho aiq ehweh ataráúnayabé itene ehweh iro. We subiq suo teniátówe.

¹⁶Teníátówana ínéga ahqáho aritena sensabé, Ite Aroma kegá wehuke pehipi íre subiq suahráhuine. Ebeqme we ehweh átáh ké míáhrabeq wene ahbabáqsabe ehwehninkehe urauge.

¹⁷Asiu kegá we ehweh ataneheéra ínéba tutotaq íné íre túbáh aguraage. Mó wehekáhtáq mi ehwéh iranieéna wahnahnuraurabeqte náhúpéq tútuue ména, Pora koweqme sero arítaráugara koweqme surowe. ¹⁸Wega aneq ahkárágára urairo íwíáhuraugara wensabé ehweh atáró kegá irigéra íre mi ehwéhnia peh mó ehwéh irare atárówe. ¹⁹Peh seyene sánsánsábé ehwehurowe. Poraga, Putiarai aní wenáwíq Sísa oga míehre urainsabé wereq sereq ehwehuwe. ²⁰Mi ehwéhme íre niahteboge. Aneq ehwéhpómo? Árahue kaweritanínkono íwíáhuraage. Íwíáhuraunsabé ínéga Pora kasenéna, Sarúsarama suwahpeq pokue mitaq mah ehwéh kobarabaruanéhnkono urauge. ²¹Uraugana Poraga, Ahqáho. Aroma wahnáh aní Sísáhri íné éhweh teawenana wega iwíáhue tagéna teinkehe uraire. Urainsabé, Ínéga eqmaq auwahráhonaraq Sísáhriba pokinkehe. Amahnága karábúsiipéq míahno atáráuge úwe.

²²Úwana Ágárípara Pésátansabé, Ínénéga mi aníne ehweh iraníe úwana, Ahbiah arega irankéhe úwe.

²³Mó wehekáh Ágárípareq wenanahno Pénáísireqka wahnah aníté táhnsá siwahriruera suye. Sereq sóntfa kené wahnahnseq anotah wehwárínseqka momiwí nahtápéq kibekuwe. Kibekuwana Pésátaga, Pora koweqme sero úwana koweqme suwe.

²⁴Pésátaga mahraréna, Ágárípareq ómi itereq momiwíúna kerero, mah aní tagahro. Moke Asiu kegá Sarúsarama suwahpeqkakák mahtaqqákák mah anínsabé teni teninurowe. Segá ínénsabe, Mi aní anotah ahbabák aní púah subiq suo ato éra pagu pagunaintárówe. ²⁵Ínéga we kasenue tagéna pukorahi ahbabák íre tagaraage. Wega, Aroma wahnáh aní Sísáhri íné éhweh teawenana wewega iwíáhue tagankehe uraire. Urainsabé ínéga weba eqmaraníe íwíáhuraage.

²⁶Mah anínsabé kasenue tagéna wene ahbabák íre tagaraunsabé Sísáhrinsabé aneq ehwéh páhsiipéq sehiranue teawinínkono? Minayabe wene ehweh irageheéna iteba móátóge. Ágárípaó, wene ehweh iro. Itene anotah wahnáh Sísáhri wene ahbabáqsabe páhsi sehiraniniboq itega mah aní kasenoro. ²⁷Karábúsiipéqté aní mó wahnáh anípa pehipi eqmaq áúwéhnayabé íre kaweq sansáne. Minayabe wene ahbabáqmari sehiraninie úwe.

Poraga we éhweh Ágárípa teawu ehwehne.

26 ¹Ágárípara Poransabé, Are éhweh teio úwe. Úwana Poraga ayah pankeqme mahraréna, ²Ágárípaó, are anotah wahnáh aní móne. Íné éhweh teawenayabé nirupipeq eyoyóire. Asiu kegá áhnte ehwéh aintáronsabé amahnága tábúsoqme teawiníe. ³Arega moke Asiu

kené sánsánkákáq sene ehwehnikakáq aiq ahtebáhne. Minayabe arega néne ehweh irahnayabé nirupipeq eyoyóire. Kawerue iwíáhinkehboq pehwehrué mé iro úwe.

⁴Poraga mó mahraréna, Ómi Asiu kegá Sarúsarama suwahpeq miraurau sansá tagaríáhwe. Íné animai míáhwataq nánuwahrah míórabeq miraowa sansá tagaríáhwe. ⁵Péhrasi kegá mirau sansá anotah pagégé sánsáne. Íné Péhrasi aní ména mi sansá kawerue miraurauge. Minayabe Asiu kegá tagaríáhwe. Mi ehwéh teaweyabe suwahbehta q tahirímé sega aiq teawé irino.

⁶Naho naho Manikánka itene igaqnaréhyabe áhnte kawéq éhwéh teriuwe. Ínéga mi ehwéhnsábé aiq pútare atóge. Ai q pútare atena áwénunuraunsabé mó kegá ehweh aintárówana amahnága mahta q míóge. ⁷Airápété téhtaré iteruwahrah kahnáhnká inokáhpeqkákáq wéhékáhnkakaq Manikánsabe iwíáh iwíáh atáhwe. Sega kawerue iwíáh iwíáh atera, Manikánka omasa éhwéh sehginawire éra áwénunuwe. Ínéga moq miraue áwénurauge. Minayabe Asiu kegá ehweh aintárówe. ⁸Manikánka pusa ké iriritéhnsábé aneqsabé íre aiq pútare ataho úwe.

⁹Poraga mó mahraréna, Ínéga menah Sísá, Néhsara suwahpeqte ánínsábé aiq pútare atáh ké síwíoqnanauge iwíáhurauge. ¹⁰Iwíáhéna Sarúsarama suwahpeqte Sísá tagaríáh ké síwíoqnarauge. Manikáne ehweh mibeq mahbeq arítáh kéné wahnah kegá, Miraúno aintárówana Sísá tagaríáh ké karábúsiipéq sitaráuge. Se subiq suanéhe iwíáhurowana miraoro arítaráuge.

¹¹Sísá tagaríáh kegá sene sánsá suera Sísansabé íre kaweq ehwéh atagehéna ínéga moki Asiu kené momiwí nahmáritápéq anotahta q kamah ariena síwíoqnarauge. Anotah abíáhnsá aritena wáhnaupéqté ké suwahpeqkákáq pokue síwíoqnarauge úwe.

Poraga Sísá tagó ehweh Ágáripa teawu ehwéhne.

(Eqmaro 9.3-19, 22.6-16)

¹²Poraga mó mahraréna, Ínéga mirauraunsabé Támákasa suwahpeq pokinie iwíáhurauge. Iwíáhuraugara Manikáne ehweh mibeq mahbeq arítáh kéné wahnah anímárinká, Kaweróne éra, Komiraúno aintárówe. Komiraúno aintárówana ahtapeq pokurauge. ¹³Pokuraugana wéhékáhnabubu íopeqté anotahta q téhraguraire. Mi tehrehme pópoqnah kiotaqme téhrrairana tagarauge. Ínéreq ahtapeq sénító kereq míaraunarabeq téhraguraire. ¹⁴Anotah téhraguraitaq moki itega marakóipeq márunsurahuraune. Íbaru ehwéh, Asiu kené ehwehniká iraréna, Sorao, Sorao, aneqsabé níwíoqnahno? Kirusa séhíkárátáq are pera q míáhnana érinserah amahnága arere érire uraire.

¹⁵Urairana ínéga, Anotah aníno, are insebo uraugana wega, Íné Sísá arega níwíoqnáhna aní múge. ¹⁶Iriwe míahno. Arega néne arambehri

mirainkeheéna areba tuena omaq atóge. Amahnága tagáhna naneqkákáq mókake sokigi awéna naneqkákáq teri terininkehe.

¹⁷Nahnso kebá eqmaraníe. Mókake ínéga are séhréh atáhnaraq sereq Asiu kereqka íre subiq suagéhe. ¹⁸Nahnso kegá sirupipeqté síurá ebiqme tagéra sunkíkírirabeqte sánsá suera téhrehabeqte sánsá miraigehboq kosíwáhnorúno. Owainawane págege sansá suera Manikáne ahtapeq nogigéhboq kosíwáhnorúno. Sega arene ehweh íréhrataqmé sene ahbabáq kaweritaníe. Kaweraritena sensabé, Ite ínénsabe aiq pútare aintáh púana ínéga omaq itó ánimárimí míáhwe aitaníe urairana írátáuge úwe.

Poraga Ágáripa wene arambehriyabé teawu ehwehne.

¹⁹Poraga mó mahraréna, Ágáripao, are anotah wahnáh ání míahna puah néne ehweh iro. Sísaga íopeqte teníatái ehwéh íre anterúóge. Írakaumo. ²⁰Téhwe Támákása suwahpeq síwáhnoruraage. Síwáhnoréna mitaqté keyábé, Itene ahbabáq sansa sueq Manikánsabe áhraboro. Áhrabirataq mó ahbabáq pehragéq peh kaweqtaq méq wene arambehri miraoro. Mirairataq mó kegá itene ahbabáq sansa aiq pútaq sutowe íwíáhigehe uraage. Anehemé Sarúsarama suwahpeqkákáq moke Súría marákórápéqkákáq naruo ke míarorabeqkákáq mah ehwéh síwáhnoruraage.

²¹Mah ehwéh síwáhnoruraunsabé Asiu kegá Manikánsabe iwíáh íwíáh atáh náhtápéq íné tagéra táhtoqme, Subiq suanéhe íwíáhuowe. ²²Manikánka menahnkákáq amahnágaákáq aiq séhréh aintéhre. Séhréh aintéh púana iriwe ména anotah kereq íre síwíqkakaq kéreqsabé ehweh teiúge. Manikáne ehweh iraru kereq Mósísireqka iraru ehwéhmé teiúge. Ínéga mó ehwéh íre teiasa peh mi ehwéh teiúge. ²³Sega mahraréra, Mókakewe Manikánka omaq ato aní, ite meirena kaweritéh ani anotah erínana pukinkehe. Pukéna pusa ké míáhrarabeqte ebeq iriginkehe. Wega irigena Asiu kereq nahnso kereq téhrorahi ehwéh terinkéhe uwe. *(Aisaia 42.6, 49.6)*

Mó ehwéh íre teiasa peh mi ehwéh teiúge úwe.

Poraga Ágáripansabé, Aiq pútare ato ú ehwehne.

²⁴Pésátaga Porane ehweh saiqnaruenta anotah ehwéhnéna, wensabé, Porao, are múguwahgu aní úkurone. Áhnte sehirania púkú sáhnshah sáhnshahuronaga múguwahgu aní úkurone úwe.

²⁵Úwana Poraga wensabé, Pésátao, are anotah wahnáh ání móne. Íné íre múguwahgu aní ména peh aiq pútariahnsanuge. Íre pehipi irarúge. Peh tábúsoqme iwíáhéna iraruge. ²⁶Ínéga teiú éhwéhmé Ágáripaga tagaríéh púana wensabé pahsuqme teawúge. Sísaga mirauraimé íre epéráhpéria peh wehuke míaropi miraurai puana Ágáripaga aiq moke írátíéhre. ²⁷Ágáripao, arega Manikáne ehweh iraru kené ehweh aiq pútare aritahno? Íné tagaríómé arega aiq pútare aritahne úwe.

²⁸Úwana Ágáripaga Poransabé, Arega tenienayabé ínéga mótaq Sísa kéraníe íwiáhono úwe. ²⁹Úwana Poraga wensabé, Mótaqpópoq mókakebopoq íné íre tagaríoge. Íre arebataq ómi amahnága néne ehweh íráh kényabé nirutaboairarítoge. Ite ómi íné tahnsa aní úkigeheéna púreraitoge. Íre íné tahnsa karábúsiipéq míageheéna peh Sísansabé aiq pútare atageheéna púreraitoge úwe.

³⁰Úwara Ágáripah Pésátareh Pénáísireh sereq tútuue mió kereqka irigue ³¹máhpéq tueyokuwe. Tueyokéra sebatáq ehwehnéra, Mi anínká pukorahi ahbábáq íre mirauraire. Wega karábúsiipéq mía míorahi ahbábáq íre mirauraire uwe.

³²Ágáripaga Pésátansabé, Mi anínká, Aroma wahnáh aní Sísáhriga íné éhweh iranawire íre iraruraitaq tahirímé soraq auwo ató irino úwe.

Pora Aroma suwahpeq pokinkeheéra sípiipéq móató éhwéhne.

27 ¹Pora Ítári marákórápéq eqmarankeheéra sega wereq mó karábúsiipéq mió kereq wehukení wenáwíq Súríasaba mórítówe. Súríasawe we sóntía kené kíápéténi ména 100 sóntía ké wahnahnéna anotah wahnáh aní Sísáhrine arambehri aní míowe. ²Árámítífámi suwahpeqte sípígá mó ke suwahpeq mó ke suwahperue Esia marákórápéq pokinaútaq Súríasaga Porareq mó karábúsiipéqte kéreq sípiipéq mórítówe. Mó aní wenáwíq Árisátáki sípiipéq míowe. We Tésárónáika suwahpeq Másérónía marákórápéqte ánine. Itega sípi kéweweq pokowane. ^k ³Pokéq mó wehekáh Sáíróna suwahpeq sewane. Súríasaga Pora kaweratená wensabé, Arega mahtaq sewiéhnaraq arene iyahnaboga kirabo atagéhe úwe.

⁴Mó wehekáh itega sípi kéweweq pokowane. Iuranabiahapeq anotah soirírúnsabe marakó áwíq Sáipára ogehpeqtáq sótaikowane. ⁵Sótaikéq Sírísía marákórápéqkákáq Pámbíría marákórápéqkákáq anotah wanítábá sótaikéq Árisía marákórápéq Máira suwahpeq kowane.

⁶Sóntía kené kíápéténiga mitaq mó sipí Ítári marákórápéq pokína sipí kabaruwe. Kabaréna wega Árékásántaría suwahpeqte sípi Ítári marákórápéq pokína sipí ábóraq marena ite meiqmena sípiipéq móitowe.

⁷Mitaq sípi kéweweq anotah soirírúnsabe táhmaro wehekáh pehwehrué pokowane. Pehwehrué kúwaq itega Níra suwahpeq kótaikowane. Mitaq anotah soirírúnsabe itega obaríqme íre korahowane. Itega Sárámóni marákórápéq kótaikéq Kíríti marákórápéqte áyéhrápéq kótaikéq mi marakó ogehpeq kowane. ⁸Sípiwarí segagairabeq áwíq Kaweqtapére. Mitaq Áráséa suwahpeq wahtotare. Sípiipéq pehwehrué mitaq kowane.

⁹Anotah soirírúnsabe koyabo seyabonue áhnte wehekáh sótaikúwe. Ópeq tanáhráq súwana anotah soirírúnsabe wánínka áhnte

^k 27.2 Árúka mah pahsí sehiranú aní moq mi sipípéq kiwíowe.

nonaburóróúwe. Minayabe Poraga sensabé, ¹⁰Sípiakáq itenkakáq wánínkoneho. Íné iwíáhume pokonaraq íre peh sípiakáq kahgoakáq ite moq wánínkoneheqmúne úwe.

¹¹Úwana sóntía kené kíápéténiga Porane ehweh íre irena peh sípi soberú anínseq sípi abowáreqne ehweh irowe. ¹²Sipwarí segagairabeq ópeq tanáhráq méyabe íre kaweqtapéq púara áhnte kegá, Sípi kéweweq pokoneheqmúne uwe. Kíríti marákórápéq mó sipí kagairabeq áwíq Píníkie. Segá iwíáhéra, Píníkiwe íre anotah soiríri marákóe. Minayabe sípi kéweweq pokue ópeq tanáhráq mitaq kowíanehe uwe.

Anotah soirírúnsabe wánínka anotah nonaburóróúwe.

¹³Pehgáriq soirírúnsabe sega iwíáhéra, Aiq kawerire iwíáhuwaq sípi kéweweq Kíríti marákórápéqté áyéhrápéq wahtotaq pokowane.

¹⁴Pokowanana marakóipeqté anotah soiríqká paentowe.

¹⁵Anotah soirírúnsabe sípi sóirírúrabéq íre korahúwe. Íre korahúnsabe sípi soberú anínká sípi keyabonkúwana sóiriqka anehepeq pagume meqména kúwe. ¹⁶Itega Káúra marákó sótaikowanaraq pehgáriq sipí abariue pankeqme sipirapéq marahwáne. Anotah soirírú púana mi arámbéhrí anotah pagégé arámbéhríe.

¹⁷Sípi pitegíneho éra págege nahgáqtáté ákáhnabubu táhru táhruuwe. Ápárika marákóráq sóiriqka sípi paentáwena arahwéraq móitehneho éra sega séri pugeq súówana sípiga pehipi pokúwe. ¹⁸Mó wehekáh peh anotah soirírúwana sípi umehúnsabe wánínkíneho éra sega kahgowarí mewe wánípipeq súówe.

¹⁹Súówana mó wehekáh mónkakáq anotah soirírúwara mó wehekáh anotahta q áhreu puara sípi soberé mensáméhnsámárrí mewe wánípipeq súówe. ²⁰Áhnte wehekáh íonkakaq pópoqnahakáq wehyoqkakáq íre ábóraq kowana peh anotah ibónsúwana sóirírúwe. Minayabe sega wánínkoneheqmúne iwíáhuwe.

²¹Wánínkoneheqmúne iwíáhéra áhnte wehekáh táhutahuq awehriuwe. Awehriuwana Poraga se míórabeq séna sensabé mahraréna, Wehukeo, néne ehweh ireq Kíríti marákórápéq íre súótaq tahirímé sípiipéqté ménsáméhnsá peh kéh irino. ²²Amahnága íre áhreoro. Moke itega íre pukoneheqmúne. Peh morá sípi airaiq piteginawire.

²³Íné Manikáne aní ména wensabé iwíáh iwíáhata atauge. Inokáhpeq wene íópeqté ánínká ínéba iriwe ména ²⁴mahrarue teniena, Porao, íre áhreuño. Aroma kené wahnah Sísáhriga arene ehweh irankéhboq weba pokiniewóne. Minayabe Manikánka arereq moke sípiipéq míáh kéreq amahnága íre pukia peh oga míáhro aitéhre. ²⁵Manikánka tení éhwéhnsábé aiq pútare atóge. Wegá teninsábé aiq pútaraginawire iwíáhuge. Minayabe íre áhreoro. ²⁶Peh morá sóiriqka paentáwe sípi marakóipeq surahue piteginkehe úwe.

²⁷Inokáhpeq 14 wehekáh parabagútaq anotah soiríqká íre parabagia peh sípi anotah soréq wání áwíq Mérítérénia paentowe. Paentowara inokáhnabubu sípiipéq arambehrio kegá, Marakó peh wahtotare íwíáhuwe. ²⁸Iwíáhéra sega náhgáqtate wání agehga marówana peh ákáhtaq wahtótáq 40 míta kowe. Konsabe sípiga mó kúwara sega mótaq mó agehga marówana peh wahtotaq 30 míta agúwe. ²⁹Peh wahtotaq agú púara sípi marakóipeqté ébáhmári paentáwe súnsabe pitegineho éra áhreuwe. Áhreéra itaréitaré náhgáqtáq áhéni sarira mewe wánípipeq márówe. Mi ahénigá wánípipeq tuegáwagiwe ambubu aginkeheéra inokáhpeq sípi anehepeqte tuparúowe. Tuparuera apubúue ahyahbikerankeheéra púrueruwe.

³⁰Sípiipéq arambehriu kegá seye náhenéra, Mahtaq pukonehboq sípiakák karábúsi keákák sueq káriq sipí kéweweq marakóipeq pokoneheqmúne uwe. Mira íwíáhunsabé sega mó ke péhe éhwéh teriera, Itega mó ahéní sípi abiahtapeq sariwe tuparuanéhe uwe. Tuparuanéhe éra káriq sipí wánípipeq márúmárowe. Mi karíq sipí kéwewera pokonehe éra márúmárowe. ³¹Márúmárotaq Poraga sóntía kené kíápéténireq wene sóntía kereqsabé, Sípiipéq arambehriu kegá ite iuwera pokirataq wánínkoneheqmóe úwe. ³²Úwara sóntía kegá káriq sipí táhharó nahníáq kiraq súówana mi sipí sóreq wanítáq márunsurahéna pehipi pokúwe.

³³Ahyahbinkiranotaq Poraga ómi mío keyabé, Táhutahuq nahro éna pagu pagunéna sensabé, Itega téhtaré wíki iwíáh kikiréq táhutahuq íre narutówe. ³⁴Irupi pukiyehboq amahnága nahro. Ite íre wánínkoneheqmúne. Peh ite ómi áhkórapeq kéagorahúne úwe. ³⁵Mi ehwéh iraréna se tagotaq táhutahuq mewena Manikánsabe kaweróne atena keqme nówe.

³⁶Keqme nówara sirupipeq moke eyoyóera táhutahuq nowe. ³⁷Peh íregáritaq 276 wehuké mi sipíipéq míahwane. ³⁸Se táhutahuq nowana siyahbankirowara sípi umehíneho éra moke tahutáhúq wánípipeq súówe.

Sípi pitegú ehwehne.

³⁹Ahbiahipeq marakó ábóraq kowara sípiipéq arambehriu kegá tagéra eheqte marakóbo iwíáhuwe. Iwíáhéra kaweq arahwé tagéra sípi korahonaraq mitaq kowíanehe íwíáhuwe. ⁴⁰Mira íwíáhunsabé sega áhéni nahníáq kiraqme sóreq wanípípeq súówe. Sípi soberinkeheéra sega soberé kara pugeq súówe. Sóiriqka sípi paentáwe áhnopeq méitankeheéra sega séri pankeqmárowe.

⁴¹Moke mirau puana sípiga peheráh kéné wánípipeqté arahwéraq móbegue kowíówe. Arahwéraq móbegúnsabe íre pokorahúwana anehepeq wánínka mésubiqmaq subiqmarúwe. Mésubiqmaq subiqmarúnsabe sípi piteginaúwe.

⁴²Sóntía kegá iwíáhéra, Karábúsi kegá wánípipeq súbimiue áhkórapeq keague taqnobagiyeho éq amahnága se subiq suanehe íwíáhuwe.

43 Iwiáhuwana sene kíápéténiga, Pora subiq súého íwiáhéna ahqáho aritowe. Wega wánípipeq súbimi tagariáh káyábé, Ebeqme itega wánípipeq ahkuague súwímiue áhkórapeq pokoro. 44 Anehe mó kegá sípi pitegia áyéhráqpópoq abaraqpópoq táhtoqme áhkórapeq kéagigehe úwe. Úwaq itega moke wega teiunserahnue kaweqtaq áhkórapeq kéagowane.

Wehenka Pora pó ehwehne.

28 1 Áhkórapeq kowéq mi marákó áwíq Márátae irahwáne. 2 Mibeqté kégá ite mehweh aitera kaweraitówe. Ibonsúwana titirúnsabe sega ira pariówe. 3 Poraga irawarí kosiqme sesiqmeue ira pariowe. Ira pariotaq osoronsabe mipi mío wehenká ira kunkúnúwana tueyokéna Porane ayahnkara pówe. 4 Wehenka wene ayah péna pahtiwara mibeqté kégá tagéra seye náhenéra, Mi anímé wehuke subiq suo anípómo. Íre wánínkinsabé we ahbabáq ani púana amahnága pukinkehe uwe.

5 Uwana wene ayahnkara kóbiq kóbirúwana wehenka iraipéq megúwana Pora peh míowe. 6 Peh míowara sega áwénunéra iwíáhéra, Wene ayahnkara muinabomo. Aunúnkaq márunsurahéna pukinabirapómo íwiáhuwe. Íre wahto tanáhráq áwénunuwana sene iwíáh íre aiq pútaragúnsabe sega mó iwíáhéra, We manikápómo íwiáhuwe.

Awahre koré kaweragú ehwehne.

7 Mi marákórápéqté wáhnáh ání wenáwíq Púbiúsae. Mitaq wene marakó wahtotare. Wega ite mehweh aintena wene nahtapeq apahtárórác kawerue kirabo aitowe. 8 Wenabo osorosorú awahréna puriq puriqkakarúwe. Awahreúwana Poraga weba séna púreréna wene ayahnkaratáté táhtorowana kaweragúwe.

9 Kaweragúwara moke mi marákórápéqté kégá minayabe írówara moke awahre kegá Poraba suwana púreraritowana kaweragúwe. 10 Mibeqté kégá ménsámehnsá pehipi náí náinuwe. Itega mi marákórác apahtáro íó méq suanehe owanaraq moke iuwahbeh naneq ménsáméhnsá sípiipéq sáharagehéera náíúwe.

Poraga Aroma suwahpeq pokú ehwehne.

11 Árékásántaría suwahpeqte sípi ópeq tanáhráq mitaq sípi kagairabeq kowe. Sípi abiahtapeq se ábáhréné siyahqno tahnsa náneq píkísah kowe. Mi abáhréwé péhe máníká áwíq Súsine ahnínkáwáráree. Apahtáro íó itega mi marákóipéq méq mi sípi kéweweq pokowane. 12 Mó marákórápéq pokue Sírakíúsa suwahpeq apahtárórác kowíahwane. 13 Mitaq sueq sípi kéweweq pokue Árégíúma suwahpeq pokowane. Mó wehekáh sípi anehepeqte sórirúnsabe mitaq sueq apahtárórác sípiipéq Putéóri suwahpeq kowíahwane.

¹⁴Mitaq Sísa tagariáh ké méra, Iteba kaegaeoro unsabe abapete téhtaréráq seba kowíahwane. Mitaq sueq ahtapeq pokue Aroma suwahpeq konehe iwíáhowane. ¹⁵Aroma suwahpeqte Sísa tagariáh kégá, Porarehga áhnbórá seneherawoe u ehwéh irera táhmaro kega ahtapeq sure máhkétirapéq áwíq Ápíusa séra mitaq iwénunuwe. Mitaq kaegaeo nah apahtáro korabeq iwénunuwe. Poraga sutaq se tagéna wene arupipeq eyoyóéna Manikánsabe iwíáh iwíáh atowe.

¹⁶Itega Aroma suwahpeq kowíahwanaraq sega Pora íre karábúsiipéq móatera peh wewene nahtapeq móátówe. Wereq peh morá we wahnahnú sontiá ánínseqka kaegaeuye.

Poraga Aroma ke kaweq ehwéh teriu ehwéhne.

¹⁷Wega mitaq ména apahtároráq mibeqté Asiu kené wahnah keyábé síáhrabúwara suwe. Weba suwana sensabé, Nánuwahraho, Asiu ke íre ahababáq arítaráuge. Iteriborehne sansá íre anterutaugé. Se íre ahababárarítáugarawe Sarúsarama suwahpeqte Asiu kegá íné táhtoqme Aroma kebá móintárówe. ¹⁸Aroma kegá néne ahababáqsabe kabaréra kasenaintárówe. Kasenaintera se ahtebome íné íre pukorahi ahabábáruansabé sega, Soraq auwanéhe urowe.

¹⁹Soraq auwanéhe urowara Asiu kegá anotah ahqáho arítárówe. Anotah ahqáho arítáronsabé ínéga mahraréna, Aroma wahnáh ání Sísháhi íné éhweh teawenana iwíáhue tagéna teinkéhe urauge. Minayabe surauge. Séna nánuwahrah Asíú keyábé ehweh aritanieéna íre surauge. ²⁰Ite tagéna mah ehwéh teinieéna íáhrabuge. Marakóipeq tuina anímé ite Asiu kegá áwénunona anímé wensabé aiq pútare atóge. Minayabe karábúsiipéq míoge úwe.

²¹Úwara sega wensabé, Súría marákórápéqté kégá are éhweh pahsí íre sehiranue íátówe. Mahtaq suro Asiu kegá arega ahababárire íre teíátówe. ²²Mah marákó marákórápéqté kégá Sípane sánsá íre kaweq sansáne tei teinurowe. Minayabe arega teiena ehwéh iraneheqmúne uwe.

²³Seyega iwíáhu wehekáh Porane nahtapeq áhnte kegá weba suwe. Suwana wega moke mi wehekáh Manikánka wahnah wahnahnirabeqte éhwéh teriuwe. Segá Sísa éhweh irageheéna wega Mósísiga sehgióro ú ehwehnikákák Manikáne ehweh iraru kené sehirankakaq sáhnshawe síwáhnorúwe.

²⁴Síwáhnorúwara táhmaro író kega wene ehwehnsabé aiq pútare atówara mó kegá íre aiq pútare atówe. ²⁵Sega íre peh morá iwíáhuwana pokonehera utaq Poraga mahraréna, Manikáne Awanka wene ehweh irarú ani wenáwíq Áísáia iwíáh atowana wega itene igaqnaréhyabe mahraréna,

²⁶Mah ke korerio. Korerie, Itene iahrega áhnte tanáhráq ireqmé íre kawerue iahtebahwe. Itene iuranka áhnte tanáhráq tagéqmé íre kawerue iahtebahwe korerio.

27 Sene iwíáh págege agirara sene siahrrerate ireyabe suwahrieh puara sene siahre parokirara sene siura aiq pigire. Segá ireyabe íre suwahrietaq tahirímé sene siahre iréra siura tagéra kawerue siahtebah irino. Iahtebahtaq tahirímé ínéba surowana kawerarító irino. Íné Manikánka aiq iraruge úwe teriuwe. (Aisaia 6.9-10)

28 Poraga Áísáíane ehweh teriena mó mahraréna, Ite mina tahnsano puana Manikáne Awanka iwíáh ato ehwéhniká aiq pútaragire. Minayabe Manikánka Sísansabé aiq pútare atáh ké kawerarite ehwéh nahnso ke korerio aintéhre. Nahnso kegá kawerue iratiagehe. Minayabe ahtebahro úwe. 29 Poraga Aroma suwahpeqte Asiu ke mi ehwéh aiq teriuwe. Teriuwara Asiu kegá seye ehwehéra pokuwe.

30 Poraga mitaq téhtaré ópéq ména wewega mó iotáq mó iotárué paiqma paiqmaru nahtápéq míowe. Wene nahtapeq su keyábé kawerue mehweh aritena 31 Manikánka wahnahni ehwéh teri terinúwe. Teriena itene Wahnah Sísá Karáhé éhweh pahsuqme síwáhnorúwe. Síwáhnorúnsabe Aroma wahnáh kégá íre ahqáho atówe.